

MESYUARAT PERTAMA, PENGGAL KEEMPAT
PARLIMEN KEEMPAT BELAS
2021

HARI RABU : 29 SEPTEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 9 HINGGA NO. 75)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN YUSUF BIN ABD. WAHAB
[TANJONG MANIS]**

TARIKH : 29 SEPTEMBER 2021 (RABU)

SOALAN

TUAN YUSUF BIN ABD. WAHAB [TANJONG MANIS] minta **MENTERI PERTANIAN DAN INDUSTRI MAKANAN** menyatakan apakah perancangan pihak Kementerian untuk membaiki kerosakan dan pemendapan pada ban pertanian dan struktur pintu air di kawasan Parlimen Tanjong Manis, termasuk di Paloh Kedang dan Utara Pulau Bruit. Kerosakan ban pertanian ini telah mengakibatkan kemusnahan tanaman dan kerugian kepada penduduk kampung.

JAWAPAN

Tuan Yang Di Pertua,

Untuk makluman Yang Berhormat, MAFI telah melaksanakan kerja-kerja penyelenggaraan dan baik pulih struktur-struktur pengairan dan saliran yang melibatkan peruntukan mengurus Kerajaan Negeri dan Persekutuan pada setiap tahun di kawasan Skim Pulau Bruit dan kawasan Paloh Kedang yang terletak di bawah Skim Paloh Bangau. Sepanjang tempoh 2018 hingga 2021, sebanyak RM1,184,787.40 telah dibelanjakan di kawasan Paloh Bangau manakala sebanyak RM2,903,595.00 telah dibelanjakan di kawasan Pulau Bruit.

Pihak MAFI berpendapat satu peruntukan khusus perlu disediakan bagi menaiktaraf infrastruktur sediaada. Sehubungan itu, pihak MAFI mencadangkan permohonan peruntukan kepada EPU bagi tujuan

NO. SOALAN : 9

Membina dan Menaiktaraf Infrastruktur Pengairan dan Saliran di Skim Pertanian Pulau Bruit di dalam RP3 RMKe-12 dengan kos keseluruhan projek berjumlah RM15,000,000.00.

Bagi memastikan kebajikan rakyat terpelihara MAFI akan sentiasa menyalurkan peruntukan mengikut keperluan semasa di kawasan yang terlibat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHAN FOONG HIN
[KOTA KINABALU]**

TARIKH : 29 SEPTEMBER 2021 (RABU)

SOALAN

TUAN CHAN FOONG HIN [KOTA KINABALU] minta **MENTERI KANAN PENDIDIKAN** menyatakan apakah status pengedaran 150,000 unit komputer riba yang diluluskan dalam Belanjawan 2021, terutamanya di Sabah. Adakah Kementerian akan menambah lagi pengedaran komputer riba bagi memudahkan pelaksanaan program Pengajaran dan Pembelajaran di Rumah (PdPR) sepanjang tempoh pandemik COVID-19.

JAWAPAN

Tuan Yang di-Pertua,

Untuk makluman Ahli Yang Berhormat, inisiatif Tabung CERDIK seperti yang diluluskan dalam Belanjawan 2021 adalah satu inisiatif pemberian peranti digital kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital dan pelan data kepada murid B40 yang dikenal pasti.

Yayasan Hasanah menguruskan sumbangan peranti digital termasuk pelan data daripada GLC dan GLIC serta menyelaras penghantaran peranti berkenaan ke Pejabat Pendidikan Daerah (PPD), Kementerian Pendidikan Malaysia (KPM).

Peranti digital yang diterima oleh KPM akan terus diagihkan kepada murid B40 yang telah dikenal pasti. Sehingga 26 September 2021, sebanyak 116,736 unit peranti digital telah diserahkan kepada murid B40 di 955 sekolah seluruh negara. Manakala, 18,770 unit telah diterima daripada Yayasan Hasanah dan akan diagihkan kepada murid dalam masa terdekat. Baki 14,494 unit lagi akan diagihkan sebaik sahaja diterima daripada Yayasan Hasanah.

Daripada jumlah tersebut, sebanyak 13,458 unit peranti digital telah diagihkan kepada murid B40 di Sabah di 97 buah sekolah.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : DATO' SRI ABDUL AZEEZ BIN ABDUL RAHIM
[BALING]**

TARIKH : 29 SEPTEMBER 2021 (RABU)

SOALAN

DATO' SRI ABDUL AZEEZ BIN ABDUL RAHIM [BALING] minta **MENTERI KEWANGAN** menyatakan apakah status terkini program i-Citra KWSP yang telah dilaksanakan pada bulan Julai 2021.

JAWAPAN

Tuan Yang di-Pertua,

1. Untuk makluman Ahli Yang Berhormat, i-Citra adalah salah satu program pengeluaran khas yang diperkenalkan oleh Kumpulan Wang Simpanan Pekerja (KWSP) untuk membantu ahli meneruskan kelangsungan hidup dalam menempuhi cabaran dan impak Perintah Kawalan Pergerakan (PKP) akibat pandemik COVID-19.
2. i-Citra membolehkan ahli yang berumur di bawah 55 tahun untuk mengeluarkan simpanan sehingga RM5,000.00 tertakluk kepada baki simpanan dalam Akaun 1 dan Akaun 2. Ahli perlu mengekalkan baki minimum sebanyak RM100.00 dalam Akaun 1. Jumlah pengeluaran yang diluluskan akan dibayar secara berkala sehingga lima kali bayaran bulanan sebanyak RM1,000.00 sebulan.
3. Permohonan i-Citra telah dibuka kepada ahli pada 12 Julai 2021 sehingga 30 September 2021. Pembayaran pertama telah dikreditkan ke dalam akaun bank ahli bermula Ogos 2021.
4. Setakat 31 Ogos 2021, sebanyak 4.98 juta permohonan telah diluluskan melibatkan amaun pengeluaran berjumlah RM20.58 bilion. Daripada jumlah pengeluaran tersebut, jumlah bayaran yang telah dikreditkan kepada ahli ialah RM4.71 bilion iaitu 23% daripada jumlah pengeluaran yang diluluskan. Baki amaun pengeluaran akan dikreditkan kepada ahli berdasarkan jadual bayaran yang telah ditetapkan bagi pengeluaran i-Citra dan pembayaran terakhir adalah pada bulan Februari 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 29 SEPTEMBER 2021 (RABU)

SOALAN

minta **MENTERI PENGAJIAN TINGGI** menyatakan bagaimanakah Kementerian ingin memastikan kualiti graduan tidak terjejas semasa tempoh pandemik COVID-19.

JAWAPAN

Tuan Yang di-Pertua,

Kementerian amat mengambil berat terhadap kualiti graduan dan keberkesanan sesi pengajaran dan pembelajaran (PdP) khususnya semasa pandemik Covid-19.

Secara umumnya, antara fokus yang dilaksanakan oleh KPT adalah:

- i. **Penyediaan platform komunikasi yang baik** bagi sesi PdP. Bagi maksud ini, Institusi Pendidikan Tinggi (IPT) telah mengoptimumkan penggunaan platform seperti *Open Educational Resources* (OER), *Open CourseWare* (OCW), *Massive Open Online Courses* (MOOCs) dan *Learning Management System* (LMS) untuk memastikan sesi pembelajaran secara maya dapat dijalankan dengan berkesan;
- ii. **Pembangunan kandungan modul pembelajaran yang berkualiti.** Kementerian melalui Unit Jaminan Kualiti di Universiti Awam dan Majlis Ketua Penyelaras E-Pembelajaran IPTA Malaysia (MEIPTA) memantau secara dekat kualiti modul pembelajaran dalam talian dan keberkesanan sesi PdP yang dijalankan. Penambahbaikan secara berterusan turut dilaksanakan terhadap kandungan dan kaedah penyampaian;
- iii. **Penyediaan kapasiti jalur lebar di IPT yang lebih tinggi** bagi membolehkan pensyarah dan pelajar mendapat akses internet dengan lebih baik melalui inisiatif *Malaysian Research & Education Network* (MYREN). Inisiatif ini meningkatkan kapasiti jalur lebar di Institusi Pendidikan Tinggi Awam (IPTA) kepada antara 500Mbps hingga 10Gbps dengan peruntukan sebanyak RM50 juta;
- iv. **Bantuan kemudahan peranti dan pelan data kepada pelajar.** Bagi tujuan ini, kementerian telah menyediakan:-
 - a. Bantuan RM50 secara *one-off* untuk langganan awal pelan data dengan peruntukan sebanyak RM3.8 juta kepada 76,153 pelajar baharu sesi Akademik 2020/2021.

- b. Bantuan berbentuk sumbangan pelan data bagi capaian internet kepada 320,396 pelajar dan bantuan pemilikan peranti kepada 8,965 pelajar daripada kalangan keluarga B40 di universiti-universiti awam yang diagihkan bermula 30 September 2020. Anggaran keseluruhan inisiatif ini adalah berjumlah RM37.4 juta.
- c. Menyediakan pakej istimewa pelan data dan peranti dengan kerjasama lima (5) syarikat telekomunikasi iaitu Celcom, Maxis, Digi, TM(unifi) dan U Mobile; serta enam (6) syarikat pembekal peranti iaitu Acer, Samsung, Apple Education Store, Dell, Huawei dan Lenovo kepada pelajar IPT.
- v. **Peningkatan keupayaan dan kemahiran pensyarah mengendalikan sesi PdP.** Kementerian melalui IPT melaksanakan latihan peningkatan kapasiti secara berterusan kepada pensyarah sepanjang tahun 2020 sehingga 2021 bagi peningkatan kemahiran pengajaran secara dalam talian. Antara latihan yang telah dijalankan adalah *The Guide to Challenge Based Learning, Effective e-Assessment, Online Pedagogy*, Pembudayaan Pembelajaran Digital Melalui *Open & Distance Learning* (ODL) dan banyak lagi.
- vi. **Penyediaan Garis Panduan Pelaksanaan Pembelajaran dan Pengajaran Semasa dan Pasca Covid-19.** KPT melalui MQA telah mengeluarkan beberapa garis panduan atau *Advisory Note* berhubung Pengendalian Program Pendidikan Tinggi Semasa dan Pasca Perintah Kawalan Pergerakan. Garis panduan ini adalah penting untuk memastikan penilaian dan kaedah pembelajaran dapat terus dilaksanakan dengan berkesan tanpa mengabaikan kualiti dan hasil pembelajaran yang telah ditetapkan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN JUGAH ANAK MUYANG @
TAMBAT [LUBOK ANTU]**

TARIKH : 29 SEPTEMBER 2021 (RABU)

SOALAN

YB TUAN JUGAH ANAK MUYANG [LUBOK ANTU] minta **MENTERI PELANCONGAN, SENI DAN BUDAYA** menyatakan apakah langkah yang boleh dilaksanakan oleh Kementerian berkenaan mempromosikan kawasan luar bandar yang masih terpinggir namun berpotensi untuk diketengahkan sebagai destinasi baru pelancongan.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa bekerjasama dengan semua pihak terutamanya dengan kerajaan negeri di dalam mengenal pasti produk-produk pelancongan di kawasan luar bandar yang mempunyai potensi untuk dimajukan sebagai destinasi pelancongan. Melalui Tourism Malaysia, iaitu salah satu agensi di bawah MOTAC, destinasi dan produk pelancongan tersebut akan dipromosikan kepada pasaran domestik serta antarabangsa.
2. Malaysia adalah sebuah negara yang kaya dengan keindahan alam semulajadi dan mempunyai banyak kawasan-kawasan di luar bandar yang boleh menawarkan produk-produk eko-pelancongan. Ini termasuklah di

kawasan Yang Berhormat sendiri iaitu di Lubuk Antu yang sedia ada menawarkan produk-produk pelancongan menarik berasaskan alam semulajadi seperti program *In Search of Wild Orang Utan* disamping aktiviti-aktiviti lain di Batang Ai.

3. Dalam memastikan kawasan-kawasan eko-pelancongan ini dibangunkan secara lestari, MOTAC telah merangka Pelan Ekopelancongan Kebangsaan 2016-2025 sebagai halatuju dalam memperkukuhkan pembangunan segmen ini. Untuk makluman, bagi kawasan Parlimen Lubuk Antu, kluster Sri Aman-Batang Ai-Ulu Sungai Menyang-Maludam telah dikenalpasti dalam Pelan ini. Menerusi pembangunan kluster-kluster ekopelancongan, aktiviti pelancongan berasaskan komuniti atau *Community-Based Tourism* (CBT) diberi fokus.

4. Tourism Malaysia juga mempromosi segmen-segmen dan aktiviti-aktiviti pelancongan yang tertumpu di luar bandar seperti aktiviti memancing di Kuala Rompin, *bird-watching* di Kuala Gula Bird Sanctuary dan di Taman Negeri Perlis disamping menyokong penganjuran acara-acara pelancongan unik di kawasan-kawasan luar bandar.

5. Pelbagai inisiatif digunakan untuk mempromosikan negara termasuk produk-produk pelancongan di kawasan luar bandar seperti melalui program usahasama dengan pengusaha-pengusaha pelancongan antarabangsa. Tourism Malaysia turut memberi penekanan dalam menggunakan sosial media seperti *Facebook*, *Instagram*, *YouTube*, *Twitter*, Blog serta *Key Opinion Leaders* (KOLs). Penyampaian maklumat berkenaan produk-produk pelancongan negara di platform digital ini akan membolehkan para pelancong menerima maklumat produk-produk pelancongan yang ditawarkan secara terus dan mudah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 29 SEPTEMBER 2021 (RABU)

SOALAN

TUAN KHOO POAY TIONG [KOTA MELAKA] minta **MENTERI KEWANGAN** menyatakan penggunaan peruntukan di bawah Kumpulan Wang COVID-19 sejak ditubuhkan, termasuk baki yang masih ada, dan apakah strategi Kerajaan selanjutnya untuk menambah/meningkatkan dana bagi menampung perbelanjaan tambahan melalui Kumpulan Wang COVID-19 ini.

JAWAPAN

Tuan Yang di-Pertua,

1. Setakat bulan September 2021, perbelanjaan Kumpulan Wang COVID-19 (atau KWC-19) telah mencecah RM60 bilion ringgit atau melebihi 90% peratus daripada had siling RM65 bilion ringgit yang diluluskan Parlimen pada hujung tahun 2020.
2. Pada 10 September 2021, Jemaah Menteri telah meluluskan cadangan Kementerian Kewangan untuk membentangkan pindaan Akta Langkah-Langkah Sementara bagi Pembiayaan Kerajaan (Penyakit Koronavirus 2019) bagi perkara-perkara seperti berikut:
 - a. Pertama, meningkatkan had siling Kumpulan Wang COVID-19 (KWC) daripada RM65 bilion kepada RM110 bilion; dan
 - b. Kedua, meningkatkan had statutori hutang Kerajaan Persekutuan daripada 60% kepada 65% peratus kepada KDNK.

3. Pindaan Rang Undang-Undang ini akan dibentangkan di dewan yang mulia ini pada minggu kedua bulan Oktober 2021 kelak. Peningkatan had siling KWC-19 ini adalah untuk menampung perbelanjaan tambahan terutamanya untuk:

- a. Pertama, bantuan tunai kepada golongan rentan yang masih terkesan akibat wabak COVID-19;
- b. Kedua, sokongan untuk kelangsungan perniagaan termasuk insentif penggajian bagi menggalakkan pemulihan peluang pekerjaan selaras dengan pembukaan semula ekonomi; dan
- c. Ketiga, peruntukan tambahan bagi memenuhi keperluan sistem kesihatan awam berkaitan COVID-19

4. Sehubungan itu, peningkatan siling tersebut adalah penting untuk memenuhi keperluan perbelanjaan dalam suku keempat tahun 2021 serta tahun 2022.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN AHMAD TARMIZI BIN SULAIMAN
[SIK]**

TARIKH : 29 SEPTEMBER 2021 (RABU)

SOALAN

minta **MENTERI KOMUNIKASI DAN MULTIMEDIA** menyatakan apakah perancangan untuk membangunkan pelan jaringan Internet yang lebih baik di kawasan pedalaman khususnya di daerah Sik bagi memudahkan urusan pengajian atas talian pelajar sekolah dan universiti.

JAWAPAN

Tuan Yang Dipertua,

Untuk makluman Ahli Yang Berhormat, umum sedia maklum bahawa kebergantungan kepada Internet yang tinggi di kalangan rakyat terutamanya para pelajar sama ada di kawasan bandar mahupun luar bandar sangat penting kini. Kerajaan dengan kerjasama Suruhanjaya Komunikasi dan Multimedia Malaysia (SKMM) telah mengambil beberapa inisiatif dalam menghasilkan sebuah rancangan yang dapat menangani isu akses kepada Internet berkualiti bagi perkhidmatan tetap dan mudah alih termasuk Pengajaran dan Pembelajaran di Rumah (PdPR).

Pelaksanaan JENDELA bukan sahaja tertumpu di kawasan-kawasan bandar, malah turut mengambilkira penyediaan infrastruktur digital di kawasan-kawasan luar bandar yang menggunakan peruntukan di bawah Kumpulan Wang Pemberian Perkhidmatan Sejagat (USP). Sehingga 31 Ogos 2021, sebanyak 693 stesen pemancar telah siap dinaiktaraf daripada jumlah keseluruhan sebanyak 5,394 stesen

pemancar yang akan dinaiktaraf kepada teknologi 4G di seluruh negara menjelang penghujung 2021 melalui kaedah Penyumbang Utama bagi menyediakan liputan 4G yang lebih berkualiti. Melalui kaedah yang sama, sebanyak 362 menara baharu akan dibina menjelang penghujung 2022 yang akan meningkatkan kadar liputan 4G di kawasan berpenduduk di seluruh negara kepada 95%.

Untuk makluman Ahli Yang Berhomrat, inisiatif untuk menambahbaik infrastruktur digital di Kedah adalah seperti berikut:

- a. Sebanyak 41 menara baharu dengan teknologi 4G telah siap dilaksanakan daripada jumlah 134 menara yang di dalam perancangan;
- b. Menaik taraf 1,612 stesen pemancar sedia ada kepada teknologi 4G. Daripada jumlah tersebut, 1,339 lokasi telah dinaik taraf; dan
- c. Menyediakan capaian jalur lebar talian tetap berkelajuan tinggi kepada 76,474 premis. Daripada jumlah tersebut, sebanyak lebih 45 ribu premis telah siap dilaksanakan dengan sambungan gentian optik.

Di Parlimen Sik pula, sebanyak 23 menara baharu akan dibina di bawah pelan JENDELA. Manakala sebanyak 72 stesen pemancar komunikasi sedia ada yang akan dinaik taraf kepada teknologi 4G dan daripada jumlah tersebut, terdapat 37 menara telah siap dinaik taraf. Selain itu, sebanyak 515 premis akan disediakan akses kepada perkhidmatan berkelajuan Gigabit. Daripada jumlah ini, sebanyak 321 premis telah siap dilaksanakan dengan sambungan gentian optik.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan.

Menerusi portal *JENDELA Map* (<https://jendela.my>) yang telah dilancarkan pada Julai lepas, maklumat yang diperoleh daripada pengguna secara terus secara sumber khalayak atau *crowdsourcing*, dapat digunakan sebagai maklumat bagi membuat perancangan penambahbaikan liputan dan kualiti perkhidmatan jalur lebar dari semasa ke semasa.

Kerajaan mengambil maklum berkenaan maklumbalas rakyat yang menginginkan kesalinghubungan lebih baik, harga mampu milik dan memastikan penyampaian lebih berkualiti lebih-lebih lagi semasa tempoh Perintah Kawalan Pergerakan (PKP) yang menyaksikan peningkatan mendadak penggunaan Internet untuk pelbagai urusan seperti aktiviti pembelajaran, e- dagang dan juga hiburan.

Untuk meringankan beban rakyat dan memastikan kesalinghubungan digital tidak terjejas semasa tempoh pandemik ini, terutamanya agar sesi Pengajaran dan Pembelajaran di Rumah (PdPR) berjalan dengan lancar, pihak MCMC bersama-sama dengan syarikat telekomunikasi telah pun menjalankan pelbagai program dan inisiatif supaya rakyat Malaysia terus berpeluang menikmati perkhidmatan internet.

Selain daripada inisiatif Kerajaan bagi menambahbaik infrastruktur digital, terdapat sebanyak 873 Pusat Internet Komuniti (PIK) di kawasan miskin bandar, pinggir bandar dan luar bandar yang boleh dimanfaatkan oleh orang ramai terutamanya para pelajar dalam memastikan proses PdPR berjalan lancar sebagai persediaan menghadapi peperiksaan besar seperti SPM dan STPM. Terdapat 73 PIK sedang beroperasi di Negeri Kedah termasuk 6 PIK di Sik.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA DR. MOHD HATTA BIN MD.
RAMLI [LUMUT]**

TARIKH : 29 SEPTEMBER 2021 (RABU)

SOALAN

Minta **MENTERI PERTANIAN DAN INDUSTRI MAKANAN** menyatakan apakah langkah yang akan diambil oleh pihak Kementerian untuk menarik minat warganegara tempatan untuk terlibat khususnya dalam industri perikanan. Apakah jenis insentif yang akan disediakan untuk menjayakan program ini.

JAWAPAN

Tuan Yang Di Pertua,

Untuk makluman Ahli Yang Berhormat, bagi menarik minat warganegara tempatan untuk terlibat khususnya dalam industri perikanan, Kementerian Pertanian dan Industri Makanan (MAFI) telah mengambil beberapa langkah seperti berikut:

- i. Program Latihan Kemahiran Pertanian Kebangsaan (PLKPK) yang berlandaskan Pendidikan Teknikal dan Vokasional (TVET) kepada semua generasi muda berumur di antara 18 hingga 25 tahun yang berkecukupan. Pelatih diberi wang saku bulanan sebanyak RM200 bagi Sijil Kemahiran Malaysia (SKM) dan RM250 bagi Diploma Kemahiran Malaysia (DKM);

- ii. Program Sijil Kemahiran/Diploma Kemahiran Malaysia (Perikanan Tangkapan/Akuakultur). Program ini menawarkan Sijil Kemahiran Malaysia (SKM) untuk bidang perikanan tangkapan dan Diploma Kemahiran Malaysia (DKM) untuk bidang akuakultur;
- iii. Program Sijil Perikanan. Program ini dikhususkan kepada belia lepasan SPM yang berumur 18 hingga 40 tahun. Program selama 2 tahun ini menggabungkan tiga bidang utama dalam perikanan iaitu bidang perikanan tangkapan, bidang akuakultur dan bidang pemprosesan produk perikanan.;
- iv. Kursus/Latihan *Upskilling* (Latihan Jangka Pendek) kepada kumpulan sasar bertujuan untuk meningkatkan kemahiran dan pengetahuan berdasarkan bidang pengkhususan masing-masing; dan
- v. Latihan Kerja *On-the-job training* selama satu hingga enam bulan dalam kalangan syarikat bertujuan memenuhi permintaan dalam peluang pekerjaan bagi meningkatkan peluang kemahiran kepada perantis dalam bidang pertanian dan industri Agromakanan termasuk bidang perikanan.

Untuk makluman Ahli Yang Berhormat jua, MAFI turut menyediakan insentif-insentif seperti berikut:

- i. Skim Subsidi Petrol dan Diesel bagi menampung sebahagian dari kos operasi penangkapan ikan nelayan akibat dari kenaikan harga bahan api di pasaran;
- ii. Elaun Sara Hidup Nelayan (ESHN) untuk meringankan beban nelayan dalam menghadapi tekanan ekonomi disebabkan kenaikan kos sara hidup. ESHN dinaikkan kepada kadar RM300 sebulan bagi pemilik vesel zon A dan pekerja zon B, C dan C2;

SOALAN NO: 16

- iii. Insentif Hasil Tangkapan Ikan (IHTI) pada kadar RM0.10 sekilogram diberikan kepada pemilik vesel berlesen Zon A (Petrol), Zon B dan Zon C yang membuat pengisytiharan pendaratan ikan di Pusat Pengisytiharan;
- iv. Program Dana Nelayan menyediakan pinjaman mudah bagi pembelian bot dan peralatan baharu atau meningkatkan keupayaan bot sedia ada;
- v. Program Pembangunan Pelan Peningkatan Pendapatan Golongan B40: Nelayan Melalui Projek Tanaman Kontan melibatkan insentif *in-kind* yang diberikan kepada peserta dalam bentuk input pertanian, tenaga kerja, latihan dan khidmat nasihat teknikal serta elemen pemasaran hasil pertanian; dan
- vi. Program Azam Tani (Rezeki Tani) memberi bantuan penyediaan premis dan infrastruktur, bantuan peralatan, benih-benih ternakan dan tanaman bagi melaksanakan projek. Jumlah bantuan yang diberikan ialah RM10,000 bagi setiap peserta.
- vii. Program Pembangunan Kumpulan Nelayan adalah program yang memberikan bantuan dari segi modal, peralatan dan khidmat nasihat bagi merealisasikan aktiviti yang dijalankan sebagai satu perniagaan yang berdaya saing dan menggunakan teknologi moden. Bagi tahun 2021, sejumlah RM200,000.00 telah diperuntukkan bagi pelaksanaan program ini dan sehingga kini terdapat 66 buah Kumpulan Nelayan Wanita (KUNITA) dengan keahlian 4,220 orang dan 18 buah Kumpulan Belia Nelayan (KUBENA) dengan bilangan ahli seramai 589 orang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 29 SEPTEMBER 2021 (RABU)

SOALAN

TUAN HAJI WAN HASSAN BIN MOHD RAMLI minta **MENTERI KANAN PENDIDIKAN** menyatakan pelan jangka pendek Kementerian untuk menangani isu keciciran murid sekolah terutamanya melibatkan golongan yang berhadapan dengan masalah ketika pelaksanaan PdPR.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan

intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Selain itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerksaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu,

kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui Digital Educational Learning Initiative Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa.

Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul pembelajaran dan membuat serahan bahan tersebut kepada murid. Guru juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Untuk makluman Ahli Yang Berhormat, KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM yakin kerangka holistik yang dirancang dan dilaksanakan ini membolehkan murid mengikuti PdP secara berkesan, seterusnya dapat menangani keciciran murid dan memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATO' WIRA HAJI AMIRUDDIN
BIN HAJI HAMZAH [KUBANG PASU]**

TARIKH : 29 SEPTEMBER 2021 (RABU)

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **MENTERI KEWANGAN** menyatakan n apakah mandat yang diberikan kepada Bank Negara Malaysia dalam mengawasi Tabung Haji. Adakah termasuk pengawasan pelaburan dan adakah mandat ini akan berakhir sebaik sahaja urusan Suruhanjaya Siasatan Diraja Tabung Haji tamat.

JAWAPAN

Tuan Yang-di-Pertua,

1. Untuk makluman Ahli Yang Berhormat, Kementerian Kewangan (**MOF**) ingin memaklumkan bahawa pengawalseliaan Lembaga Tabung Haji (**TH**) di bawah Bank Negara Malaysia (**BNM**) adalah **satu solusi interim yang tidak akan mengubah sifat asal TH** sebagai agensi unggul khususnya dalam pengurusan jemaah haji bagi menunaikan Rukun Islam yang kelima. TH tetap kekal melaksanakan fungsi Lembaga Tabung Haji sebagaimana termaktub di bawah Akta Tabung Haji 1995 [**Akta 535**].

2. Selain itu, hal ehwal haji masih kekal di bawah tanggungjawab Menteri di Jabatan Perdana Menteri (Hal Ehwal Agama). Dari sudut TH pula, Lembaga Pengarah dan badan pengurusannya tetap mempunyai tanggungjawab utama dalam menentukan hala tuju TH, serta pengurusan dan operasi haji.

3. Usaha kawalselia TH dari sudut **pengambilan deposit, serta pengurusan risiko dan kecairan oleh BNM ini adalah satu solusi interim yang akan dilaksanakan sehingga dapatan Suruhanjaya Siasatan Diraja (RCI)** dibentangkan untuk pertimbangan Kerajaan selanjutnya. Penambahbaikan kawalselia TH adalah selaras dengan hasrat Kerajaan supaya TH kembali kepada mandat asal penubuhannya.

4. MOF sedia maklum akan perbezaan mandat dan peranan TH berbanding institusi perbankan yang lain. Justeru, MOF ingin menegaskan bahawa skop pengawalseliaan BNM pada waktu ini, sementara menunggu selesainya RCI, adalah tertumpu hanya kepada pengambilan deposit, serta pengurusan risiko dan kecairan, **dengan rangka kerja pengawalseliaan yang berbeza dari peraturan am yang dipatuhi oleh institusi perbankan lain.** BNM mempunyai Majlis Penasihat Syariah yang dianggotai oleh para cendekiawan Syariah dan individu yang berpengetahuan, berpengalaman dan turut diiktiraf di peringkat antarabangsa. Dengan memanfaatkan kepakaran majlis ini, persepsi berhubung konsep riba bagi meraih pulangan yang terbaik dari pelbagai pelaburan untuk manfaat pendeposit, tidak akan timbul sama sekali. Kesemua usaha ini adalah bertujuan untuk terus melindungi hak-hak pendeposit dan memastikan segala pelaburan yang dibuat oleh TH adalah berlandaskan prinsip Syariah.

5. **Kawal selia sesebuah institusi yang strategik dan menyentuh hak rakyat adalah penting di atas prinsip semak dan imbang, serta tadbir urus yang berhemah, selaras dengan ketetapan oleh Jawatankuasa Khas Kabinet Mengenai Anti Rasuah.** Prinsip ini bukanlah sesuatu yang baharu dan telah digunapakai secara meluas di Malaysia. Contohnya, Bank Simpanan Nasional dan Bank Kerjasama Rakyat Malaysia Berhad yang mempunyai akta tubuh masing-masing, serta anak syarikat TH sendiri iaitu Bank Islam, yang kesemuanya masih di bawah kawal selia BNM berdasarkan kepentingan sistemik mereka. Solusi interim ini adalah penting untuk melindungi hak dan kepentingan pendeposit sepenuhnya sementara menunggu dapatan RCI dibentangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI ABDUL
KARIM [BATANG LUPAR]**

TARIKH : 29 SEPTEMBER 2021 (RABU)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI PERTANIAN DAN INDUSTRI MAKANAN** menyatakan langkah yang diambil oleh Kementerian bagi mengatasi masalah lambakan hasil pertanian, penternakan dan bahan mentah yang mengakibatkan kerugian besar dihadapi oleh pengusaha kerana tidak dapat menjual hasil mereka semasa penularan wabak COVID-19.

JAWAPAN

Tuan Yang Dipertua,

Penularan pandemik COVID-19 dan pelaksanaan Perintah Kawalan Pergerakan (PKP) sememangnya telah memberi kesan kepada sektor agromakanan negara secara langsung dan tidak langsung di mana kelancaran rantai makanan terganggu antaranya pengeluaran, pengedaran, pemasaran dan peruncitan produk hasil pertanian dan industri makanan.

Kesan pandemik COVID-19 kepada subsektor tanaman menyebabkan saiz penanaman ladang terpaksa dikecilkan, jadual penanaman disusun semula, penjualan hasil tuaian semakin berkurangan serta pertukaran kepada tanaman lain yang boleh memberikan pulangan segera kepada pengusaha. Selain itu masalah

lambakan hasil pertanian, penternakan dan bahan mentah semasa penularan wabak COVID-19 juga berlaku akibat penutupan beberapa sektor ekonomi termasuk premis pemborongan, peruncitan dan sektor hotel, restoran dan katering.

Untuk mengatasi isu tersebut, Kementerian Pertanian dan Industri Makanan (MAFI) bersama agensi-agensi pemasaran dibawahnya telah melaksanakan beberapa langkah bagi membantu petani memasarkan hasil pertanian mereka. Antara langkah utama yang dijalankan termasuklah bantuan khidmat pemasaran, pembukaan Pasar Segar Terkawal (PST), pengukuhan jualan dalam talian, penyediaan insentif pemasaran serta pembangunan infrastuktur logistik dan pemasaran.

Melalui program khidmat pemasaran, FAMA telah membeli sebanyak 34,155 tan metrik tanaman buah-buahan bermusim (durian, cempedak, rambutan), timun, nangka, cili dan tembikai dengan nilai RM136.07 juta bagi tempoh 18 Mac 2020 sehingga 31 Ogos 2021.

Di samping itu, agensi-agensi pemasaran MAFI turut membantu mengaturkan pasaran petani dengan segmen pasaran seperti pasaraya, kedai runcit, kilang pemprosesan dan pemborong. Sehingga 31 Ogos 2021, seramai 1,737 petani telah dibantu dengan nilai jualan berjumlah RM70 juta. LKIM juga telah membantu mengaturkan pasaran sebanyak 13 MT udang harimau yang bernilai RM340,000 bagi mengatasi isu udang harimau tidak terjual di Melaka pada bulan September 2021.

MAFI juga telah membuka PST dan Pasar Nelayan bagi menyediakan ruang pasaran kepada pengeluar untuk memasarkan hasil pengeluaran terus kepada pengguna. Sehingga 31 Ogos 2021 terdapat 84 PST dan 92 Pasar Nelayan di seluruh negara yang telah berjaya memberi manfaat kepada 9,790 pengeluar dan 640 orang nelayan dengan jumlah pengguna seramai 25,390,000 orang.

Dalam masa yang sama, MAFI turut mengatur pelbagai program bagi memperkukuh pemasaran digital sebagai kaedah pemasaran alternatif. Antaranya termasuklah kerjasama strategik

dengan platform e-dagang swasta seperti Shopee, Lazada, AirAsia Farm, Mukmin Mart, Grab dan Foodpanda.

Melalui *online store* Agrobazaar Malaysia di Shopee dan AirAsia Farm, FAMA telah mencatat nilai jualan sebanyak RM675,177 bagi tempoh 16 April 2020 sehingga 31 Ogos 2021. Selain itu, Agrobazaar Online yang diuruskan oleh FAMA telah mencapai nilai jualan sebanyak RM3.17 juta dalam tempoh yang sama. AirAsia Farm turut menjalinkan kerjasama dengan MAFI dalam memasarkan Mangga Harumanis ke Sabah. Melalui kerjasama ini, sebanyak 10 metrik tan Harumanis bernilai RM306,000 telah dapat dipasarkan. Lembaga Kemajuan Ikan Malaysia (LKIM) melalui Pertubuhan Nelayan Kebangsaan (NEKMAT) turut melaksanakan inisiatif pemasaran secara digital melalui laman web nekmatbiz serta media sosial dengan menawarkan perkhidmatan penghantaran pesanan terus ke rumah pengguna. Melalui platform nekmatbiz.com.my, LKIM telah mencatat nilai jualan RM231,540 bagi tempoh Mac 2020 sehingga 31 Ogos 2021.

Melalui inisiatif PRIHATIN, MAFI telah menerima peruntukan untuk menambahbaik infrastruktur pemasaran seperti pusat pengumpulan, pusat pengedaran, bilik sejuk dan depoh penyimpanan. Sebanyak RM6.6 juta peruntukan bagi inisiatif ini telah disalurkan ke Lembaga Perindustrian Nanas Malaysia, RM30 juta ke LKIM dan RM10 juta ke Lembaga Pertubuhan Peladang. Dengan penambahbaikan ini, lebih banyak infrastruktur pemasaran dapat disediakan di seluruh negara untuk memastikan hasil pertanian dapat dipasarkan kepada pengguna dengan lebih berkesan.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB MARIA CHIN BINTI ABDULLAH
[PETALING JAYA]**

TARIKH : 29 SEPTEMBER 2021 (RABU)

SOALAN

PUAN MARIA CHIN BINTI ABDULLAH [PETALING JAYA] minta **MENTERI PEMBANGUNAN WANITA, KELUARGA DAN MASYARAKAT** menyatakan penjelasan berkaitan nisbah pekerja sosial yang sedia ada dan apakah tindakan yang diambil untuk memenuhi kekurangan yang sangat ketara.

JAWAPAN

Tuan Yang di-Pertua,

Bidang Kerja Sosial dipraktikkan merentas pelbagai kementerian, agensi dan Badan Bukan Kerajaan (NGO) malah meliputi individu dalam sektor perkhidmatan kebajikan, pendidikan dan kesihatan. Buat masa ini **tiada statistik rasmi bilangan Pekerja Sosial direkodkan memandangkan tiada satu perundangan dan badan kawal selia (*Regulatory Body*)** yang melaksanakan pendaftaran profesion ini sebagaimana profesion-profesion lain antaranya Pegawai Perubatan, Jururawat, Peguam dan Jurutera.

Pada umumnya, **sehingga Ogos 2021, Kementerian Pembangunan Wanita, Keluarga dan Masyarakat (KPWKM) menerusi Jabatan Kebajikan Masyarakat (JKM) mempunyai bilangan pegawai Skim Sosial (Skim S) seramai 3,814** orang yang memberikan fokus kepada skop tugas pekerja sosial **melibatkan pengurusan kes (*case management*)** kepada kumpulan sasar.

Berdasarkan kajian **oleh Unit Pemodenan Tadbiran dan Perancangan Pengurusan Malaysia (MAMPU) tahun 2019**, nisbah Pekerja Sosial di JKM berbanding populasi penduduk Malaysia adalah **1:8,576** (Seorang Pekerja Sosial di JKM kepada 8,576 orang penduduk Malaysia). Nisbah ini dilihat amat besar jika dibandingkan dengan negara-negara lain seperti **1:490 di Amerika Syarikat, 1:1,040 di Australia, 1:3,025 di United Kingdom.**

KPWKM memberikan komitmen penuh dalam usaha meningkatkan profesionalisme dalam bidang kerja sosial yang sekali gus dapat meningkatkan bilangan pekerja sosial di Malaysia. Antara usaha yang telah dan sedang dilaksanakan adalah:

- i) **Penggubalan Rang Undang-undang Profesion Kerja Sosial.** Justeru sokongan Ahli-ahli Yang Berhormat adalah penting apabila Rang Undang-undang ini dibentangkan di Parlimen kelak;

- ii) **Mengadakan sesi konsultasi dengan semua Kerajaan Negeri,** pekerja sosial dalam sektor awam, sektor pendidikan dan pengamal kerja sosial dalam Badan Bukan Kerajaan (NGO);
- iii) **Pelan Strategik KPWKM 2021 - 2025** di mana salah satu langkah strategik yang dinyatakan dalam dokumen ini adalah untuk menjadikan perkhidmatan kerja sosial sebagai perkhidmatan yang profesional; dan
- iv) **Penglibatan Malaysia secara langsung dalam proses merangka dokumen *Roadmap to Implement Ha Noi Declaration on Strengthening Social Work Towards Cohesive and Responsive ASEAN Community*.** *Roadmap* ini bertujuan untuk dijadikan garis panduan Negara Anggota ASEAN dalam mempromosi kerja sosial serta mempertingkatkan peranan dan kapasiti pekerja sosial dalam pelbagai bidang.

Seterusnya, dalam meningkatkan penglibatan dan penyertaan masyarakat dalam bidang kerja sosial, kerjasama strategik antara pihak KPWKM dengan pihak berkaitan sedang giat dilaksanakan antaranya:

- i) Penawaran **bidang kerja sosial di 8 institusi pengajian tinggi awam** dan 2 institusi pengajian tinggi swasta di Malaysia yang menawarkan pendidikan dari peringkat diploma hingga Doktor Falsafah; dan
- ii) **KPWKM melalui JKM dilantik sebagai *Industry Lead Body (ILB)* oleh Jabatan Pembangunan Kemahiran (JPK),** Kementerian Sumber Manusia (KSM) yang turut menawarkan kursus-kursus melalui Standard Kemahiran Pekerjaan Kebangsaan (NOSS) Kerja Sosial seperti Sijil Kemahiran Malaysia (SKM) Tahap 3, Diploma Kemahiran Malaysia (DKM) Tahap 4 dan Diploma Lanjutan Kemahiran Malaysia (DLKM) Tahap 5 dalam Bidang Kerja Sosial.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' MOHD. NIZAR BIN HAJI
ZAKARIA (PARIT)**

TARIKH : 29 SEPTEMBER 2021 (RABU)

SOALAN

**DATO' MOHD. NIZAR BIN HAJI ZAKARIA (PARIT) minta MENTERI
PENGANGKUTAN menyatakan :-**

- (a) apakah langkah drastik yang telah diambil oleh Kementerian bagi membantu pengusaha bas yang berhadapan situasi gulung tikar akibat daripada sekatan rentas negeri; dan
- (b) adakah terdapat sebarang usaha bagi memastikan pengusaha bas ini mampu bertahan sekiranya larangan rentas negeri masih berterusan.

JAWAPAN

Tuan Yang di-Pertua,

Pihak Kerajaan telah melaksanakan pelbagai usaha untuk membantu semua pemandu kenderaan pengangkutan awam termasuk pengusaha bas yang terkesan akibat pandemik COVID-19.

Mengambil kira cabaran yang dihadapi oleh pihak syarikat dan pemilik kenderaan di dalam keadaan semasa, Kementerian Pengangkutan (MOT) telah memberi kebenaran khas kepada semua kenderaan perkhidmatan awam, tambahan dua (2) tahun secara automatik kepada had usia maksimum untuk didaftarkan atau penggantian, tertakluk kepada kelulusan pemeriksaan PUSPAKOM ke atas kenderaan tersebut. Ini bermakna, mana-mana kenderaan

perkhidmatan pengangkutan awam yang telah mencapai had usia maksimum untuk didaftarkan pada 1 Januari 2020 sehingga 31 Disember 2021 dan perlu diganti, akan diberikan tambahan satu tahun lagi secara automatik.

Dengan pemberian tambahan had usia automatik dua (2) tahun ini, semua pengusaha dan pemilik dapat menangguhkan penggantian kenderaan terbabit untuk dua (2) tahun lagi. Pelanjutan ini melibatkan semua kelas kenderaan perkhidmatan di bawah skop tanggungjawab Agensi Pengangkutan Awam Darat (APAD) serta Lembaga Pelesenan Kenderaan Perdagangan (LPKP) Sabah dan LPKP Sarawak.

Rang Undang-undang (RUU) Langkah-Langkah Sementara Bagi Mengurangkan Kesan Penyakit Koronavirus 2019 (Covid-19) 2020 yang telah diluluskan juga telah dapat membantu semua pengusaha kenderaan pengangkutan awam dan barangan untuk menjana pendapatan tambahan dengan memberi kebenaran untuk menyediakan perkhidmatan lain seperti penghantaran barang/parcel sekiranya tidak membawa penumpang atau sebaliknya. Kelulusan sementara ini hanyalah untuk sepanjang tempoh PKP berkuatkuasa dan bertujuan mewujudkan ruang-ruang tambahan kepada pemandu terlibat untuk mendapatkan pendapatan mereka.

Kerajaan juga telah meneruskan inisiatif pemberian *Interim Stage Bus Support Fund* (ISBSF) [dikenali sebagai Dana Bantuan Sementara Pengusaha Bas Berhenti-Henti (DBSPB) di Sarawak] di seluruh Malaysia untuk tahun 2021 dan 2022 dengan peruntukan sebanyak 105 juta ringgit setahun. Di bawah inisiatif ini kerajaan akan menanggung kerugian kos operasi pengendali bas berhenti-henti sedia ada bagi memastikan perkhidmatan kekal disediakan untuk kemudahan rakyat.

Bagi perkhidmatan bas berhenti-henti di bawah inisiatif *Stage Bus Service Transformation* (SBST) pula peruntukan sebanyak 48 juta setahun disediakan untuk memastikan perkhidmatan dengan jenama myBAS ini terus kekal beroperasi di Seremban, Ipoh, Kuala Terengganu dan Perlis malah akan diperluaskan ke Johor Bahru, Kota Bahru, Kuching dan Kota Kinabalu.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI ABDUL AZEEZ BIN ABDUL
RAHIM [BALING]**

TARIKH : 29 SEPTEMBER 2021 (RABU)

SOALAN

minta **MENTERI KOMUNIKASI DAN MULTIMEDIA** menyatakan status menara-menara komunikasi di bawah Projek Jalinan Digital Negara (JENDELA) yang dikatakan masih dalam peringkat pelaksanaan di kawasan luar bandar.

JAWAPAN

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (MCMC) telah membuat perancangan dan kini sedang melaksanakan pelan pembangunan infrastruktur komunikasi yang dinamakan **Jalinan Digital Negara (JENDELA)** bertujuan untuk menambah baik perkhidmatan komunikasi demi kehidupan rakyat dari aspek sosio-ekonomi, pendidikan dan perkhidmatan kerajaan.

Pelaksanaan pelan JENDELA Fasa 1 yang bermula pada September 2020 memberi fokus kepada peluasan liputan gentian optik dan pembangunan infrastruktur digital termasuk pembinaan tapak 4G baharu dan menaiktaraf stesen pemancar sedia ada kepada 4G bagi meningkatkan liputan dan kualiti perkhidmatan 4G di seluruh negara. Pencapaian JENDELA suku kedua 2021 adalah seperti berikut:

- a. Penambahan sebanyak 1.1 juta premis daripada 4.95 juta premis yang menjadikan jumlah keseluruhan sebanyak 6.05 juta premis di seluruh negara telah disediakan dengan akses gentian optik;
- b. Kelajuan jalur lebar mudah alih meningkat daripada 25Mbps kepada 26.03Mbps;
- c. Peluasan liputan jalur lebar mudah alih 4G daripada 91.8% kepada 94.03% di kawasan berpenduduk; dan
- d. hampir 1 juta pelanggan 3G sedia ada telah beralih kepada 4G dan lebih 39,000 rangkaian 3G telah ditutup untuk menambahbaik liputan dan kualiti perkhidmatan teknologi 4G.

Pelaksanaan JENDELA bukan sahaja tertumpu di kawasan-kawasan bandar, malah turut mengambilkira penyediaan infrastruktur digital di kawasan-kawasan luar bandar yang menggunakan peruntukan komersil dan pihak Kerajaan. Sehingga 31 Ogos 2021, sebanyak 693 stesen pemancar telah siap dinaiktaraf kepada teknologi 4G di seluruh negara. Manakala, sebanyak 362 menara baharu akan dibina menjelang penghujung 2022 yang akan meningkatkan kadar liputan 4G di kawasan berpenduduk di seluruh negara.

Selain itu, sebanyak 1,661 menara baharu akan dibina di kawasan-kawasan luar bandar di seluruh negara dengan pelantikan Penyedia Perkhidmatan Sejagat yang Dilantik atau *Designated Universal Service Provider* untuk melonjakkan lagi kadar liputan 4G kepada 96.9% di kawasan berpenduduk di seluruh Malaysia. Kerja-kerja pembinaan menara dijangka dapat dimulakan pada suku pertama tahun 2022.

Kawasan-kawasan pedalaman di Sabah dan Sarawak serta perkampungan Orang Asli turut diberi keutamaan melalui penyediaan perkhidmatan jalur lebar menggunakan teknologi satelit. Bagi tujuan ini, sebanyak 839 lokasi di seluruh negara telah dikenalpasti bagi memastikan ianya dapat memberikan liputan jalur lebar di kawasan-kawasan yang sukar diakses dengan teknologi gentian optik dan mudah

alih. Inisiatif ini dijangka bermula pada penghujung tahun 2021 dan disiapkan pada awal tahun 2022.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan.

Menerusi portal *JENDELA Map* (<https://jendela.my>) yang telah dilancarkan pada Julai lepas, maklumat yang diperoleh daripada pengguna secara terus secara sumber khalayak atau *crowdsourcing*, dapat digunakan sebagai maklumat bagi membuat perancangan penambahbahbaikan liputan dan kualiti perkhidmatan jalur lebar dari semasa ke semasa.

Kerjasama serta komitmen Kerajaan Negeri dan semua pihak adalah penting bagi memastikan kesemua cadangan dasar yang telah diluluskan di peringkat pusat, dapat diaplikasikan di peringkat negeri dan PBT agar penyediaan infrastruktur digital dapat dimudahcara serta mengikut piawaian yang tertentu bagi memastikan Aspirasi Nasional dapat dicapai.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN TUN
DR. MAHATHIR [JERLUN]**

TARIKH : 29 SEPTEMBER 2021 (RABU)

SOALAN

DATO' SERI UTAMA HAJI MUKHRIZ BIN TUN DR. MAHATHIR minta **MENTERI KANAN PENDIDIKAN** menyatakan status terkini peperiksaan utama negara akibat daripada peningkatan kes COVID-19 yang melanda negara:-

- (a) bagaimana persediaan sekolah-sekolah untuk para calon memandangkan penangguhan pembukaan sekolah hingga Oktober depan; dan
- (b) berapa kes COVID-19 yang melibatkan pelajar sekolah rendah dan menengah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited melakukan yang terbaik demi generasi masa depan negara. Walaupun berhadapan dengan situasi pandemik COVID-19 yang sangat mencabar, peperiksaan Sijil Pelajaran Malaysia (SPM) dan Sijil Tinggi Agama Malaysia (STAM) kendalian Lembaga Peperiksaan (LP) serta peperiksaan Sijil Tinggi Persekolahan Malaysia (STPM) kendalian Majlis Peperiksaan Malaysia (MPM) untuk tahun 2021 akan tetap dilaksanakan.

SOALAN NO : 23

Peperiksaan bertulis SPM dan STAM 2021 akan dilaksanakan pada bulan Mac 2022. Manakala, peperiksaan Semester 2 STPM 2021 akan dilaksanakan pada 25 hingga 28 Oktober 2021.

Pengurusan pengendalian peperiksaan SPM, STAM dan STPM 2021 adalah berpandukan kepada Garis Panduan Pengurusan Pentaksiran Pusat dan Peperiksaan Awam yang terkandung dalam Garis Panduan Pengurusan dan Pengoperasian Sekolah 3.0 dikeluarkan oleh KPM. Garis panduan ini merupakan rujukan kepada pegawai bahagian di KPM, jabatan pendidikan negeri (JPN), pejabat pendidikan daerah (PPD), pentadbir serta guru di sekolah, ibu bapa dan pihak yang terlibat tentang pengoperasian sekolah termasuk pengurusan pengendalian peperiksaan awam.

KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi persekolahan ini membolehkan guru dan pihak sekolah merancang serta melaksanakan intervensi, pengukuhan dan pengayaan secara intensif, termasuklah kepada calon SPM dan STAM 2021. Pelanjutan ini juga, akan memberi peluang kepada calon SPM dan STAM 2021 untuk membuat persediaan rapi bagi menghadapi peperiksaan.

KPM juga telah mengumumkan bahawa sekolah akan dibuka untuk pengajaran dan pembelajaran (PdP) secara bersemuka mulai 3 Oktober 2021 bagi negeri kumpulan A dan 4 Oktober 2021 bagi negeri kumpulan B. Pembukaan sekolah akan dibuat secara berperingkat mengikut fasa dalam Pelan Pemulihan Negara (PPN) dengan memberi keutamaan kepada murid kelas peperiksaan.

Murid Semester 2 STPM 2021 yang bakal menduduki peperiksaan pada 25 hingga 28 Oktober 2021 boleh mengikuti sesi pengajaran dan pembelajaran secara bersemuka mulai 3 Oktober 2021. Ini memberi peluang kepada guru untuk memberi bimbingan secara intensif kepada calon sebelum mereka menduduki peperiksaan.

Bagi membantu calon peperiksaan SPM dan STAM 2021 membuat persediaan menghadapi peperiksaan, KPM menyediakan siaran TV Pendidikan melalui saluran DidikTV KPM, TV Okey RTM dan Tutor TV Astro. Rancangan seperti *Road to Success* dan SUKSES SPM 2021 dapat membantu mereka menguasai kandungan kurikulum sebelum menduduki peperiksaan.

KPM turut menambah lebih banyak bahan PdP melalui pelantar *Digital Educational Learning Initiative Malaysia* (DELIMa). Rancangan yang berfokus kepada persediaan calon menghadapi peperiksaan SPM akan terus ditingkatkan terutama penerangan mengenai format pentaksiran peperiksaan SPM mulai tahun 2021 dan ujian amali sains.

Bagi calon yang tidak mempunyai akses internet atau peranti yang sesuai, guru mengambil inisiatif untuk menyediakan modul pembelajaran dan membuat serahan bahan tersebut kepada calon. KPM yakin bahawa usaha-usaha ini akan dapat memastikan calon peperiksaan SPM, STAM dan STPM 2021 mempunyai ruang dan peluang untuk membuat persiapan rapi sebelum menduduki peperiksaan.

Untuk makluman Ahli Yang Berhormat, berkenaan dengan kes COVID-19 yang melibatkan murid sekolah, jumlah kumulatif kes COVID-19 semasa sesi persekolahan yang berlangsung dari 20 Januari hingga 7 Mei 2021 adalah sebanyak 8,269. Daripada jumlah ini, sebanyak 4,086 kes melibatkan murid sekolah rendah dan 4,173 kes melibatkan murid sekolah menengah. Dalam hal ini, KPM sentiasa membuat perancangan teliti bagi memastikan pengoperasian sekolah secara bersemuka berjalan dengan teratur dan selamat.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
(PULAI)**

TARIKH : 29 SEPTEMBER 2021 (RABU)

SOALAN

DATUK SERI HAJI SALAHUDDIN BIN AYUB [PULAI] minta **MENTERI PERTANIAN DAN INDUSTRI MAKANAN** menyatakan apakah langkah Kementerian bagi meningkatkan pendapatan para petani yang terjejas jualan tanaman akibat sekatan merentas negeri.

JAWAPAN

Tuan Yang Di Pertua

Penularan pandemik COVID-19 dan pelaksanaan Perintah Kawalan Pergerakan (PKP) sememangnya telah memberi kesan kepada sektor agromakanan negara secara langsung dan tidak langsung di mana kelancaran rantai makanan terganggu antaranya pengeluaran, pengedaran, pemasaran dan peruncitan produk hasil pertanian dan industri makanan.

Bagi membantu golongan petani yang terjejas dan terus menggalakkan aktiviti pertanian dijalankan semasa pandemik, MAFI telah diperuntukkan Dana Jaminan Makanan (DJM) sebanyak RM1 bilion pada 27 Mac 2020. Jumlah ini tidak termasuk pelaksanaan Pakej Rangsangan Ekonomi (PRE) 2020 sebanyak RM50 juta yang merangkumi 918 perolehan dan projek kecil di seluruh negara bagi merangsang perniagaan kontraktor Bumiputera yang terkesan dengan kelembapan ekonomi yang disebabkan oleh kesan awal pandemik COVID-19 pada ketika itu.

Manakala DJM merangkumi pakej Pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) dan juga sebahagian Projek Khas Belanjawan 2021. Penyediaan DJM ini merupakan langkah intervensi untuk membantu pengusaha pertanian dengan segera, serta secara tidak langsung telah menyuntik dana untuk mengaktifkan kembali rantai ekonomi agromakanan bermula daripada pengeluar sehinggalah ke peringkat hiliran dan runcit.

Selain daripada bantuan-bantuan dan inisiatif menerusi Dana Jaminan Makanan dan Pakej Rangsangan Ekonomi yang diberikan, Kementerian ini melalui Jabatan dan agensi terlibat membantu kumpulan sasaran yang terjejas akibat dari pandemik COVID-19 ini seperti berikut:

- i. Program Bakul Makanan di bawah program MAFI Prihatin yang memberi sumbangan berbentuk makanan bagi meringankan bebanan golongan yang terjejas akibat pandemik COVID 19.

SOALAN NO: 24

Seramai 86,246 penerima di 326 lokasi seluruh negara telah menerima manfaat yang disampaikan melalui pelbagai jabatan dan agensi kementerian pada tahun ini sehingga Julai 2021;

- ii. Sebanyak 35,681 surat kelulusan kebenaran beroperasi telah dikeluarkan semasa tempoh pandemik bagi tempoh Januari hingga Ogos 2021 bagi memastikan pengeluaran hasil dan rantai nilai makanan tidak terjejas memandangkan aktiviti pertanian juga telah dikategorikan sebagai perkhidmatan penting negara (*essential services*) dan dibenarkan beroperasi sepanjang masa;
- iii. Sebanyak 48,281 latihan secara atas talian telah dibuat bagi meningkatkan kemahiran dan khidmat nasihat sama ada melalui panggilan telefon, panggilan video, webinar serta melalui platform media sosial seperti facebook dan aplikasi whatsapp yang melibatkan 50,182 petani dan 436,487 pengunjung melalui media sosial;
- iv. Platform pemasaran digital (e-dagang) bagi membantu meningkatkan ruang pemasaran para petani dan pengusaha melalui platform e-dagang seperti Agrobazaar Online dan NekmatBiz serta kerjasama strategik dengan syarikat swasta seperti Lazada, Shopee dan AirAsia;
- v. Projek Rezeki Ternak dengan jumlah RM1.94 juta telah dibelanjakan pada tahun 2020 melibatkan 1,398 penternak, manakala sejumlah RM0.96 juta diperuntukkan untuk tahun 2021;
- vi. Program Pembangunan Industri Ruminan (PROPER) yang melibatkan bantuan geran pemadanan 70% kerajaan dan 30% penternak dan berjaya mengagihkannya 252 ekor bebiri kepada 12 orang penternak dan 286 ekor lembu kepada 13 orang penternak pada tahun 2020;

SOALAN NO: 24

- vii. Program Peningkatan Pengeluaran Tenusu Negara berjumlah RM4.0 juta diperuntukkan secara geran pepadanan 30% Kerajaan dan 70% secara agihan lembu tenusu dara bunting kacukan Friesian dari Australia dan beserta peralatan;
- viii. Pemberian kadar bayaran sewaan premis kerajaan sebanyak 50% kepada pengusaha di semua kemudahan Ladang Satelit di Taman Kekal Pengeluaran Ruminan (TKPR) dan operator swasta di rumah sembelih serta program;
- ix. Memberikan penangguhan pembaharuan semua lesen vesel penangkapan ikan sehingga 1 Oktober 2021 serta meneruskan pemberian Elaun Sara Hidup Nelayan Laut dan Darat dengan kadar yang telah ditingkatkan;
- x. Memberikan pengecualian syarat minimum pendaratan ikan melalui Laporan Operasi Vesel (LOV) dan purata keaktifan *Mobile Transducer Unit* (MTU) untuk pembaharuan lesen vesel penangkapan ikan laut dalam Zon C2; dan
- xi. Program Geran Pepadanan *Change Upgrade Products* (CUP) bagi aktiviti ekonomi hiliran dalam sektor agromakanan yang memanfaatkan seramai 154 orang pengusaha industri asas tani pada tahun 2020 dengan peruntukan bernilai RM4 juta, manakala pada tahun 2021, sehingga kini seramai 141 pengusaha telah menerima manfaat dengan peruntukan bernilai RM4.4 juta.

Kementerian berharap agar inisiatif-inisiatif termasuk program dan projek serta bantuan khas yang dilaksanakan dapat membantu para petani, nelayan dan penternak serta pengusaha agromakanan yang terjejas disebabkan COVID-19 pandemik dalam meneruskan kelangsungan perusahaan masing-masing dan memberikan sumber pendapatan yang mampan. MAFI akan terus mengambil segala tindakan bagi memastikan kepentingan kumpulan sasar sektor agromakanan terus terjamin.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN CHOW KON YEOW [TANJONG]

TARIKH : 29 SEPTEMBER 2021 (RABU)

SOALAN

minta **MENTERI KOMUNIKASI DAN MULTIMEDIA** menyatakan bilakah 5G di Pulau Pinang akan dilaksanakan serta diperluaskan ke kawasan industri seperti Zon Perindustrian Perai, Zon Perindustrian Bebas Bayan Lepas dan Kawasan Perindustrian Batu Kawan yang memerlukan jaringan komunikasi yang lebih pantas bagi memanfaatkan IR4.0.

JAWAPAN

Tuan Yang Dipertua,

Untuk makluman Ahli Yang Berhormat, pelaksanaan rangkaian 5G di Malaysia telah dipertanggungjawabkan kepada entiti milik Kerajaan sepenuhnya, iaitu Digital Nasional Berhad (DNB) yang merupakan satu syarikat tujuan khas (SPV) di bawah Menteri Kewangan Diperbadankan.

DNB akan membangunkan rangkaian 5G dan memberikan perkhidmatan 5G secara pukal kepada pengendali perkhidmatan lain Pendekatan penyedia tunggal ini membolehkan penyedia-penyedia perkhidmatan 4G sedia ada terus menumpukan pelaburan kepada penaiktarafan infrastruktur dan rangkaian 4G dan gentian optik untuk manfaat pengguna. Pendekatan ini juga memastikan bahawa pelaksanaan 5G dapat diawalkan, bermula hujung tahun 2021.

Untuk makluman Ahli Yang Berhormat, pembangunan rangkaian 5G akan dijalankan secara berperingkat bermula penghujung 2021 di Putrajaya, Cyberjaya dan Kuala Lumpur. Ia akan diperluaskan ke kawasan lain di seluruh negara, termasuk Pulau Pinang bermula tahun 2022.

Untuk makluman Ahli Yang Berhormat juga, rangkaian komunikasi gentian optik berkelajuan tinggi sehingga 1Gbps di kawasan-kawasan industri seperti Zon Perindustrian Perai, Zon Perindustrian Bebas Bayan Lepas dan Kawasan Perindustrian Batu Kawan, telah tersedia untuk menyokong IR4.0 hasil pelaburan syarikat-syarikat telekomunikasi seperti TM dan Time. Selain itu, Kementerian Perdagangan Antarabangsa dan Industri, Kementerian Komunikasi dan Multimedia dan Suruhanjaya Komunikasi dan Multimedia Malaysia turut bekerjasama melaksanakan projek peluasan rangkaian gentian optik di beberapa kawasan perindustrian terpilih seperti Kawasan Perindustrian Bukit Minyak dan Kawasan Perindustrian Valdor.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATUK SERI HAJI AHMAD BIN HAJI MASLAN
[PONTIAN]**

TARIKH : 29 SEPTEMBER 2021 (RABU)

SOALAN

DATUK SERI HAJI AHMAD BIN HAJI MASLAN [PONTIAN] minta **MENTERI KEWANGAN** menyatakan jumlah hutang Kerajaan dan kadar defisit yang dihadapi negara ketika ini dan apakah kaedah-kaedah yang perlu diambil untuk meringankan hutang negara, menambah pendapatan negara dan memastikan ekonomi tumbuh dengan baik.

JAWAPAN

Tuan Yang di-Pertua,

1. Dalam Belanjawan 2021, defisit fiskal tahun 2021 telah diunjurkan sebanyak 5.4% berbanding KDNK berdasarkan jangkaan ekonomi akan berkembang pada kadar 6% hingga 7.5%. Walau bagaimanapun, susulan gelombang ketiga penularan wabak COVID-19, Kerajaan telah melaksanakan semula Perintah Kawalan Pergerakan (PKP) bagi membendung penularan wabak COVID-19. Kerajaan juga telah memperkenalkan beberapa pakej bantuan tambahan seperti PERMAI, PEMERKASA, PEMERKASA+ dan PEMULIH bagi mengurangkan kesan PKP terhadap kehidupan rakyat dan kelangsungan perniagaan. Justeru, setelah mengambil kira kesan pelaksanaan PKP dan suntikan fiskal terhadap pakej-pakej tersebut, paras defisit fiskal 2021 telah disemak semula dan dijangka akan meningkat kepada sekitar 6.5% hingga 7% daripada KDNK.

2. Semakan paras defisit fiskal tersebut mengambil kira kutipan hasil Kerajaan Persekutuan yang berkurangan berikutan pelaksanaan PKP dan beberapa langkah percukaian. Walau bagaimanapun, pengurangan hasil tersebut akan ditampung oleh tambahan dividen daripada syarikat berkaitan kerajaan dan kutipan hasil yang lebih baik daripada sumber berasaskan komoditi seperti petroleum dan minyak sawit mentah. Dari konteks perbelanjaan pula, perbelanjaan mengurus (atau OE) dan perbelanjaan pembangunan (atau DE) disusun semula mengikut keutamaan bagi menampung pakej bantuan yang telah diumumkan.

Tuan Yang di-Pertua,

3. Sehingga akhir-Julai 2021, hutang Kerajaan Persekutuan berjumlah 957.3 bilion ringgit atau 62.8% daripada KDNK. Dalam pengurusan hutang, Kerajaan sentiasa mematuhi had statutori hutang yang ditetapkan dalam Akta berkaitan hutang mengikut jenis instrumen. Nisbah hutang Kerajaan Persekutuan yang merangkumi instrumen Sekuriti Kerajaan Malaysia (MGS), Terbitan Pelaburan Kerajaan Malaysia (MGII) dan Bil Perbendaharaan Islam Malaysia (MITB), kesemuanya mencatat 58.7% daripada KDNK, iaitu masih di bawah had statutori 60% KDNK yang ditetapkan dalam Akta Langkah-Langkah Sementara bagi Pembiayaan Kerajaan (Penyakit Koronavirus 2019 (COVID-19)) 2020. Selain itu, hutang Bil Perbendaharaan Malaysia (MTB) pada akhir-Julai 2021 berjumlah 8 bilion ringgit, tidak melebihi had 10 bilion ringgit yang ditetapkan di bawah Akta Bil Perbendaharaan (Tempatan) 1946. Hutang luar pesisir berjumlah 31 bilion ringgit pula, masih di bawah had 35 bilion ringgit yang ditetapkan dalam Akta Pinjaman Luar Negeri (1963).

4. Antara langkah yang akan diambil untuk meringankan beban hutang Kerajaan ialah melaksanakan reformasi fiskal. Ini termasuklah antara lain cadangan penggubalan Akta Tanggungjawab Fiskal dan Rangka Kerja Fiskal Jangka Sederhana untuk memacu langkah konsolidasi fiskal pasca krisis. Inisiatif ini akan mewujudkan ruang fiskal yang mencukupi dan memastikan hutang negara sentiasa berada pada paras terurus dalam tempoh jangka sederhana dan jangka panjang.

5. Selain itu, Kerajaan akan terus berusaha memperkukuh dan memaksimum kutipan hasil Kerajaan Persekutuan serta meningkatkan

keapungan cukai melalui inisiatif pembaharuan cukai. Antara langkah yang diumumkan semasa Belanjawan 2021 adalah cukai ke atas rokok elektronik dan vape serta penubuhan *Multi-Agency Task Force* dengan penyertaan Suruhanjaya Pencegahan Rasuah Malaysia dan Pusat Pencegahan Jenayah Kewangan Nasional bagi menambah baik kutipan hasil melalui pembasmian aktiviti penyeludupan terutama barangan berduti tinggi.

6. Kerajaan juga akan menggubal Strategi Hasil Jangka Sederhana dengan mengkaji dan menambah baik sistem percukaian sedia ada, memperluas asas hasil, memanfaatkan potensi sektor tidak formal, mengurangkan amalan terkurang lapor dan isytihar, mengurangkan ketirisan cukai serta menambah baik pentadbiran cukai melalui pengurusan data yang berkesan dan mengintegrasikan data dengan agensi berkaitan.

Tuan Yang di-Pertua,

7. Kerajaan telah melaksanakan Pelan Pemulihan Negara (PPN) pada Jun 2021 sebagai pendekatan menyeluruh untuk membawa negara keluar dari kancah COVID-19. Namun, pelaksanaan semula langkah pembendungan penularan wabak yang lebih ketat telah menjejaskan momentum pertumbuhan ekonomi tahun 2021 setelah mencatat pertumbuhan yang menggalakkan sebanyak 16.1% pada suku kedua 2021. Justeru, unjuran pertumbuhan ekonomi tahun 2021 telah disemak semula pada bulan Ogos 2021 kepada antara 3.0% hingga 4.0% berbanding anggaran awal iaitu antara 6.0% hingga 7.5% pada bulan Mac 2021. Anggaran pertumbuhan ini adalah berdasarkan andaian pembukaan semula sektor ekonomi dan sosial pada suku keempat 2021 berikutan kemajuan dan keberkesanan pelaksanaan program imunisasi COVID-19 yang memberangsangkan. Kemajuan kadar vaksinasi negara terkini yang amat memberangsangkan dijangka turut mendorong sentimen positif dalam kalangan perniagaan dan pengguna.

8. Bagi melindungi nyawa dan kehidupan rakyat serta mengurangkan kesan pandemik ke atas ekonomi, Kerajaan telah melaksanakan lapan pakej rangsangan dan bantuan bernilai 530 bilion ringgit sejak tahun 2020 dan dilengkapi oleh Belanjawan 2021 bernilai 322.5 bilion ringgit. Melalui

pakej-pakej dan inisiatif Belanjawan 2021 tersebut, lebih daripada 300 bilion ringgit masih tersedia untuk tahun ini bagi menyokong pemulihan ekonomi sepanjang pelaksanaan pelbagai fasa PPN. Faktor-faktor lain yang mendorong pemulihan ekonomi Malaysia adalah peningkatan permintaan luar khususnya daripada rakan dagangan utama terutamanya dari China, Singapura dan Amerika Syarikat, pemulihan harga komoditi terutamanya minyak mentah Brent yang meningkat kepada US Dollar 70 secara purata pada bulan Ogos 2021 berbanding US Dollar 42 pada tahun 2020, peralihan kepada digitalisasi serta pelaksanaan projek infrastruktur dengan kesan pengganda yang tinggi.

9. Melangkah ke hadapan, dengan pelancaran Dasar Revolusi Perindustrian Keempat Negara (4IR), pendigitalan dan penggunaan teknologi akan menjadi keutamaan untuk meningkatkan prospek dan daya tahan ekonomi jangka panjang Malaysia, selaras dengan Rangka Tindakan Ekonomi Digital Malaysia (MyDigital). Selain itu, dasar ini juga adalah seiring dengan pembaharuan struktur yang sedang dilaksanakan oleh Kerajaan dalam jangka masa sederhana termasuk melalui pelaksanaan kerangka kerja Aspirasi Pelaburan Nasional (NIA), dan juga inisiatif PERKUKUH Pelaburan Rakyat. Selain itu, Rancangan Malaysia Kedua Belas, 2021 – 2025, akan menyediakan rangka tindakan untuk memastikan pertumbuhan mampan, keterangkuman sosio-ekonomi dan kelestarian alam sekitar dalam jangka sederhana.

10. Selaras dengan Bajet 2022 yang bakal dibentangkan pada Oktober 2021 kelak, Kementerian Kewangan sedang mengadakan sesi libat urus dengan semua pihak berkepentingan. Langkah ini adalah bertepatan dengan konsep Keluarga Malaysia dalam merangka strategi untuk memastikan Malaysia mampu keluar sepenuhnya daripada krisis ekonomi dan kesihatan ini pada tahun 2022, seterusnya kembali kepada trend pertumbuhan KDNK seperti dalam tempoh pra-pandemik.

Nota: Bagi tujuan pengiraan paras hutang kepada KDNK, nilai KDNK nominal (disemak) adalah 1,524.106 bilion ringgit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN CHA KEE CHIN [RASAH]
TARIKH : 29 SEPTEMBER 2021 (RABU)

SOALAN

TUAN CHA KEE CHIN [RASAH] minta **MENTERI KEWANGAN** menyatakan peratus peminjam bank yang telah diluluskan permohonan mereka dan nilai keseluruhan yang terlibat dalam pelaksanaan Moratorium di bawah Pakej PEMULIH kali ini. Sama ada terdapat aduan daripada peminjam bahawa permohonan untuk moratorium telah ditolak oleh bank.

JAWAPAN

Tuan Yang Di-Pertua,

1. Kerajaan telah memberikan kemudahan moratorium secara menyeluruh ke atas pinjaman bank sebagai sebahagian daripada langkah Pakej Rangsangan Ekonomi Prihatin Rakyat (atau PRIHATIN), PEMERKASA Tambahan dan PEMULIH untuk membantu meringankan beban kewangan rakyat dan perniagaan.
2. Sehingga kini, nilai pinjaman terkumpul moratorium dianggar berjumlah 452.5 bilion ringgit, dengan 101.4 bilion ringgit kepada PKS dan 351.1 bilion ringgit kepada peminjam individu. Seramai 2.6 juta peminjam telah menikmati kemudahan ini, yang terdiri daripada 2.5 juta peminjam individu dan 81,100 PKS.
3. Kadar kelulusan bantuan moratorium kepada peminjam adalah 99 peratus sejak Julai 2021. Peminjam hanya perlu menghubungi bank untuk membuat permohonan bantuan bayaran balik pinjaman dan kelulusan akan diberikan secara automatik kepada peminjam yang layak tanpa perlu mengemukakan bukti kelayakan atau dokumen sokongan.

4. Bagi peminjam yang menghadapi situasi yang lebih mencabar atau mereka yang mempunyai pinjaman di beberapa bank, mereka boleh merujuk kepada Agensi Kaunseling dan Pengurusan Kredit (atau AKPK) untuk mendapatkan khidmat nasihat mengenai bayaran balik pinjaman.

5. Sekiranya peminjam menghadapi kesukaran semasa berurusan dengan pihak bank atau permohonan bantuan bayaran balik pinjaman ditolak, mereka boleh menghubungi Bank Negara Malaysia secara terus melalui BNM TELELINK. Sebagai makluman, jumlah aduan yang diterima melalui BNM TELELINK adalah pada kadar yang agak rendah sepanjang tempoh PEMULIH (antara Jun hingga Ogos 2021), iaitu 0.46 peratus daripada jumlah permohonan yang diluluskan.

Tuan Yang Di-Pertua,

6. Kerajaan juga ingin menekankan bahawa bantuan bayaran balik pinjaman terus disediakan kepada mereka yang terjejas, dengan hampir kesemua permohonan bantuan bayaran balik pinjaman diluluskan oleh bank. Permohonan masih dibuka kepada peminjam yang memerlukan dan mereka hanya perlu menghubungi bank masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 29 SEPTEMBER 2021 (RABU)

SOALAN

PUAN ALICE LAU KIONG YIENG [LANANG] minta **MENTERI KEWANGAN** menyatakan :-

(a) jumlah hutang negara dan liabiliti sebenar Kerajaan pada tahun 2018, 2019, 2020 dan 2021 (terkini); dan

(b) langkah-langkah untuk memulihkan ekonomi serta meningkatkan hasil pendapatan negara susulan impak wabak COVID-19.

JAWAPAN

Tuan Yang di-Pertua,

1. Sehingga akhir Jun 2021, hutang Kerajaan Persekutuan mencatat 958.4 bilion ringgit atau 62.9% berbanding KDNK. Daripada jumlah ini, hutang statutori adalah sebanyak 890.7 bilion ringgit atau 58.4% berbanding KDNK, iaitu masih di bawah had statutori 60%. Selain daripada hutang Kerajaan Persekutuan, Kerajaan juga menanggung komitmen liabiliti lain seperti komitmen jaminan hutang syarikat berkaitan Kerajaan yang diberi peruntukan untuk pelaksanaan pelbagai projek infrastruktur dan utiliti awam, hutang prinsipal syarikat 1Malaysia Development Berhad (atau 1MDB) serta liabiliti kewangan lain yang meliputi projek kerjasama awam swasta (atau PPP) dan projek di bawah inisiatif pembiayaan swasta (atau PFI) dan PBLT Sdn. Bhd.. Kedudukan pendedahan hutang dan liabiliti Kerajaan meningkat daripada 1,090.8 bilion ringgit pada 2018, kepada 1,169.2 bilion ringgit pada 2019 dan 1,268.2 bilion ringgit pada 2020. Setakat akhir Jun 2021, kedudukan pendedahan ini dianggarkan berjumlah 1,333.3 bilion ringgit atau 87.5% berbanding KDNK.

2. Kerajaan telah melaksanakan Pelan Pemulihan Negara (PPN) pada Jun 2021 sebagai pendekatan menyeluruh untuk membawa negara keluar dari kancah krisis COVID-19. Namun, pelaksanaan semula langkah pembendungan penularan wabak yang lebih ketat telah menjejaskan momentum pertumbuhan ekonomi tahun 2021. Walaupun ekonomi mencatat pertumbuhan yang menggalakkan sebanyak 16.1% pada suku kedua 2021. Unjuran pertumbuhan ekonomi tahun 2021 telah disemak semula kepada antara 3.0% hingga 4.0% berbanding anggaran awal iaitu antara 6.0% hingga 7.5% pada bulan Mac 2021. Semakan pertumbuhan ini adalah berdasarkan andaian pembukaan semula sektor ekonomi dan sosial pada suku keempat 2021 berikutan kemajuan dan keberkesanan pelaksanaan program imunisasi COVID-19 yang memberangsangkan yang dijangka turut mendorong sentimen positif dalam kalangan perniagaan dan pengguna.

3. Bagi melindungi nyawa dan kehidupan rakyat serta mengurangkan kesan pandemik ke atas ekonomi, Kerajaan telah melaksanakan lapan pakej rangsangan dan bantuan bernilai 530 bilion ringgit sejak tahun 2020 dan dilengkapi oleh Belanjawan 2021 bernilai 322.5 bilion ringgit. Melalui pakej-pakej dan inisiatif Belanjawan 2021 tersebut, lebih daripada 300 bilion ringgit masih tersedia untuk tahun ini bagi menyokong pemulihan ekonomi sepanjang pelaksanaan pelbagai fasa PPN. Faktor-faktor lain yang mendorong pemulihan ekonomi Malaysia adalah peningkatan permintaan luar khususnya daripada rakan dagangan utama terutamanya dari China, Singapura dan Amerika Syarikat, pemulihan harga komoditi terutamanya minyak mentah, peralihan kepada ekonomi digital serta pelaksanaan projek infrastruktur dengan kesan pengganda yang tinggi.

4. Melangkah ke hadapan, dengan pelancaran Dasar Revolusi Perindustrian Keempat Negara (atau 4IR), pendigitalan dan penggunaan teknologi akan menjadi keutamaan untuk meningkatkan prospek dan daya tahan ekonomi jangka panjang Malaysia, selaras dengan Rangka Tindakan Ekonomi Digital Malaysia (atau MyDigital). Selain itu, dasar ini juga adalah seiring dengan pembaharuan struktur yang sedang dilaksanakan oleh Kerajaan dalam jangka masa sederhana termasuk melalui pelaksanaan kerangka kerja Aspirasi Pelaburan Nasional (NIA), dan juga inisiatif PERKUKUH Pelaburan Rakyat. Selain itu, Rancangan Malaysia Kedua Belas, 2021-2025, akan menyediakan rangka tindakan untuk memastikan pertumbuhan mampan, keterangkuman sosio-ekonomi dan kelestarian alam sekitar dalam jangka sederhana. Kesemua dasar dan rangka tindakan tersebut juga adalah sejajar dengan matlamat Wawasan Kemakmuran Bersama 2030.

Tuan Yang di-Pertua,

5. Kerajaan juga akan terus berusaha memperkukuh dan memaksimum kutipan hasil Kerajaan Persekutuan serta meningkatkan keapungan cukai melalui inisiatif pembaharuan cukai. Antara langkah pengenaan cukai ke atas rokok elektronik dan vape serta penubuhan pasukan petugas pelbagai agensi dengan penyertaan Suruhanjaya Pencegahan Rasuah Malaysia dan Pusat Pencegahan Jenayah

Kewangan Nasional bagi menambah baik kutipan hasil melalui pembasmian aktiviti penyeludupan terutama barangan berduti tinggi.

6. Kerajaan juga akan menggubal Strategi Hasil Jangka Sederhana dengan mengkaji dan menambah baik sistem percukaian sedia ada, memperluas asas hasil, memanfaatkan potensi sektor tidak formal, mengurangkan amalan terkurang lapor dan isytihar, mengurangkan ketirisan cukai serta menambah baik pentadbiran cukai melalui pengurusan data yang berkesan dan mengintegrasikan data dengan agensi berkaitan.

7. Kesemua langkah ini berperanan memastikan Malaysia keluar sepenuhnya daripada krisis berkembar ekonomi dan kesihatan ini dan seterusnya kembali kepada trend pertumbuhan KDNK seperti dalam tempoh pra-pandemik. Dalam tempoh jangka sederhana, setelah ekonomi kembali pulih, Kerajaan akan dapat melaksanakan semula langkah konsolidasi dan inisiatif pengukuhan fiskal Kerajaan bagi memastikan daya tahan dan ruang fiskal yang mencukupi. Oleh yang demikian, keperluan pinjaman Kerajaan akan dapat dikurangkan dan seterusnya ini akan dapat mengawal paras pendedahan hutang dan liabiliti negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 29 SEPTEMBER 2021 (RABU)

SOALAN

TUAN KHOO POAY TIONG [KOTA MELAKA] minta **MENTERI KEWANGAN** menyatakan jumlah peminjam yang telah memohon dan diluluskan moratorium pinjaman bank di bawah PEMULIH dan apakah sebab Kerajaan dan pihak bank enggan melaksanakan moratorium tersebut tanpa faedah atau caj tambahan.

JAWAPAN

Tuan Yang di-Pertua,

1. Kerajaan telah memberikan kemudahan moratorium secara menyeluruh ke atas pinjaman bank sebagai sebahagian langkah Pakej Rangsangan Ekonomi Prihatin Rakyat (atau PRIHATIN), PEMERKASA Tambahan dan PEMULIH untuk membantu meringankan beban kewangan rakyat dan perniagaan yang terkesan dengan krisis pandemik COVID-19.
2. Sehingga kini, nilai pinjaman terkumpul yang menerima bantuan moratorium dianggarkan berjumlah 452.5 bilion ringgit, dengan 101.4 bilion ringgit kepada PKS dan 351.1 bilion ringgit kepada peminjam individu. Seramai 2.6 juta peminjam telah menikmati kemudahan ini, yang terdiri daripada 2.5 juta peminjam individu dan 81,100 PKS.
3. Kadar kelulusan bantuan moratorium kepada peminjam adalah 99 peratus sejak Julai 2021. Peminjam hanya perlu menghubungi bank untuk membuat permohonan bantuan bayaran balik pinjaman dan kelulusan akan diberikan secara automatik kepada peminjam yang layak tanpa perlu mengemukakan bukti kelayakan atau dokumen sokongan.
4. Bagi peminjam yang menghadapi situasi yang lebih mencabar atau mereka yang mempunyai pinjaman di beberapa bank, mereka boleh merujuk kepada Agensi Kaunseling dan Pengurusan Kredit (atau AKPK) bagi mendapatkan khidmat nasihat mengenai bayaran balik pinjaman.
5. Sekiranya peminjam menghadapi kesukaran semasa berurusan dengan pihak bank atau permohonan bantuan bayaran balik pinjaman ditolak, mereka boleh menghubungi Bank Negara Malaysia secara terus melalui BNM TELELINK. Sebagai makluman, jumlah aduan yang diterima melalui BNM TELELINK adalah pada kadar yang agak rendah sepanjang tempoh PEMULIH (antara Jun hingga Ogos 2021), iaitu 0.46 peratus daripada jumlah permohonan yang diluluskan.

Tuan Yang di-Pertua,

6. Bagi semua pinjaman yang mendapat bantuan moratorium, pihak bank telah bersetuju untuk tidak mengkompaun faedah, iaitu tidak mengenakan faedah atas faedah, atau mengenakan faedah penalti dalam tempoh moratorium selama 6 bulan bagi semua produk pinjaman.

7. Kerajaan sentiasa prihatin terhadap masalah yang dihadapi oleh rakyat. Sehubungan dengan itu, Kementerian Kewangan juga telah meminta institusi perbankan untuk mengusahakan pengecualian bayaran faedah bagi penerima moratorium pinjaman bank dengan segera. Ini melibatkan penerima moratorium dari kumpulan lima puluh peratus (50%) terbawah daripada keseluruhan rakyat Malaysia untuk sepanjang tempoh tiga (3) bulan pada suku keempat 2021.

8. Kemudahan moratorium ini juga perlu dilihat dari segi konteks pelbagai bantuan lain yang disalurkan. Kerajaan terus menyokong kelangsungan hidup golongan B40 dan M40 melalui pelbagai bantuan langsung seperti Bantuan Prihatin Rakyat (BPR), Bantuan Khas COVID-19 (BKC) dan Bantuan Kehilangan Pendapatan (BKP) yang keseluruhannya berjumlah RM17.1 bilion dan dijangka memanfaatkan 10 juta penerima untuk tahun 2021. Bantuan bakul makanan, bantuan data telekomunikasi melalui Jaringan Prihatin, diskaun bil elektrik, subsidi bahan makanan asas serta minyak petrol dan banyak lagi bantuan juga turut membantu meringankan beban kewangan golongan yang memerlukan.

9. Memandang ke hadapan, kejayaan program vaksinasi COVID-19 di Malaysia telah menyaksikan lebih banyak sektor ekonomi dibuka. Pembukaan sektor ekonomi akan membolehkan lebih banyak perniagaan dapat beroperasi dan rakyat kembali berkerja untuk menampung kehidupan mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATUK ZAKARIA BIN MOHD EDRIS@TUBAU
[LIBARAN]**

TARIKH : 29 SEPTEMBER 2021 (RABU)

SOALAN

DATUK ZAKARIA BIN MOHD EDRIS@TUBAU [LIBARAN] minta **MENTERI KEWANGAN** menyatakan laporan semasa pelaksanaan Pelan Pemulihan Negara dalam membantu negara kita keluar dari krisis pandemik COVID-19.

JAWAPAN

Tuan Yang di-Pertua,

1. Kerajaan telah mengumumkan Pelan Pemulihan Negara (PPN) pada 26 Julai 2021 sebagai *exit strategy* untuk negara keluar daripada kemelut COVID-19 secara berperingkat dan selamat. Bagi memastikan PPN dilaksanakan secara berkesan, Kerajaan telah mewujudkan Majlis Pemulihan Negara (MPN) yang bertanggungjawab untuk memacu pelaksanaan PPN selaras dengan pendekatan “Seluruh Negara” (*Whole of Nation*) yang diguna pakai Kerajaan dalam menggembelng usaha setiap lapisan masyarakat untuk bersama-sama memerangi pandemik COVID-19.

2. MPN ditubuhkan dengan komposisi keanggotaan yang menyeluruh meliputi Menteri-menteri Kabinet dan Pengurusan Tertinggi Kerajaan yang berkaitan, wakil-wakil Ahli Parlimen daripada blok Kerajaan, Pembangkang dan Bebas, tokoh-tokoh serta pakar industri daripada sektor swasta yang mewakili pelbagai bidang ekonomi, kesihatan,

perbankan, pendidikan, komunikasi, pelancongan, sosial serta Pertubuhan Bukan Kerajaan. MPN juga akan bertindak dengan kolaborasi erat bersama Majlis Keselamatan Negara (MKN) yang akan kekal dengan fungsinya sebagai badan pembuat keputusan dalam pembangunan Prosedur Operasi Standard (SOP), dengan nasihat MPN. Status pelaksanaan PPN akan dipantau dan dilaporkan dalam setiap kali mesyuarat MPN diadakan.

3. Antara pencapaian di bawah PPN setakat hari ini adalah seperti:

a. Kadar Vaksinasi

Setakat 17 September 2021, peratusan jumlah penduduk dewasa yang telah lengkap divaksinasi adalah sebanyak 77.5% atau melebihi 18 juta orang dan sebanyak 93.1% atau 21 juta individu telah mendapat sekurang-kurangnya satu dos.

b. Peralihan fasa di negeri-negeri seluruh negara.

Selaras dengan pengumuman PPN pada 26 Julai 2021, beberapa negeri berjaya menunjukkan kemajuan positif dengan mencapai penurunan kes yang ketara serta kadar penggunaan wad ICU yang menurun kepada tahap mencukupi dan sederhana. Beberapa negeri juga berjaya mencapai nilai ambang yang ditetapkan untuk beralih fasa seperti Negeri Sembilan daripada fasa 3 kepada fasa 4, Pahang daripada fasa 2 kepada fasa 3, dan Johor daripada fasa 1 kepada fasa 2.

c. Penurunan kes baharu dan kes kematian di Lembah Klang.

Penubuhan *Greater Klang Valley Special Task Force* (GKV STF) telah berjaya mengurangkan tempoh menunggu di wad kecemasan bagi pesakit COVID-19. Terdapat penurunan mendadak daripada 1,600 kes pada awal Ogos ketika pasukan itu ditubuhkan, kepada 120 kes untuk kesemua wad kecemasan di hospital dalam Lembah Klang.

d. Pembukaan semula sektor ekonomi dan aktiviti sosial secara berfasa.

Kerajaan juga telah mengambil keputusan untuk pembukaan semula 14 sektor ekonomi bermula 16 Ogos 2021. Keputusan itu dibuat setelah mengambil kira indikator dan penilaian risiko yang dijalankan oleh Kementerian Kesihatan Malaysia (KKM) serta Kementerian Perdagangan Dalam Negeri dan Hal Ehwal Pengguna (KPDNHEP) yang telah menunjukkan penurunan kes secara bersasar.

e. Kelonggaran sekatan kepada penerima lengkap vaksin.

Kerajaan telah mengumumkan kelonggaran sekatan atau kemudahan yang diberikan kepada penerima lengkap dua dos vaksin secara berperingkat. Kelonggaran ini termasuk kebenaran '*dine-in*' di restoran, kedai makan dan *club house* serta aktiviti solat di masjid dan surau serta rumah ibadat bagi bukan Islam dibenarkan untuk penerima dua dos vaksin sahaja. Kelonggaran SOP ini adalah merupakan satu pemulaan kepada pembukaan semula sektor ekonomi dan sosial dan menggalakkan rakyat untuk mendaftar dan mendapatkan vaksin secepat mungkin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 29 SEPTEMBER 2021 (RABU)

SOALAN

TUAN AHMAD TARMIZI BIN SULAIMAN [SIK] minta **MENTERI PERTANIAN DAN INDUSTRI MAKANAN** menyatakan adakah Kementerian mempunyai perancangan untuk pemberian bantuan khas 'Menunggu Musim Menuai' kepada pesawah padi sepertimana yang telah dilaksanakan sebelum ini.

JAWAPAN

Tuan Yang Di Pertua,

Untuk makluman Ahli Yang Berhormat, bantuan kepada pesawah sementara menunggu hasil tuaian padi telah dilaksanakan pada tahun 2018. Bantuan khas tersebut meliputi pemberian wang tunai sebanyak RM600 yang dilaksanakan secara berperingkat iaitu RM200 sebulan bagi tempoh selama tiga bulan. Bantuan tersebut diwujudkan secara *one-off* untuk tahun tersebut sahaja.

Kementerian Pertanian dan Industri Makanan (MAFI) mempunyai perancangan untuk melaksanakan pemberian Bantuan Khas 'Menunggu Musim Menuai' kepada pesawah padi sepertimana yang telah dilaksanakan sebelum ini. Walaubagaimanapun ianya tertakluk kepada kelulusan Kementerian Kewangan Malaysia (MoF).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB TUAN OSCAR LING CHAI YEW
(SIBU)**

TARIKH : 29 SEPTEMBER 2021 (RABU)

SOALAN

TUAN OSCAR LING CHAI YEW [SIBU] minta **MENTERI PENGANGKUTAN** menyatakan sistem temujanji yang dipakaiguna oleh JPJ dan PUSPAKOM telah mewujudkan banyak masalah seperti kebanyakan slot telah diambil oleh runners mengakibatkan orang ramai susah untuk mendapatkan slot itu. Terangkan cara untuk mengatasi masalah ini.

JAWAPAN

Tuan Yang di-Pertua,

Sistem temujanji yang diguna pakai oleh Rakan Strategik JPJ, seperti PUSPAKOM dan Pos Malaysia, bagi melaksanakan perkhidmatan JPJ di kaunter premis masing-masing adalah disediakan oleh pihak tersebut secara sendiri dan berbeza dengan Sistem Temujanji dalam talian yang disediakan oleh pihak JPJ.

Sistem temujanji dalam talian JPJ yang dikenali sebagai JPJeQ, merupakan sistem berasaskan web yang telah digunakan secara *pilot* di JPJ Cawangan Putrajaya dan JPJ Negeri Melaka bermula 3 Ogos 2021 yang lepas. JPJeQ merupakan salah satu usaha penambahbaikan JPJ

terhadap perkhidmatan mendapatkan temujanji perkhidmatan kaunter yang sebelumnya dilaksanakan secara *Google Form*. Peluasan Sistem Temujanji JPJeQ ini telah dibuat ke semua negeri, bermula pada 16 Ogos 2021

Pembaharuan Lesen Kenderaan Motor (LKM) dan Lesen Memandu merupakan perkhidmatan yang mendapat permintaan yang tinggi dikalangan pelanggan. Sebagai usaha penambahbaikan berterusan, JPJ telah pun menyediakan perkhidmatan dalam talian bagi urusan pembaharuan LMM dan LKM, iaitu melalui Portal Awam JPJ. Pelanggan hanya perlu mencetak resit pembayaran dan boleh mendapatkan dokumen LKM/ LLM di mana-mana pejabat JPJ secara *walk-in*, tanpa perlu membuat temu janji.

Selain daripada itu, JPJ juga telah mengambil inisiatif dengan menambah waktu operasi harian termasuk sabtu dan ahad serta pelaksanaan pandu lalu (*drive thru*) menggunakan Kaunter Bergerak K1 JPJ.

Kerajaan juga telah melaksanakan inisiatif baharu dengan membenarkan urusan pembaharuan LKM bagi kenderaan persendirian dilakukan di 39 cawangan PUSPAKOM sebagai alternatif tambahan kepada rakyat, di samping perkhidmatan sedia ada yang ditawarkan oleh Pos Malaysia Berhad dan MyEG, untuk meningkatkan saluran penyampaian perkhidmatan Kerajaan.

**PEMBERITAHUAN PERTANYAAN
DEWAN RAKYAT MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 29 SEPTEMBER 2021 (RABU)

SOALAN

MENTERI KOMUNIKASI DAN MULTIMEDIA menyatakan adakah Rancangan Malaysia Kedua Belas menyatakan sokongan kepada Majlis Media yang dijanjikan ditubuhkan supaya mempertahankan Perlembagaan Persekutuan Artikel 10 tentang kebebasan bersuara, berkumpul dan berpersatuan.

JAWAPAN

Tuan Yang Dipertua,

Untuk makluman Ahli Yang Berhormat, cadangan penubuhan Majlis Media Malaysia dilihat bersesuaian dengan objektif Rancangan Malaysia Kedua Belas (RMKe-12) iaitu untuk mencapai “Malaysia Makmur, Inklusif, Mampan” menerusi Tema/Pemangkin Dasar yang ke-2 iaitu memperkukuh keselamatan, kesejahteraan dan inklusiviti. Berdasarkan perancangan di dalam RMKe-12 tersebut, keselamatan dan kesejahteraan negara terus menjadi keutamaan dalam mengekalkan sebuah negara yang teguh dan berdaya tahan.

Dalam hal yang sama, walaupun Artikel 10 Perlembagaan Persekutuan Malaysia memberikan hak setiap warganegara untuk memiliki kebebasan bersuara, berkumpul dan berpersatuan, hak tersebut bukanlah mutlak dan masih tertakluk kepada undang-undang negara

yang berkuat kuasa di Malaysia. Ini adalah bagi memastikan agar Kerajaan dapat terus memelihara kedaulatan, keamanan, kestabilan dan keharmonian di negara ini.

Cadangan awal penubuhan Majlis Media Malaysia ini adalah untuk bertindak dalam mempertahankan kebebasan media negara bagi menyampaikan maklumat dan sebagai sebuah badan adjudikasi yang akan mengawal selia aduan yang diterima daripada orang awam berkaitan media. Sehubungan itu, pertimbangan mendalam perlu diambil dalam usaha merealisasikan penubuhan Majlis Media Malaysia ini terutamanya dalam mengenal pasti impak pelaksanaannya kepada keselamatan, keharmonian dan kedaulatan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 29 SEPTEMBER 2021 (RABU)

SOALAN

TUAN CHAN MING KAI [ALOR SETAR] minta **MENTERI KEWANGAN** menyatakan jumlah pemberian Kerajaan Persekutuan kepada negeri bagi pemberian mengikut bilangan orang dan pemberian jalan negeri pada tahun 2020 bagi setiap negeri masing-masing.

JAWAPAN

Tuan Yang di-Pertua,

Jumlah Pemberian Kerajaan Persekutuan kepada Kerajaan Negeri bagi Pemberian Mengikut Bilangan Orang dan Pemberian Penyenggaraan Jalan Negeri pada tahun 2020 masing-masing adalah berjumlah 414.3 juta dan RM4.69 bilion. Manakala bagi tahun 2021 sehingga 31 Julai, jumlah Pemberian Kerajaan Persekutuan kepada Kerajaan Negeri yang telah disalurkan adalah berjumlah 4.97 bilion ringgit. Pecahan agihan mengikut negeri sudah tentu akan bergantung kepada bilangan penduduk dan panjang jalan di negeri masing-masing.

Negeri	Pemberian Mengikut Bilangan Penduduk (RM)	Pemberian Penyenggaraan Jalan Negeri (RM)
Johor	47,826,780	624,428,099
Kedah	30,358,560	258,875,409
Kelantan	26,381,100	144,726,106
Melaka	15,857,520	100,953,481
N. Sembilan	18,502,440	345,327,233
Pahang	25,198,920	298,042,101
Perak	34,740,720	541,769,294
Perlis	8,840,160	30,817,921
P. Pinang	25,064,400	186,151,318
Selangor	75,940,320	545,260,195
Terengganu	19,652,820	207,351,246
Sabah	48,961,080	615,991,418
Sarawak	36,976,260	794,184,825
Jumlah	414,301,080	4,693,878,646

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN WONG CHEN [SUBANG]

TARIKH : 29 SEPTEMBER 2021 (RABU)

SOALAN

TUAN WONG CHEN [SUBANG] minta **MENTERI KEWANGAN** menyatakan : -

(a) adakah Kerajaan berniat untuk mempertimbangkan peringanan kuantitatif (*quantitative easing*) sebagai satu pilihan; dan

(b) adakah Bank Negara Malaysia (BNM) akan menjalankan kajian kebolehlaksanaan dan melaporkan kepada Parlimen.

JAWAPAN

Tuan Yang di-Pertua,

1. Sehingga kini, Kadar Dasar Semalaman, atau dengan izin *Overnight Policy Rate*, berada pada paras terendah dalam sejarah, iaitu 1.75 peratus. Oleh itu, ruang dasar monetari masih kekal mencukupi untuk memberikan sokongan tambahan kepada ekonomi sekiranya diperlukan. Keadaan ini dilengkapi dengan ketersediaan pelbagai instrumen pengurusan mudah tunai bank, dasar kewangan yang bersasar dan fleksibiliti pengawalseliaan. Dasar-dasar ini turut memberikan fleksibiliti yang mencukupi kepada bank untuk bertindak balas terhadap risiko dengan menggunakan instrumen dasar yang paling sesuai.
2. Selain itu, penyelarasan dengan dasar-dasar ekonomi makro lain, seperti dasar fiskal dan dasar pasaran pekerja, akan meningkatkan lagi peluang bagi mencapai pemulihan ekonomi yang mampan, dan pada masa yang sama menghindarkan bebanan yang berlebihan terhadap mana-mana instrumen dasar.
3. Hal ini dapat mengurangkan keperluan Bank Negara Malaysia (atau BNM) untuk melaksanakan dasar monetari bukan konvensional, yang memerlukan penilaian lebih lanjut mengenai kesesuaian, keberkesanan dan kesan jangka masa panjang terhadap ekonomi.
4. Buat masa ini, BNM akan mengkaji dahulu sebaik mungkin mana-mana dasar yang belum diuji, yang mungkin mempunyai kesan besar yang tidak diingini terhadap kesejahteraan ekonomi dan rakyat dalam jangka masa panjang. Selain itu, Kerajaan melalui BNM terus komited untuk menggunakan instrumen-instrumen dasar yang bersesuaian bagi mewujudkan persekitaran yang kondusif untuk menyokong pemulihan ekonomi secara berterusan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN MUHAMMAD BAKHTIAR BIN WAN
CHIK [BALIK PULAU]**

TARIKH : 29 SEPTEMBER 2021 (RABU)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan sama ada Kementerian dapat menyediakan inisiatif tertentu berkaitan situasi di mana pembatik dan karyawan semakin meninggalkan industri seni dan kebudayaan berikutan pendapatan yang terjejas akibat COVID-19 dan harus beralih ke bidang yang lain bagi menyara kehidupan.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa prihatin dan cakna terhadap para karyawan seni dan budaya, lebih-lebih lagi dalam keadaan sukar berikutan pandemik COVID-19.
2. Pelbagai inisiatif serta bantuan, sama ada dalam bentuk kewangan mahupun bukan kewangan, telah diberikan mereka. Sebagai contoh, antara Januari hingga Jun 2021, MOTAC telah menyalurkan bantuan sebanyak lebih RM400,000 kepada Badan-Badan Bukan Kerajaan (BBK) Kebudayaan.

3. Inisiatif oleh MOTAC turut dijalankan melalui agensi-agensi di bawah seliaannya. Sebagai contoh, Jabatan Kebudayaan dan Kesenian Negara (JKKN) telah mewujudkan Insentif Seni melibatkan beberapa bentuk bantuan dan perkhidmatan kepada BBK Kebudayaan, universiti dan penggiat seni budaya bagi menambah upaya NGO dan penggiat seni. Insentif yang disediakan termasuk insentif kewangan, penggunaan ruang, perkongsian kepakaran, promosi dan khidmat pemudahcara bagi bantuan disediakan pihak lain.

4. Sementara itu, Lembaga Pembangunan Seni Visual Negara (LPSVN) telah mengenal pasti empat (4) segmen utama Penggiat Seni Visual melalui ekosistem seni visual Malaysia yang terkesan akibat pandemik COVID-19 iaitu:

- (i) Penggiat seni visual arus perdana;
- (ii) Pemain industri/ komersial seni visual;
- (iii) Penggiat seni di lingkungan bandar; dan
- (iv) Penggiat seni di lingkungan luar bandar.

5. Dalam hal ini, LPSVN juga turut mengambil pendekatan desentralisasi melalui penganjuran program di luar Kuala Lumpur sebagai inisiatif untuk mencari bakat baru. Peluang melalui program *upskilling* dan *reskilling* serta mewujudkan *Malaysia Art Trail* untuk kemudahan carian dan pengumpulan data turut dilaksanakan.

6. Selain itu, Lembaga Pembangunan Seni Visual Negara (LPSVN) telah melaksanakan Tabung Bantuan Seni (TBS), Program Keusahawanan *Young Art Entrepreneurs* (YAE!), Program Jelajah Keusahawanan Seni dan Hab Seni Secara Dalam Talian yang dibangunkan oleh LPSVN sebagai hab maklumat mengenai komuniti seni visual antaranya GO GALLERY dan PROVISUAL.

7. Pada masa yang sama, Jabatan Warisan Negara (JWN) giat mengadakan promosi melalui penganjuran program secara maya seperti webinar dan Borak Warisan yang melibatkan penggiat-penggiat warisan kraf.

8. Dalam perkembangan mengenai industri batik, data oleh Kraftangan Malaysia menunjukkan jumlah usahawan batik di seluruh Malaysia sebelum penularan pandemik COVID-19 (sehingga 28 Februari 2019) ialah seramai 700 orang. Manakala sehingga 31 Ogos 2021, jumlah tersebut telah meningkat kepada seramai 771 orang usahawan batik daripada keseluruhan 6,220 orang usahawan kraf yang berdaftar. Pelbagai usaha dan inisiatif yang telah dilaksanakan melalui aktiviti pendigitalan seperti E-Kraf Bazar, MYCRAFTSHOPPE serta CraftOnTheGo dalam usaha Kraftangan Malaysia membantu usahawan batik memasarkan produk mereka, sebagai alternatif kepada penjualan produk mereka secara fizikal yang terhad di waktu penularan COVID-19.

9. Program Kemahiran dan Peningkatan Kemahiran turut telah dilaksanakan menerusi dua (2) aktiviti utama iaitu Program Pembangunan Perantisan Kemahiran (PPPK) dan Program Pembangunan Kemahiran Komuniti (PPKK). PPPK membantu usahawan kraf mendapatkan tenaga kerja, manakala PPKK membantu meningkatkan kemahiran dalam pengeluaran produk dan keusahawanan serta pemasaran. Sebanyak 14 aktiviti PPPK untuk bidang batik telah dan akan terus dilaksanakan. Kursus keusahawanan juga akan terus dilaksanakan bagi mempersiapkan usahawan dalam pemasaran digital yang melibatkan usahawan kraf di seluruh negara.

10. MOTAC akan sentiasa membantu penggiat seni dan karyawan bukan sahaja demi penjaan pendapatan semata-mata, malah untuk terus memastikan seni dan budaya negara terus subur dan dipelihara.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN ISNARAISSAH MUNIRAH
MAJILIS [KOTA BELUD]**

TARIKH : 29 SEPTEMBER 2021 (RABU)

SOALAN

PUAN ISNARAISSAH MUNIRAH MAJILIS [KOTA BELUD] minta
**MENTERI PEMBANGUNAN WANITA, KELUARGA DAN
MASYARAKAT** menyatakan:

- (a) statistik bagi pendakwaan terhadap mereka yang telah didakwa atas kesalahan bunuh diri menurut Seksyen 309 Kanun Keseksaan sepanjang tempoh pandemik; dan
- (b) inisiatif yang tidak berorientasikan perundangan bagi membantu mereka yang mempunyai masalah tekanan mental yang berkecenderungan untuk bunuh diri.

JAWAPAN

Tuan Yang di-Pertua,

Untuk makluman Yang Berhormat Kota Belud, di bawah bidang kuasa Kementerian Dalam Negeri, tiada pendakwaan dijalankan di bawah Seksyen 309 Kanun Keseksaan sepanjang tempoh pandemik. Namun begitu, mulai Mac 2020 sehingga Disember 2020, kes cubaan bunuh diri yang dilaporkan adalah 190 kes bagi seluruh negara yang terdiri dari 138 lelaki dan 52 wanita. Pada bulan Januari 2021 sehingga Ogos 2021, sebanyak 221 kes cubaan bunuh diri dilaporkan yang terdiri dari 159 lelaki dan 62 wanita.

Usaha bagi penyelesaian masalah tekanan mental dan bunuh diri adalah di bawah bidang kuasa Kementerian Dalam Negeri dan Kementerian Kesihatan. Bagaimanapun, Kementerian Pembangunan Wanita, Keluarga dan Masyarakat (KPWKM) melalui Lembaga Kaunselor turut sama melaksanakan pelbagai program sokongan psikososial bagi membantu masyarakat menangani masalah psikologi termasuk cubaan kes bunuh diri.

KPWKM melalui Lembaga Kaunselor telah mengambil beberapa inisiatif yang tidak berorientasikan perundangan bagi membantu mereka yang mempunyai masalah tekanan mental yang berkecenderungan untuk bunuh diri.

Bantuan sokongan psikologi dan sosial amat diperlukan untuk menjadikan masyarakat lebih sejahtera. KPWKM melalui Lembaga Kaunselor telah melaksanakan pelbagai inisiatif untuk membantu mereka yang mengalami masalah psikologi atau emosi semasa penularan wabak COVID-19 seperti:

- **Khidmat Aduan Atas Talian** melalui Talian Kasih 15999 atau aplikasi *WhatsApp* di nombor 019-26 15999. Perkhidmatan ini beroperasi 24 jam setiap hari yang mana talian ini berfungsi sebagai *single point of contact* kepada semua masyarakat untuk mengemukakan sebarang pertanyaan, aduan mahupun

permohonan bantuan. Skop perkhidmatan Talian Kasih merangkumi aspek berkaitan penderaan, kaunseling, gelandangan, perlindungan, kebajikan, talian kanak-kanak, perkhidmatan kesihatan reproduktif, masalah sosial remaja dan perkara yang melibatkan kumpulan sasar Kementerian;

- **Khidmat Sokongan Psikologi Atas Talian** bagi membantu masyarakat yang terkesan akibat penularan wabak COVID-19 serta Perintah Kawalan Pergerakan. Talian Khas ini melibatkan seramai 250 orang sukarelawan kaunselor berdaftar di bawah Lembaga Kaunselor Malaysia;
- Selain daripada dua talian di atas, agensi-agensi kerajaan yang lain juga ada menyediakan perkhidmatan dalam talian seperti:
 - Mental Health and Psychological Support Service yang diuruskan oleh Kementerian Kesihatan Malaysia;
 - KSK Care Centre@Masjid Tunku Mizan Zainal Abidin yang diuruskan oleh Jabatan Kemajuan Islam Malaysia;
- KPWKM melalui Lembaga Kaunselor telah mendaftarkan Sukarelawan Kaunselor Berdaftar bagi membantu masyarakat dalam menangani isu psikososial. Sukarelawan Kaunselor Berdaftar ini merupakan satu entiti formal di bawah KPWKM dalam usaha membantu masyarakat dan menyediakan bantuan profesional kepada masyarakat yang memerlukan. Selain membantu melaksanakan aktiviti seperti Talian Kasih 15999 Khas COVID-19, Sukarelawan Kaunselor Berdaftar juga menyediakan khidmat psiko-sosial di peringkat komuniti dan bantuan psikologi semasa berlakunya bencana untuk melaksanakan sokongan bantu mula psikologi (*Psychological First Aid*) kepada mangsa dan waris yang terkesan;
- Lembaga Kaunselor Malaysia bersama Kementerian Komunikasi dan Multimedia (KKMM) menjayakan siaran program TV bagi sokongan kaunseling di dalam rancangan Selamat Pagi Malaysia bermula pada 1 Jun 2021 bagi memberi maklumat dan informasi mengenai kesihatan psiko-sosial dan sokongan emosi;

SOALAN NO : 37

- KPWKM melalui Lembaga Kaunselor telah melaksanakan program sokongan psiko-sosial melalui saluran YouTube TV Lembaga Kaunselor Malaysia;
- Lembaga Kaunselor juga telah menyediakan direktori sukarelawan kaunselor berdaftar untuk rujukan agensi KPWKM;
- KPWKM juga telah merancang bantuan jangka panjang psiko-sosial di Pusat Sokongan Sosial Setempat (PSSS) yang akan dikendalikan oleh Sukarelawan Kaunselor Berdaftar;
- Kementerian ini bersama-sama dengan Agensi Kerajaan lain sentiasa komited untuk menyediakan perkhidmatan sokongan bagi memastikan kesejahteraan masyarakat Malaysia demi kemakmuran bersama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. XAVIER JAYAKUMAR A/L
ARULANANDRAM [KUALA LANGAT]**

TARIKH : 29 SEPTEMBER 2021 (RABU)

SOALAN

DATO' DR. XAVIER JAYAKUMAR A/L ARULANANDRAM [KUALA LANGAT] minta **MENTERI TENAGA DAN SUMBER ASLI** menyatakan berapa bilangan dan kos telaga tiub yang telah dibina dalam Rancangan Malaysia Ke-11 iaitu dari tahun 2016-2020 dan bagaimana pembinaan telaga tiub ini telah membantu rakyat menghadapi masalah bekalan air bersih.

JAWAPAN

Tuan Yang di-Pertua,

1. Sebanyak **207 buah** telaga tiub telah dibina dalam Rancangan Malaysia Ke-11 (tahun **2016-2020**) melalui Projek Pembangunan Sumber Air Tanah Di Kawasan-Kawasan Bermasalah Bekalan Air Bersih (*Water Stress Area*). Projek yang melibatkan kos sebanyak **RM 14 juta** tersebut telah memberi manfaat kepada **lebih 117,000 orang pengguna** di kawasan-kawasan yang menghadapi masalah bekalan air di beberapa lokasi di Malaysia seperti di Sarawak, Sabah, Kelantan, Kedah, Negeri Sembilan dan Selangor.

Tuan Yang di-Pertua,

2. Pembinaan telaga tiub sebagai sumber bekalan air bersih alternatif dapat mengatasi masalah bekalan air bersih di kawasan terpencil dan kawasan-kawasan bermasalah bekalan air dengan kepadatan penduduk/pengguna yang rendah seperti di kawasan pedalaman, kawasan tiada bekalan air terawat, kawasan sering mengalami gangguan bekalan air dan penempatan baharu. Pembinaan telaga tiub dapat mengurangkan kebergantungan terhadap sumber air permukaan yang kadang kala terjejas disebabkan oleh pencemaran atau fenomena kemarau panjang serta banjir.

3. Sebagai contoh pembinaan telaga tiub di perkampungan orang asli Kuala Koh, Kelantan pada 14 Julai 2019, telah memberi manfaat kepada lebih 200 orang pengguna. Di Negeri Kedah pula, sumber air bawah tanah didapati mampu menampung keperluan bekalan air bersih negeri yang sering terganggu disebabkan musim kemarau yang panjang. Di antara tahun 2016 hingga 2020, sebanyak 25 buah telaga telah dibangunkan di 7 daerah di Negeri Kedah iaitu daerah Baling, Padang Terap, Pokok Sena, Pendang, Yan serta Sik dan telah memberi manfaat kepada lebih 9,000 orang pengguna.

4. Telaga tiub yang dibina bersama dengan Sistem Penapisan Air Ringkas (SPATR) ini membolehkan sumber air diguna terus oleh penduduk. Sistem ini merupakan satu proses penapisan air bawah tanah secara berperingkat tanpa melibatkan penggunaan bahan-bahan kimia. Air akan ditapis melalui 2 peringkat pemprosesan iaitu Penapisan Primer dan Penapisan Sekunder dan seterusnya disimpan di tangki simpanan sebelum dihantar kepada pengguna.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 29 SEPTEMBER 2021 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI PENGAJIAN TINGGI** menyatakan hasil dapatan daripada penubuhan Jawatankuasa Kerja Penambahbaikan Akta Universiti dan Kolej Universiti 1971 (AUKU) dan tindakan susulan yang diambil oleh Kementerian.

JAWAPAN

Tuan Yang di-Pertua,

Akta Universiti dan Kolej Universiti 1971 [Akta 30] atau lebih dikenali dengan AUKU, merupakan suatu akta untuk membuat peruntukan bagi menubuh, menyelenggara dan mentadbir Universiti dan Kolej Universiti serta perkara lain yang berkaitan dengannya. Selain daripada perkara berkaitan tadbir urus universiti, AUKU turut merangkumi hal berkaitan pengurusan aktiviti pelajar.

Tuan Yang di-Pertua,

Kementerian sentiasa prihatin dan responsif ke atas aspirasi pelbagai pihak yang inginkan AUKU ditambah baik dari semasa ke semasa. Atas dasar inilah, AUKU telah mengalami proses pindaan

sebanyak tujuh (7) kali sejak ia diwartakan pada tahun 1971 hingga pindaan terakhir pada tahun 2019 yang memansuhkan Seksyen 15(2)(c) AUKU yang telah memberi lebih ruang dan kebebasan kepada pelajar untuk bersuara dan berpolitik di dalam kampus.

Bagi tujuan penambahbaikan berterusan, Kementerian telah menubuhkan Jawatankuasa Kerja Penambahbaikan AUKU pada bulan September 2020 melibatkan 37 ahli yang terdiri daripada pakar perlembagaan, pakar perundangan, pakar pendidikan tinggi dan wakil pengurusan tertinggi universiti. Selain itu, Kementerian turut melantik wakil persatuan kakitangan akademik, pentadbir dan kakitangan sokongan, wakil persatuan IPTS, wakil NGO dan wakil persatuan pelajar bagi memastikan sebarang cadangan penambahbaikan adalah bersifat komprehensif dan merangkumi semua pihak berkepentingan.

Melalui penubuhan Jawatankuasa Kerja Penambahbaikan AUKU ini, Kementerian berusaha mempergiat penglibatan semua pemegang taruh dan sentiasa terbuka dengan sebarang cadangan penambahbaikan. Dalam hal ini, sesi libat urus terakhir telah diadakan bersama Majlis Perwakilan Pelajar Kebangsaan (MPPK) pada 14 September 2021. Melalui sesi tersebut, antara isu yang telah dibangkitkan adalah melibatkan aktiviti pelajar seperti kebenaran untuk mengumpul dana; pembukaan akaun bank bagi maksud pungutan wang aktiviti pelajar; pengwujudan kesatuan pelajar dan kebebasan untuk berpersatuan. Sebahagian daripada isu yang dibangkitkan ini telah mempunyai mekanisme pelaksanaan sedia ada di peringkat Universiti Awam, manakala bakinya akan diperhalusi untuk untuk pelaksanaannya.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR MASZLEE BIN MALIK
[SIMPANG RENGAM]**

TARIKH : 29 SEPTEMBER 2021 (RABU)

SOALAN

Dr. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan status terkini projek-projek KPM dengan YTL Corporation berhubung Bestarinet dan pencawang-pencawang yang telah dibangunkan oleh YTLC di premis-premis KPM.

JAWAPAN

Tuan Yang di-Pertua,

Projek 1BestariNet Fasa 2 yang dilaksanakan oleh YTL Corporation telah tamat pada 30 Jun 2019. Bermula 1 Julai 2019, Kementerian Pendidikan Malaysia (KPM) telah menyediakan capaian jalur lebar Internet dengan kelajuan 30Mbps hingga 100Mbps untuk 10,214 sekolah. Capaian internet ini dibekalkan oleh tiga (3) syarikat telekomunikasi iaitu TM, Celcom dan Maxis.

Namun demikian, KPM juga sedar bahawa prestasi capaian internet yang disediakan masih kurang memuaskan terutamanya bagi sekolah-sekolah di luar bandar dan kawasan pedalaman. Oleh itu, KPM sedang bekerjasama dengan Unit Pemodenan Tadbiran dan Perancangan Pengurusan Malaysia (MAMPU) bagi mengenalpasti pendekatan terbaik. Ini termasuklah penyediaan rangkaian bersepadu KPM yang berlandaskan tiga (3) prinsip utama iaitu bersesuaian dengan tujuan (*fit for purpose*), kekal relevan pada masa hadapan (*future proof*)

dan penyelesaian yang holistik (*holistic solution*). Rangkaian bersepadu ini dijangka dapat mula dilaksanakan pada pertengahan tahun 2022.

Menara telekomunikasi *1Bestarinet Receiver Information System* (1BRIS) adalah menara telekomunikasi yang menyokong perkhidmatan 1Bestarinet di 2,754 buah sekolah di seluruh negara. Daripada jumlah tersebut, sebanyak 1,142 menara telah didirikan di atas tapak tanah Pesuruhjaya Tanah Persekutuan (PTP) dan 1,612 menara berada di atas tapak yang bukan milik PTP.

Jemaah Menteri pada 15 November 2019 membenarkan menara 1BRIS untuk kekal berada di dalam kawasan sekolah dan terus beroperasi dengan dikenakan kadar sewa yang sesuai. Jemaah Menteri pada 22 November 2019 pula memutuskan supaya KPM dan YTLC segera memuktamadkan perjanjian Fasa 2 sebelum menandatangani perjanjian sewaan tapak baharu. KPM kini sedang dalam peringkat rundingan dengan pihak YTLC bagi memuktamadkan perjanjian sewaan tapak.

Untuk makluman Ahli Yang Berhormat juga, menara telekomunikasi yang berada dalam premis KPM masih digunakan oleh YTLC untuk membekalkan capaian internet kepada masyarakat setempat di sekitar sekolah.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 29 SEPTEMBER 2021 (RABU)

SOALAN

PUAN KASTHURIRAANI A/P PATTO minta **MENTERI KANAN
PENDIDIKAN** menyatakan:-

- (a) apakah polisi perlindungan yang sedia ada bagi pelajar sekolah seperti Ain Husniza dalam isu keganasan berasaskan gender termasuk gangguan seksual di sekolah ; dan
- (b) apakah mekanisme serta polisi Kerajaan terhadap guru-guru, staf sokongan dan pelajar-pelajar untuk menangani masalah gangguan seksual dan jenaka rogol supaya tidak berulang lagi.

JAWAPAN

Tuan Yang DiPertua,

KPM sentiasa komited untuk memastikan persekitaran sekolah adalah selamat. Bagi pencegahan gangguan seksual di sekolah, KPM melalui perkhidmatan bimbingan dan kaunseling melaksanakan intervensi dengan menggunakan Modul Intervensi Jenayah Seksual Kanak-Kanak di Sekolah (IHSAN). Modul ini antara lain, memberi pemahaman serta meningkatkan kesedaran murid berkaitan jenayah seksual.

Program kesedaran berterusan turut dilaksanakan oleh KPM dengan kerjasama agensi kerajaan atau bukan kerajaan dalam

menyebarkan maklumat psikopendidikan, kesihatan reproduktif dan ancaman gangguan seksual.

Selain itu, Pegawai Perhubungan Sekolah (PPS) dari Polis Diraja Malaysia (PDRM) yang ditempatkan di semua sekolah KPM turut memainkan peranan untuk memastikan keselamatan murid-murid termasuk salah laku jenayah seperti gangguan seksual dan masalah disiplin sentiasa dipantau. PPS mengadakan lawatan ke sekolah sebanyak 2 kali sebulan bagi memberikan ceramah berkaitan pencegahan jenayah kepada murid dan juga sebaran maklumat di papan kenyataan PPS yang disediakan di semua sekolah.

Sekiranya berlaku sebarang kejadian gangguan seksual melibatkan murid, Guru Bimbingan dan Kaunseling akan memainkan peranan untuk memberi sokongan kepada murid melalui sesi kaunseling bagi memastikan kesejahteraan, kesihatan, keselamatan serta kebajikan murid terjaga.

Sekiranya pelaku adalah penjawat awam dan didapati bersalah, maka tindakan tatatertib akan dikenakan di bawah Peraturan-Peraturan Pegawai Awam (Kelakuan dan Tatatertib 1993). Pelaku tersebut juga boleh dikenakan hukuman di bawah Akta Kanak Kanak 2001 ataupun di bawah Akta Kesalahan-kesalahan Seksual Terhadap Kanak-Kanak 2017 (Akta 792).

Mana-mana guru yang dilaporkan terlibat kesalahan gangguan seksual boleh diambil tindakan tatatertib ke atasnya. Pegawai yang sedang dalam prosiding tidak akan dipertimbangkan untuk urusan kenaikan pangkat sehingga dibebaskan daripada pertuduhan/selesai hukuman tatatertib.

Pegawai yang didapati bersalah boleh dijatuhkan hukuman seperti amaran, denda, lucut hak emolumen, tangguh pengerakan gaji, turun gaji, turun pangkat ataupun dibuang kerja. Bagi pegawai yang dikenakan lebih daripada satu hukuman tatatertib dalam satu pertuduhan tatatertib, tempoh tidak layak dipertimbangkan kenaikan pangkat adalah berdasarkan tempoh hukuman yang lebih berat.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : DR. LEE BOON CHYE [GOPENG]

TARIKH : 29 SEPTEMBER 2021 (RABU)

SOALAN

DR. LEE BOON CHYE [GOPENG] minta **MENTERI KEWANGAN** menyatakan jumlah keluaran i-Sinar dari Tabung KWSP sepanjang pandemik COVID-19.

JAWAPAN

Tuan Yang di-Pertua,

1. Untuk makluman Ahli Yang Berhormat, i-Sinar adalah salah satu program pengeluaran khas yang diperkenalkan oleh Kumpulan Wang Simpanan Pekerja (KWSP) untuk membantu ahli meneruskan kelangsungan hidup dalam menempuhi cabaran dan impak Perintah Kawalan Pergerakan (PKP) akibat pandemik COVID-19.
2. i-Sinar membolehkan ahli yang berumur di bawah 55 tahun mengeluarkan sebahagian simpanan dalam Akaun 1 dengan amaun kelayakan tertakluk kepada baki simpanan Akaun 1. Bagi ahli yang mempunyai baki simpanan Akaun 1 sebanyak atau kurang dari RM100,000.00, kelayakan pengeluaran adalah sehingga RM10,000.00. Manakala bagi ahli yang mempunyai baki simpanan lebih RM100,000.00 di dalam Akaun 1, kelayakan pengeluaran adalah sehingga 10% atau maksimum RM60,000.00. Baki minimum sebanyak RM100.00 perlu dikekalkan dalam Akaun 1. Pembayaran bagi i-Sinar adalah dibuat dalam tempoh sehingga 6 bulan.
3. Tempoh permohonan i-Sinar berkuatkuasa adalah selama 6 bulan iaitu dari Januari 2021 sehingga Jun 2021. Dalam tempoh itu, sejumlah 6.57 juta permohonan telah diluluskan dengan amaun pengeluaran sebanyak RM58.78 billion.
4. Sehingga 31 Ogos 2021, di bawah pengeluaran i-Sinar sebanyak RM58.50 billion atau 99.5 peratus telah dikreditkan kepada ahli manakala baki berjumlah RM0.28 billion akan dikreditkan berdasarkan jadual bayaran yang telah ditetapkan sehingga Disember 2021.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN
DARIPADA : DR. ONG KIAN MING [BANGI]
TARIKH : 29 SEPTEMBER 2021 (RABU)

SOALAN

minta **MENTERI KOMUNIKASI DAN MULTIMEDIA** menyatakan dengan jelas garis masa untuk 5G 'roll-out' mengikut negeri masing-masing di Malaysia dan langkah-langkah yang diambil untuk memastikan kawasan di luar bandar tidak diabaikan dalam 'roll-out' ini.

JAWAPAN

Tuan Yang Dipertua,

Untuk makluman Ahli Yang Berhormat, di bawah JENDELA, satu perancangan berfasa bagi menambahbaik infrastruktur digital negara adalah seperti berikut :

- a. JENDELA Fasa 1 yang bermula pada September 2020 sehingga penghujung tahun 2022 akan memberi fokus kepada peluasan liputan gentian optik dan pembangunan infrastruktur digital termasuk penamatan rangkaian 3G secara berperingkat sehingga akhir tahun 2021 untuk pemantapan rangkaian 4G serta memperkukuhkan asas bagi rangkaian 5G; dan
- b. JENDELA Fasa 2 yang dirancang bermula 2023 pada asalnya turut merangkumi pelaksanaan teknologi 5G. Namun, setelah mengambil kira kepentingan 5G terhadap Rangka Tindakan Ekonomi Digital Malaysia (MyDigital), Kerajaan mempercepatkan pelaksanaan 5G ke suku keempat 2021. Kerajaan juga telah mengenalpasti keperluan spektrum yang berkaitan bagi membolehkan rangkaian

ini dapat dibina dengan segera.

Sehubungan itu, Kerajaan telah mengambil keputusan supaya satu syarikat tujuan khas (SPV) di bawah Menteri Kewangan Diperbadankan iaitu Digital Nasional Berhad (DNB), dilantik sebagai penyedia tunggal infrastruktur dan rangkaian 5G di seluruh negara. Pendekatan penyedia tunggal ini membolehkan penyedia-penyedia perkhidmatan 4G sedia ada terus menumpukan pelaburan kepada penaiktarafan infrastruktur dan rangkaian 4G dan gentian optik untuk manfaat pengguna. Pendekatan ini juga memastikan bahawa pelaksanaan 5G dapat diawalkan, bermula hujung tahun 2021.

DNB akan membangunkan rangkaian 5G dan memberikan perkhidmatan 5G secara pukal kepada pengendali perkhidmatan lain. Pendekatan ini akan membolehkan pemegang lesen lain dapat memberikan perkhidmatan 5G secara runcit kepada para pengguna dan perniagaan, seterusnya merangsang inovasi perkhidmatan 5G pada masa hadapan.

Pembangunan rangkaian 5G akan dijalankan secara berperingkat bermula penghujung 2021 di Putrajaya, Cyberjaya dan Kuala Lumpur. Ia akan diperluaskan ke kawasan lain di seluruh negara, bermula tahun 2022. Dalam perkara ini, syarikat DNB telah mensasarkan sehingga 80% kawasan berpenduduk di seluruh negara akan mendapat liputan 5G pada tahun 2024.

Dalam masa yang sama, pelan JENDELA mensasarkan liputan perkhidmatan 4G di kawasan berpenduduk dipertingkatkan kepada 96.9% dengan purata kelajuan muat turun 35Mbps pada penghujung tahun 2022. Liputan perkhidmatan 4G yang meluas ini akan membantu pelaksanaan 5G serta penerimaan perkhidmatan baharu ke seluruh negara.

Perancangan terperinci sedang dilakukan oleh DNB bersama-sama pemberi perkhidmatan mudah alih yang lain untuk membolehkan liputan dan perkhidmatan yang akan diberikan mengambilkira keperluan mereka. Perkara ini akan dimuktamadkan sebelum penghujung tahun 2021.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 29 SEPTEMBER 2021 (RABU)

SOALAN

minta **MENTERI KOMUNIKASI DAN MULTIMEDIA** menyatakan secara terperinci perkembangan usahaewartakan perkhidmatan telekomunikasi sebagai utiliti awam serta impak langkah ini kepada ekonomi dan rakyat.

JAWAPAN

Tuan Yang Dipertua,

Untuk makluman Ahli Yang Berhormat, Kerajaan Persekutuan telah mengiktiraf Komunikasi sebagai Utiliti Awam melalui keputusan yang telah dibuat dalam Mesyuarat Jemaah Menteri pada 2 Jun 2021 lalu. Melalui pengiktirafan ini, penyediaan infrastruktur komunikasi kini telah diwajibkan dalam setiap projek pembangunan di peringkat persekutuan, negeri dan juga pihak berkuasa tempatan (PBT). Ini bermakna utiliti telekomunikasi perlu disediakan pemaju sebelum memajukan sesuatu kawasan yang sekali gus memudahkan lagi perancangan pembangunan sesuatu kawasan secara lebih terancang memandangkan talian telah tersedia sebelum ia diduduki.

Denganewartakan telekomunikasi sebagai utiliti awam, akses perkhidmatan komunikasi dapat disediakan secara menyeluruh, berkualiti tinggi, cepat dan dengan kos operasi yang berpatutan. Ketersediaan

SOALAN NO: 45

rangkaian komunikasi yang berkualiti tinggi dapat menggalakkan pertumbuhan ekonomi dan seterusnya meningkatkan tahap daya saing negara.

Justeru, bagi memastikan penyediaan infrastruktur komunikasi ini dapat dilaksanakan seperti yang dirancang, komitmen dan kerjasama semua pihak termasuk Kerajaan Persekutuan, Kerajaan Negeri dan PBT amat diharapkan. Ini adalah kerana pewartaan undang-undang yang mewajibkan pelaksanaan jalur lebar sebagai utiliti ketiga adalah di bawah bidang kuasa Kerajaan Negeri.

Semua usaha ini berisiko untuk terbantut sekiranya kerajaan-kerajaan negeri gagal melaksanakan perubahan dasar yang bersesuaian dan mengurangkan kos untuk membina infrastruktur ini dengan pantas. Peranan infrastruktur telekomunikasi sebagai keperluan asas telah pun dizahirkan dalam Undang-undang Kecil Bangunan Seragam (UKBS) (Pindaan 2011).

Bagi mengukuhkan pelaksanaan aspek ini, Suruhanjaya Komunikasi dan Multimedia Malaysia (MCMC) telah membangunkan Garis Panduan Perancangan Infrastruktur Komunikasi (GPP-I) untuk mewujudkan amalan perancangan yang seragam dan boleh dijadikan piawaian oleh semua Kerajaan Negeri dan PBT. Sehingga kini, sebanyak 10 buah negeri telah bersetuju untuk menerima pakai garis panduan ini iaitu negeri Perlis, Pulau Pinang, Wilayah Persekutuan, Melaka, Terengganu, Pahang, Perak, Kedah, Negeri Sembilan dan negeri Johor.

Sehubungan itu, kerjasama serta komitmen Kerajaan Negeri dan semua pihak adalah penting bagi memastikan kesemua cadangan dasar yang telah diluluskan di peringkat pusat, dapat diaplikasikan di peringkat negeri dan PBT agar penyediaan infrastruktur digital dapat dimudahcara serta mengikut piawaian yang tertentu bagi memastikan Aspirasi Nasional dapat dicapai.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 28 SEPTEMBER 2021 (SELASA)

SOALAN

PUAN TEO NIE CHING minta **MENTERI KANAN PENDIDIKAN** menyatakan jumlah kelas PPKI dan kelas pendidikan awal di SK, SJKC dan SJKT pada tahun 2019, 2020 dan 2021 masing-masing.

JAWAPAN

Tuan Yang di-Pertua,

Bilangan kelas Program Pendidikan Khas Integrasi (PPKI) di sekolah kebangsaan (SK) pada tahun 2019 adalah sebanyak 5,388 buah dengan bilangan murid berkeperluan khas (MBK) seramai 37,742 orang. Pada tahun 2020 bilangan tersebut meningkat kepada 5,536 buah kelas dengan bilangan MBK seramai 40,287 orang. Seterusnya pada tahun 2021, data sehingga 31 Ogos menunjukkan bilangan kelas adalah sebanyak 5,636 buah dengan bilangan MBK seramai 40,213 orang.

Kelas PPKI di sekolah jenis kebangsaan Cina (SJKC) untuk tahun 2019 adalah sebanyak 278 buah kelas dengan bilangan MBK seramai 1,903 orang. Pada tahun 2020, bilangan tersebut meningkat kepada 282 buah kelas dengan MBK seramai 2,021 orang. Seterusnya pada tahun 2021, data sehingga 31 Ogos menunjukkan bilangan kelas adalah sebanyak 294 buah dengan bilangan MBK seramai 2,086 orang.

Bagi kelas PPKI di sekolah jenis kebangsaan Tamil (SJKT) pula, terdapat 47 buah kelas dengan bilangan MBK seramai 280 orang pada tahun 2019. Pada tahun 2020 bilangan tersebut meningkat kepada 51

buah kelas dengan bilangan MBK seramai 288 orang. Seterusnya pada tahun 2021, data sehingga 31 Ogos menunjukkan bilangan kelas kekal 51 buah dengan bilangan MBK seramai 289 orang.

Peringkat Prasekolah

Bilangan kelas prasekolah PPKI di SK pada tahun 2019 adalah sebanyak 181 buah dengan seramai 969 orang MBK. Pada tahun 2020 bilangan tersebut meningkat kepada 184 buah kelas dengan bilangan MBK seramai 1,031 orang. Seterusnya pada tahun 2021, data sehingga 31 Ogos menunjukkan bilangan kelas adalah sebanyak 194 buah dengan bilangan seramai 1,096 orang MBK.

Bagi kelas prasekolah PPKI di SJKC, pada tahun 2019 hanya terdapat sebuah kelas dengan bilangan MBK seramai 5 orang. Pada tahun 2020 bilangan tersebut meningkat kepada 2 buah kelas dengan bilangan MBK seramai 7 orang. Seterusnya pada tahun 2021, data sehingga 31 Ogos menunjukkan bilangan kelas adalah sebanyak 3 buah dengan bilangan MBK seramai 15 orang.

Bagi kelas prasekolah PPKI di SJKT pula, pada tahun 2019 hanya terdapat sebuah kelas dengan bilangan MBK seramai 6 orang. Pada tahun 2020 bilangan tersebut kekal dengan hanya sebuah kelas tetapi bilangan MBK meningkat kepada 7 orang. Seterusnya pada tahun 2021, data sehingga 31 Ogos juga menunjukkan bilangan kelas kekal sebuah dengan bilangan MBK berkurang kepada 6 orang.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SYED IBRAHIM BIN SYED NOH
(LEDANG)**

TARIKH : 29 SEPTEMBER 2021 (RABU)

SOALAN

TUAN SYED IBRAHIM BIN SYED NOH [LEDANG] minta **MENTERI PENGANGKUTAN** menyatakan perkembangan dan perancangan Kerajaan dalam memastikan industri logistik Malaysia bagi pasaran antarabangsa dan tempatan mencapai keupayaan strategik di masa hadapan.

JAWAPAN

Tuan Yang Di-Pertua,

Kementerian Pengangkutan mempunyai dua polisi utama dalam merancang pembangunan industri logistik di Malaysia. Kesemua perancangan ini telah diperincikan dalam Pelan Induk Logistik dan Fasilitasi Perdagangan dan Dasar Pengangkutan Negara 2019-2030 (DPN).

Pelan Induk Logistik dan Fasilitasi Perdagangan memberi penumpuan kepada pembangunan rangkaian logistik bersepadu, yang mengambil kira hubungan antara pelbagai mod pengangkutan dalam menjamin pergerakan barang yang cekap dan lancar dengan visi menjadikan Malaysia sebagai *The Preferred Logistik Gateway to Asia*. Pelan induk ini mempunyai 21 *action items* yang menetengahkan isu *structural* dengan tumpuan kepada

memudah cara pergerakan kargo negara. Sementara itu Dasar Pengangkutan Negara pula memberi tumpuan kepada menyokong pertumbuhan ekonomi Malaysia menerusi pembangunan dalam sektor pengangkutan yang mampan.

Dasar Pengangkutan Negara pula antara lain akan memberikan tumpuan dalam meningkatkan *model-shift* ke rel bagi pengangkutan barangan. Tumpuan khusus diberikan untuk memoden dan mengintegrasikan sektor logistik bagi mengurangkan kos menjalankan perniagaan. Dalam memastikan pergerakan barangan yang lancar, perancangan khusus berhubung keperluan infrastruktur serta jaringan perhubungan pengangkutan yang lebih komprehensif juga menjadi fokus Dasar Pengangkutan Negara. Ini termasuk keperluan infrastruktur bagi menyokong sektor e-dagang yang menjadi salah satu cabang sumber ekonomi baru negara.

Dasar Pengangkutan Negara seiring dengan Pelan Induk Logistik dan Fasilitasi Perdagangan telah menyediakan rangka kerja bersepadu untuk memastikan industri logistik berkembang dengan baik dan mempunyai keupayaan strategik untuk bersaing diperingkat antarabangsa sekaligus meletakkan Malaysia sebagai salah satu peneraju logistik serantau.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KE EMPAT BELAS**

PERTANYAAN : LISAN

DARIPADA : TUAN SIM TZE TZIN [BAYAN BARU]

TARIKH : 29 SEPTEMBER 2021 (RABU)

SOALAN

TUAN SIM TZE TZIN [BAYAN BARU] minta **MENTERI PERTANIAN DAN INDUSTRI MAKANAN** menyatakan apakah tindakan Kementerian menyelesaikan masalah kekurangan pekerja asing kepada sektor pertanian dan perikanan akibat *lockdown* dan pembekuan pengambilan pekerja asing dan awak-awak.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) telah mengambil beberapa tindakan untuk membantu pihak industri berikutan kekurangan pekerja asing akibat *lockdown* dan pembekuan pengambilan pekerja asing dan awak-awak. Bagi tempoh 1 Januari hingga 5 Julai 2021, sebanyak 786 majikan di sektor pertanian telah memohon untuk meregularisasikan seramai 15,188 orang PATI. Daripada jumlah tersebut, permohonan 271 majikan (34.5%) telah diluluskan.

Bagi sektor pertanian, MAFI telah melaksanakan program seperti berikut:

- i. Program Mobiliti Tenaga Kerja Dalam Sektor Agro Makanan (*MyFuture Agro*) merupakan program jangka pendek bermula dari Ogos 2020 sehingga Disember 2021 dengan peruntukan sebanyak RM20 juta di bawah Pelan Jana Semula Ekonomi Negara (PENJANA) yang bertujuan merangsang permintaan dalam latihan kerja *On-The-Job Training* selama satu hingga enam bulan di kalangan syarikat. Fokus program ini adalah kepada latihan kerja dalam bidang agromakanan kepada lepasan sekolah, graduan menganggur dan golongan yang diberhentikan kerja termasuk golongan orang kurang upaya (OKU) dan mereka yang berumur 40 tahun dan ke atas (maksimum 55 tahun) dan insentif penggajian sebanyak RM800-RM1,000 dan elaun mobiliti secara *one-off* sebanyak RM600-RM1,000 diberikan kepada peserta yang layak di syarikat yang mendaftar di bawah program ini.
- ii. Program latihan pertanian bagi Sijil Pertanian dan Sijil Kemahiran Malaysia diteruskan di institut-institut pertanian dalam usaha melahirkan tenaga kerja mahir pertanian yang boleh menggantikan pekerja asing. Sehingga tahun 2021, seramai 12,249 orang graduan Sijil Pertanian dan 1,577 graduan Sijil Kemahiran Malaysia telah dilahirkan di bawah MAFI.

Bagi sektor perikanan pula, MAFI masih membenarkan penggunaan kru bukan warganegara sehingga 100% untuk bekerja di atas vesel penangkapan ikan tempatan bagi semua vesel Zon C2, vesel Zon C3 dan vesel jerut bilis zon A di Kedah dan Perak. Bagi vesel yang beroperasi Zon C pula dibenarkan sehingga 80% kru bukan warganegara bekerja di atas vesel penangkapan ikan tempatan.

MAFI juga melaksanakan pemberian PLKS Jangka Pendek untuk kru asing bekerja di atas vesel penangkapan ikan seperti berikut:

- i. PLKS Jangka Pendek dilaksanakan pada 7 Oktober 2020 berdasarkan Pekeliling Imigresen Bil.18 Tahun 2018. Pelaksanaan ini ditangguhkan dengan pemberian moratorium

sehingga 31 Disember 2021 kepada warganegara asing yang bekerja di atas vesel penangkapan ikan tempatan. Ianya terpakai kepada 14,703 orang kru nelayan asing yang telah berada di dalam negara.

- ii. Kru asing yang masih berada di dalam negara adalah seramai 14,703 kru asing mengikut pecahan berikut:
 - a) 4,105 nelayan adalah pemegang Pas Pelaut/ *Seaman Pass*; dan
 - b) 10,598 nelayan mempunyai pasport namun tiada cop lakri keluar-masuk ke dalam negara daripada Jabatan Imigresen Malaysia. Mereka ini dicadangkan diambil bekerja semula melalui Program Rekalibrasi pekerja asing di bawah Kementerian Dalam Negeri (KDN).
- iii. Sehingga kini seramai 1,213 orang kru telah mendapat PLKS secara sah daripada pihak Jabatan Imigresen Malaysia (JIM). Manakala seramai 4,050 orang kru telah didaftarkan semula untuk bekerja di atas vesel melalui program moratorium PLKS dengan mengguna pakai dokumen pasport yang sah sahaja.
- iv. MAFI telah menyelaras bersama agensi berkaitan untuk memberi kebenaran masuk kepada kru asing warganegara Thailand melalui sempadan jalan darat di Bukit Kayu Hitam, Kedah, Wang Prachan-Padang Besar, Perlis, Sg. Kolok, Kelantan dan Sadao-Changlun, Kedah sejak bulan Mac 2021. Penyelarasan maklumat daripada pihak industri telah dikemukakan kepada Kementerian Luar Negeri (KLN) bagi tujuan permohonan kepada Kerajaan Thailand. Melalui kemasukan sempadan jalan darat ini, kos pengambilan baru kru asing dapat dikurangkan berbanding kemasukan melalui pengangkutan udara (kapal terbang).
- v. MAFI juga sedang melaksanakan Projek Rintis Latihan Tenaga Kerja Tempatan di atas Vesel Perikanan Tangkapan

Zon A Pukat Jerut Bilis di Pulau Langkawi, Zon C dan C2 di negeri Kedah, Terengganu dan Sarawak. Program ini merupakan program latihan komprehensif selama dua (2) minggu bagi melatih peserta di kalangan warga tempatan untuk menjadi kru di atas vesel penangkapan ikan.

- vi. Program Latihan Kemahiran Pertanian Kebangsaan (PLKPK) yang bermula sejak tahun 2002 berupaya meningkatkan pengeluaran pertanian melalui model pembangunan insan mahir di dalam bidang pertanian berteraskan *National Occupational Skills Standard* (NOSS) (Tahap I, II , III, DKM, DLKM) dengan peruntukan Akta Pembangunan Kemahiran Kebangsaan 2006 (*National Skill Development Act@NASDA*).
- vii. Program Sijil Perikanan di bawah Akademi Perikanan Malaysia telah diperkenalkan pada tahun 2015 sebagai satu bidang pengajian tinggi peringkat sijil (IPT) yang diakreditasi oleh *Malaysian Qualification Agency* (MQA) – MQA/FA 7564. Program ini menggabungkan pengetahuan akademik dan kemahiran teknikal melalui empat (4) disiplin utama iaitu perikanan tangkapan, akuakultur, biosekuriti dan produk lepas tuai.
- viii. Penubuhan APM dan KPSN sebagai pusat latihan yang menawarkan Sijil Perikanan Malaysia (SP), Sijil Kemahiran Malaysia (SKM), Diploma Kemahiran Malaysia (DKM), dan Diploma Lanjutan Kemahiran Malaysia (DLKM) bagi melahirkan tenaga kerja mahir dalam sektor perikanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 29 SEPTEMBER 2021 (RABU)

SOALAN

DATO' HAJI MAHFUZ BIN HAJI OMAR [POKOK SENA] minta
MENTERI KEWANGAN menyatakan : -

(a) berapa jumlah dan nilai kontrak perolehan Kerajaan dipecah mengikut Kementerian yang diberikan oleh Kerajaan sejak 15 Mac 2020 hingga 15 Ogos 2021; dan

(b) berapa jumlah nilai secara rundingan terus mengikut Kementerian pada tempoh yang sama dan senaraikan syarikat-syarikat yang dilantik.

JAWAPAN

Tuan Yang di-Pertua,

1. Untuk makluman Yang Berhormat, senarai perolehan Kerajaan mengikut kementerian boleh diakses melalui Portal MyProcurement di mana semua kementerian telah diminta untuk mengemaskini Perancangan Perolehan Tahunan masing-masing di dalam portal tersebut.
2. Manakala, Kerajaan telah menetapkan lima (5) kriteria bagi pertimbangan perolehan secara rundingan terus iaitu melibatkan kesegeraan atas kepentingan awam, bagi maksud penyeragaman, satu punca bekalan/perkhidmatan (pembuat/pemegang francais), melibatkan keselamatan/strategik atau kontrak dengan syarikat pembuat Bumiputera sepertimana yang dinyatakan di bawah Pekeliling Perbendaharaan PP/PK7.15: Garis Panduan Permohonan Perolehan Secara Rundingan Terus.
3. Semua permohonan yang dikemukakan akan dinilai dan diteliti secara menyeluruh daripada pelbagai aspek bagi memastikan kelulusan rundingan terus yang diberikan tetap melindungi kepentingan Kerajaan serta tidak menjejaskan kerancakan perkembangan ekonomi. Kerajaan juga melaksanakan *due diligence* yang sewajarnya bagi memastikan hanya projek yang benar-benar memenuhi kriteria tersebut boleh dipertimbangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 29 SEPTEMBER 2021 (RABU)

SOALAN

TUAN CHAN MING KAI [ALOR SETAR] minta **MENTERI PERTANIAN DAN INDUSTRI MAKANAN** menyatakan apakah perincian kos operasi yang dibayar kepada NAFAS bagi tujuan pengendalian benih padi memandangkan harga benih padi subsidi telah naik RM7 dari RM28 kepada RM35.

JAWAPAN

Tuan Yang Di Pertua,

Untuk makluman Ahli Yang Berhormat, sebelum 1 Januari 2021, Kerajaan hanya menetapkan harga jualan pengeluar benih padi sah secara bersubsidi sebanyak RM28 setiap beg (20 kilogram benih padi) di pintu kilang sahaja secara tanpa kawalan pembelian. Dalam hal ini, Kementerian Pertanian dan Industri Makanan (MAFI) mendapati bahawa manipulasi harga benih padi sah oleh agen-agen tertentu atau orang tengah termasuk tindakan menyorokkan stok setiap kali musim penanaman padi mengakibatkan harga jualan akhir di peringkat pesawah tidak dapat dikawal dan melonjak sehingga sekitar RM33 hingga RM60 setiap beg.

Perkara sedemikian merupakan sesuatu yang tidak wajar dibenarkan sama sekali memandangkan Insentif Benih Padi Sah (IBPS) telah diberikan oleh Kerajaan. Oleh yang sedemikian, mulai 1 Januari 2021, MAFI telah mengambil inisiatif melaksanakan mekanisme penetapan harga siling benih padi sah di paras maksimum sebanyak RM35 per beg (20 kilogram). Pendekatan ini adalah bagi mengawal harga di peringkat runcit bagi memastikan harga jualan akhir di peringkat pesawah tidak dimanipulasi oleh mana-mana pihak apabila sampai kepada pesawah sekaligus memastikan kepentingan pesawah terus terpelihara.

Maka, dakwaan harga benih padi sah bersubsidi telah naik RM7 daripada RM28 kepada RM35 adalah tidak tepat jika meneliti kepada konteks realiti sebenar di lapangan kerana tanpa penetapan harga siling tersebut, harga jualan akhir di peringkat pesawah dalam banyak keadaan adalah jauh lebih tinggi dan merugikan pesawah.

Penetapan harga siling di paras maksimum sebanyak RM35 per beg yang telah dibuat adalah munasabah buat masa ini dengan mengambil kira pelbagai faktor di semua peringkat pengeluaran dan pengedaran. Antara faktor yang diambil kira adalah kos-kos bagi belian bekalan benih daripada pesawah dan pengeluar, pembungkusan khas

dan pembangunan kod penjejakan (*tracing*), logistik, pengangkutan dan penyimpanan serta kos pengurusan berkaitan oleh Pertubuhan Peladang Kawasan (PPK) yang perlu dibiayai oleh Pertubuhan Peladang Kebangsaan (NAFAS) memandangkan NAFAS dikehendaki memastikan bekalan benih padi sah tersebut disimpan sebaiknya sehingga sampai ke peringkat pesawah pada masa yang ditetapkan. Pada masa yang sama, NAFAS juga telah diminta untuk menyerap sebarang kos-kos tambahan sekiranya ada bagi melancarkan proses pembekalan.

Untuk makluman Ahli Yang Berhormat jua, apabila MAFI membuat keputusan untuk melibatkan NAFAS dalam pengedaran pembekalan benih padi sah, matlamat utamanya adalah untuk melicinkan sistem pengedaran benih padi sah bagi memastikan benih padi sah berkenaan dapat disampaikan kepada pesawah secara lebih cekap dan pada kos yang munasabah. Hal sedemikian adalah kerana saban tahun isu pengedaran dan pembekalan benih padi sah membabitkan pelbagai manipulasi di peringkat rantai bekalan selain daripada isu kualiti benih padi itu sendiri.

Penglibatan NAFAS diharap dapat menambahbaik pengedaran dan pembekalan benih padi sah memandangkan NAFAS sendiri merupakan gabungan induk daripada persatuan peladang termasuk pesawah dan telah mempunyai jaringan (*networking*) yang amat baik dan sistematik di peringkat akar umbi. Maka, hak pengedaran telah diberikan kepada NAFAS sehingga 30 Jun 2021 bagi memberi ruang kepada MAFI untuk meneliti dan melaksanakan proses penambahbaikan kepada sistem yang sedia ada.

Pendekatan yang diambil ini sehingga kini berjaya mengekang aktiviti manipulasi harga berdasarkan kepada kurangnya laporan aduan yang diterima. Tindakan tegas juga akan diambil terhadap mana-mana pihak yang cuba untuk memanipulasikan harga benih padi sah di lapangan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN WONG CHEN [SUBANG]

TARIKH : 29 SEPTEMBER 2021 (RABU)

SOALAN

TUAN WONG CHEN [SUBANG] minta **MENTERI KEWANGAN** menyatakan : -

(a) perincian dan jumlah wang yang Kerajaan telah belanjakan sepanjang tempoh masa Proklamasi Darurat; dan

(b) jumlah suntikan fiskal yang diperlukan untuk baki tahun kewangan penuh 2021.

JAWAPAN

Tuan Yang di-Pertua,

1. Setakat 31 Ogos 2021, iaitu berakhirnya tempoh darurat, sejumlah 207 bilion ringgit telah dibelanjakan. Ini merangkumi 146.5 bilion ringgit dibelanjakan di bawah anggaran perbelanjaan mengurus (atau OE) dan sejumlah 40 bilion dibelanjakan di bawah anggaran perbelanjaan pembangunan (atau DE) Kerajaan Persekutuan. Manakala sejumlah 20.5 bilion ringgit telah dibelanjakan di bawah Kumpulan Wang Covid-19 (atau KWC).

2. Perbelanjaan OE, DE dan KWC ini merupakan sebahagian daripada Belanjawan 2021 bernilai RM322.5 bilion dan dibuat berdasarkan kepada peruntukan yang telah diluluskan oleh Parlimen di bawah Anggaran Perbelanjaan Persekutuan bagi tahun 2021.

Sehubungan itu, tiada perbelanjaan tambahan telah dibuat di bawah OE atau DE semasa tempoh darurat yang perlu dibentangkan di Dewan Rakyat kerana ianya menggunakan peruntukan semasa yang telah diluluskan bagi tahun 2021.

3. Selain itu, Kerajaan telah meluluskan ordinan semasa tempoh darurat yang membolehkan perbelanjaan tambahan diluluskan oleh Kementerian Kewangan tanpa di bentangkan kepada Parlimen. Namun demikian, ordinan tersebut tidak digunakan untuk tahun 2021 tetapi hanya digunakan untuk meluluskan perbelanjaan tambahan 2020.

4. Di samping perbelanjaan OE dan DE, Kerajaan juga telah membiayai langkah pakej rangsangan melalui KWC. Parlimen telah meluluskan pindaan siling KWC pada 31 Disember 2020 sehingga 65 bilion ringgit dan setakat 31 Ogos 2021, perbelanjaan terkumpul sejak penubuhan KWC adalah berjumlah 58.8 bilion ringgit.

5. Walaubagaimanapun, berdasarkan Kenyataan Pra Bajet 2022, Kerajaan telah menyusun semula keperluan perbelanjaan daripada RM322.5 bilion kepada RM314.5 bilion agar selari dengan perancangan Kerajaan dan prestasi pertumbuhan ekonomi dan kutipan hasil. Justeru, mengambil kira keperluan tambahan untuk membantu rakyat yang terjejas dan menyokong kelangsungan perniagaan, Kerajaan akan membentangkan ke Parlimen dalam penggal ini untuk meningkatkan siling KWC untuk membiayai bantuan dan sokongan tambahan bagi tahun ini dan selanjutnya.

6. Untuk makluman Yang Berhormat, baki suntikan fiskal yang akan dibelanjakan daripada bulan September sehingga akhir tahun 2021 adalah berjumlah 107.8 bilion ringgit yang merangkumi OE sebanyak 73.1 bilion ringgit, DE 28.2 bilion ringgit dan KWC 6.5 bilion ringgit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN NOR AZRINA BINTI SURIP
[MERBOK]**

TARIKH : 29 SEPTEMBER 2021 (RABU)

SOALAN

PUAN NOR AZRINA BINTI SURIP minta **MENTERI KANAN PENDIDIKAN** menyatakan apakah tindakan Kementerian terhadap isu keciciran pembelajaran bagi mereka yang tidak mampu mengikuti PdPR akibat tiada peranti serta kemudahan internet, perlukah mereka mengulangi sesi persekolahan tahun 2020 dan 2021 yang terjejas.

JAWAPAN

Tuan Yang di-Pertua,

Pengajaran dan Pembelajaran di Rumah (PdPR) dilaksanakan melalui tiga pendekatan iaitu secara dalam talian (*online*), di luar talian (*off-line*) dan secara *off-site* mengikut kesesuaian. Pihak sekolah dan guru mengatur strategi untuk memastikan PdPR dilaksanakan secara optimum berdasarkan pertimbangan tiga prinsip asas, iaitu tiada murid tercicir dalam pembelajaran, keperluan asas pembelajaran dipenuhi dan kesejahteraan murid diutamakan.

Untuk makluman Ahli Yang Berhormat, Kementerian Pendidikan Malaysia (KPM) menyedari bahawa pelaksanaan PdPR secara dalam talian masih belum dapat dilaksanakan secara menyeluruh kerana terdapat kekangan berkaitan pemilikan peranti dan juga akses kepada internet dalam kalangan murid yang terdiri daripada pelbagai latar belakang sosioekonomi, sama ada di kawasan bandar, luar bandar ataupun kawasan pedalaman.

Bagi mengatasi isu keciciran murid dalam tempoh pelaksanaan PdPR, KPM telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirancang dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Namun begitu, KPM sentiasa berusaha untuk memastikan semua murid mendapat akses untuk pembelajaran. Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul pembelajaran dan membuat serahan bahan tersebut kepada murid. Guru juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Bagi membantu murid yang tidak mempunyai akses kepada talian internet dan alat peranti digital yang sesuai untuk pembelajaran, KPM terus memperkasakan siaran pendidikan di DidikTV KPM. Selain itu, siaran TV Pendidikan di TV Okey RTM dan Tutor TV Astro juga diteruskan. Di samping itu, murid juga boleh meneruskan kaedah pembelajaran PdPR secara luar talian dengan menggunakan buku teks yang dibekalkan.

Peranti digital yang diterima oleh KPM akan terus diagihkan kepada murid B40 yang telah dikenal pasti. Sehingga 22 September 2021,

sebanyak 113,066 unit peranti digital telah diserahkan kepada murid B40 di 918 sekolah seluruh negara. Manakala, 18,066 unit telah diterima daripada Yayasan Hasanah dan akan diagihkan kepada murid dalam masa terdekat. Baki 18,868 unit lagi akan diagihkan sebaik sahaja diterima daripada Yayasan Hasanah.

KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM yakin kerangka holistik yang dirancang dan dilaksanakan ini membolehkan murid mengikuti PdP secara berkesan, seterusnya dapat menangani keciciran murid dan memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 29 SEPTEMBER 2021 (RABU)

SOALAN

PUAN WONG SHU QI [KLUANG] minta **MENTERI KANAN PENDIDIKAN** menyatakan status terkini program pemberian tablet dengan perisian Tutor Guru seperti:-

- (a) jumlah pembayaran telah dibuat ; dan
- (b) jumlah tablet telah diterima dan baki dana yang belum dibelanja.

JAWAPAN

Tuan Yang di-Pertua,

Program pemberian tablet berserta perisian Tutor Guru dan E-Paper Utusan Malaysia dimulakan dengan pembekalan kepada seramai 43,000 guru di 1,450 buah sekolah di Sarawak pada tahun 2016.

Projek pemberian tablet ini kemudiannya diteruskan ke negeri-negeri lain secara berperingkat dengan peruntukan sebanyak RM340 juta bagi 430,000 guru Kementerian Pendidikan Malaysia (KPM). Peruntukan RM340 juta ini telah diumumkan semasa pembentangan Bajet 2017 menggunakan dana Suruhanjaya Komunikasi dan Multimedia Malaysia (SKMM).

Projek ini dilaksanakan secara berperingkat melibatkan tujuh fasa mengikut negeri. Fasa 1 hingga Fasa 5 telah dilaksanakan dari tahun 2017 hingga 2018. Walau bagaimanapun, edaran bagi negeri-negeri untuk Fasa 6 dan Fasa 7 tidak dapat diteruskan. Ini berikutan penutupan operasi syarikat pembekal yang dilantik iaitu Utusan Melayu (Malaysia) Berhad pada 7 Oktober 2019 melalui Penggulangan Sukarela Pemiutang (*Creditors' Voluntary Liquidation*).

Secara keseluruhannya, peruntukan sebanyak RM309.9 juta telah diterima daripada SKMM. Sebanyak RM267.7 juta telah dibayar kepada pembekal bagi pengedaran 312,353 unit tablet dan sebanyak RM700 ribu telah digunakan oleh KPM untuk kos pengurusan projek yang merangkumi kos operasi dan logistik bagi mengendalikan pemberian tablet kepada guru-guru di 11 negeri meliputi Fasa 1 hingga Fasa 5. Baki peruntukan sebanyak RM41.5 juta telah dipulangkan kepada SKMM pada 13 November 2020.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 29 SEPTEMBER 2021 (RABU)

SOALAN

PUAN TEO NIE CHING minta **MENTERI KANAN PENDIDIKAN** menyatakan pelan jangka masa panjang sistematik dari KPM untuk menangani isu gangguan seksual di sekolah memandangkan 275 testimoni oleh para bekas pelajar dan pelajar semasa mengenai kes-kes gangguan seksual, buli dan pemeriksaan haid.

JAWAPAN

Tuan Yang di-Pertua,

KPM sentiasa komited untuk memastikan persekitaran sekolah adalah selamat. Bagi pencegahan gangguan seksual di sekolah, KPM melalui perkhidmatan bimbingan dan kaunseling melaksanakan intervensi dengan menggunakan Modul Intervensi Jenayah Seksual Kanak-Kanak di Sekolah (IHSAN). Modul ini antara lain, memberi pemahaman serta meningkatkan kesedaran murid berkaitan jenayah seksual.

Program kesedaran berterusan turut dilaksanakan oleh KPM dengan kerjasama agensi kerajaan atau bukan kerajaan dalam menyebarkan maklumat psikopendidikan, kesihatan reproduktif dan ancaman gangguan seksual.

Selain itu, Pegawai Perhubungan Sekolah (PPS) dari Polis Diraja Malaysia (PDRM) yang ditempatkan di semua sekolah KPM turut memainkan peranan untuk memastikan keselamatan murid-murid

termasuk salah laku jenayah seperti gangguan seksual dan masalah disiplin sentiasa dipantau. PPS mengadakan lawatan ke sekolah sebanyak 2 kali sebulan bagi memberikan ceramah berkaitan pencegahan jenayah kepada murid dan juga sebaran maklumat di papan kenyataan PPS yang disediakan di semua sekolah.

Sekiranya berlaku sebarang kejadian gangguan seksual melibatkan murid, Guru Bimbingan dan Kaunseling akan memainkan peranan untuk memberi sokongan kepada murid melalui sesi kaunseling bagi memastikan kesejahteraan, kesihatan, keselamatan serta kebajikan murid terjaga.

Sekiranya pelaku adalah penjawat awam dan didapati bersalah, maka tindakan tatatertib akan dikenakan di bawah Peraturan-Peraturan Pegawai Awam (Kelakuan dan Tatatertib 1993). Pelaku tersebut juga boleh dikenakan hukuman di bawah Akta Kanak Kanak 2001 ataupun di bawah Akta Kesalahan-kesalahan Seksual Terhadap Kanak-Kanak 2017 (Akta 792). Selain itu, pelaku turut boleh dikenakan hukuman di bawah Kanun Keseksaan (Seksyen 354 atau Seksyen 509). Penjawat awam yang sedang dalam prosiding tatatertib/mahkamah tidak akan dipertimbangkan untuk urusan kenaikan pangkat sehingga dibebaskan daripada pertuduhan atau selesai hukuman tatatertib.

Penjawat awam yang didapati bersalah boleh dikenakan tindakan tatatertib seperti amaran, denda, lucut hak emolumen, tangguh pergerakan gaji, turun gaji, turun pangkat atau buang kerja.

Untuk makluman Ahli Yang Berhormat, KPM sedang meneliti secara menyeluruh perkara berkaitan peraturan-peraturan disiplin termasuk salah laku gangguan seksual melibatkan warga sekolah. Antara lain, penelitian akan dibuat terhadap proses aduan dan siasatan, khidmat sokongan kepada mangsa, perlindungan kepada *whistle blower* dan hukuman tatatertib kepada pelaku. Peraturan baharu yang lebih komprehensif akan dirangka bagi menggantikan peraturan sedia ada.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
(WANGSA MAJU)**

TARIKH : 29 SEPTEMBER 2021 (RABU)

SOALAN

DATIN PADUKA DR. TAN YEE KEW [WANGSA MAJU] minta **MENTERI PERTANIAN DAN INDUSTRI MAKANAN** menyatakan berapa jumlah kerugian sektor pertanian akibat pandemik COVID-19 dan apakah bantuan daripada Kementerian kepada petani-petani yang mengalami kerugian tersebut.

JAWAPAN

Tuan Yang Di Pertua,

Penularan pandemik COVID-19 dan pelaksanaan Perintah Kawalan Pergerakan (PKP) sememangnya telah memberi kesan kepada sektor agromakanan negara secara langsung dan tidak langsung di mana kelancaran rantaian makanan terganggu antaranya pengeluaran, pengedaran, pemasaran dan peruncitan produk hasil pertanian dan industri makanan.

Berdasarkan Laporan Survei Khas Covid-19 Kepada Ekonomi dan Individu (Pusingan 1) yang dikeluarkan oleh Jabatan Perangkaan Malaysia (DOSM) pada Mac 2021, sektor pertanian mencatatkan peratusan kehilangan pekerjaan sebanyak 21.9%.

Kesan pandemik COVID-19 kepada subsektor tanaman menyebabkan saiz penanaman ladang terpaksa dikecilkan, jadual penanaman disusun semula, penjualan hasil tuaian semakin berkurangan serta pertukaran kepada tanaman lain yang boleh memberikan pulangan segera kepada pengusaha. Subsektor ternakan turut terjejas akibat peningkatan kos input penternakan, pengurangan pengeluaran dan kebolehpasaran ternakan serta hasil ternakan. Manakala bagi subsektor perikanan pula, pengeluaran perikanan bagi tahun 2020 mengalami sedikit penurunan sebanyak 4.4% berbanding tahun 2019.

Bagi membantu golongan petani yang terjejas dan terus menggalakkan aktiviti pertanian dijalankan semasa pandemik, MAFI telah diperuntukkan Dana Jaminan Makanan (DJM) sebanyak RM1 bilion pada 27 Mac 2020. Jumlah ini tidak termasuk pelaksanaan Pakej Rangsangan Ekonomi (PRE) 2020 sebanyak RM50 juta yang merangkumi 918 perolehan dan projek kecil di seluruh negara bagi merangsang perniagaan kontraktor Bumiputera yang terkesan dengan kelembapan ekonomi yang disebabkan oleh kesan awal pandemik COVID-19 pada ketika itu.

Manakala DJM merangkumi pakej Pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) dan juga sebahagian Projek Khas Belanjawan 2021. Penyediaan DJM ini merupakan langkah intervensi untuk membantu pengusaha pertanian dengan segera, serta secara tidak langsung telah menyuntik dana untuk mengaktifkan kembali rantai ekonomi agromakanan bermula daripada pengeluar sehinggalah ke peringkat hiliran dan runcit.

Selain daripada bantuan-bantuan dan inisiatif menerusi Dana Jaminan Makanan dan Pakej Rangsangan Ekonomi yang diberikan, Kementerian ini melalui Jabatan dan agensi terlibat membantu kumpulan sasaran yang terjejas akibat dari pandemik COVID-19 ini seperti berikut:

- i. Program Bakul Makanan di bawah program MAFI Prihatin yang memberi sumbangan berbentuk makanan bagi meringankan bebanan golongan yang terjejas akibat pandemik COVID 19. Seramai 86,246 penerima di 326 lokasi seluruh negara telah

menerima manfaat yang disampaikan melalui pelbagai jabatan dan agensi kementerian pada tahun ini sehingga Julai 2021;

- ii. Sebanyak 35,681 surat kelulusan kebenaran beroperasi telah dikeluarkan semasa tempoh pandemik bagi tempoh Januari hingga Ogos 2021 bagi memastikan pengeluaran hasil dan rantaian nilai makanan tidak terjejas memandangkan aktiviti pertanian juga telah dikategorikan sebagai perkhidmatan penting negara (*essential services*) dan dibenarkan beroperasi sepanjang masa;
- iii. Sebanyak 48,281 latihan secara atas talian telah dibuat bagi meningkatkan kemahiran dan khidmat nasihat sama ada melalui panggilan telefon, panggilan video, webinar serta melalui platform media sosial seperti facebook dan aplikasi whatsapp yang melibatkan 50,182 petani dan 436,487 pengunjung melalui media sosial;
- iv. Platform pemasaran digital (e-dagang) bagi membantu meningkatkan ruang pemasaran para petani dan pengusaha melalui platform e-dagang seperti Agrobazaar Online dan NekmatBiz serta kerjasama strategik dengan syarikat swasta seperti Lazada, Shopee dan AirAsia;
- v. Projek Rezeki Ternak dengan jumlah RM1.94 juta telah dibelanjakan pada tahun 2020 melibatkan 1,398 penternak, manakala sejumlah RM0.96 juta diperuntukkan untuk tahun 2021;
- vi. Program Pembangunan Industri Ruminan (PROPER) yang melibatkan bantuan geran pemadanan 70% kerajaan dan 30% penternak dan berjaya mengagihkan 252 ekor bebiri kepada 12 orang penternak dan 286 ekor lembu kepada 13 orang penternak pada tahun 2020;
- vii. Program Peningkatan Pengeluaran Tenusu Negara berjumlah RM4.0 juta diperuntukkan secara geran pemadanan 30%

Kerajaan dan 70% secara agihan lembu tenusu dara bunting kacukan Friesian dari Australia dan beserta peralatan;

- viii. Pemberian kadar bayaran sewaan premis kerajaan sebanyak 50% kepada pengusaha di semua kemudahan Ladang Satelit di Taman Kekal Pengeluaran Ruminan (TKPR) dan operator swasta di rumah sembelih serta program;
- ix. Memberikan penangguhan pembaharuan semua lesen vesel penangkapan ikan sehingga 1 Oktober 2021 serta meneruskan pemberian Elaun Sara Hidup Nelayan Laut dan Darat dengan kadar yang telah ditingkatkan;
- x. Memberikan pengecualian syarat minimum pendaratan ikan melalui Laporan Operasi Vesel (LOV) dan purata keaktifan *Mobile Transducer Unit* (MTU) untuk pembaharuan lesen vesel penangkapan ikan laut dalam Zon C2; dan
- xi. Program Geran Pemadanan *Change Upgrade Products* (CUP) bagi aktiviti ekonomi hiliran dalam sektor agromakanan yang memanfaatkan seramai 154 orang pengusaha industri asas tani pada tahun 2020 dengan peruntukan bernilai RM4 juta, manakala pada tahun 2021, sehingga kini seramai 141 pengusaha telah menerima manfaat dengan peruntukan bernilai RM4.4 juta.

Kementerian berharap agar inisiatif-inisiatif termasuk program dan projek serta bantuan khas yang dilaksanakan dapat membantu para petani, nelayan dan penternak serta pengusaha agromakanan yang terjejas disebabkan COVID-19 pandemik dalam meneruskan kelangsungan perusahaan masing-masing dan memberikan sumber pendapatan yang mampan. MAFI akan terus mengambil segala tindakan bagi memastikan kepentingan kumpulan sasar sektor agromakanan terus terjamin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATO' WIRA HAJI AMIRUDDIN
BIN HAJI HAMZAH [KUBANG PASU]**

TARIKH : 29 SEPTEMBER 2021 (RABU)

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **MENTERI KEWANGAN** menyatakan berapa bayaran khidmat hutang Kerajaan bagi setiap ringgit hasil yang dikutip pada tahun 2020. Memandangkan jumlah peruntukan Kumpulan Wang COVID-19 telah meningkat RM45 bilion berbanding yang diluluskan untuk tahun 2021, apakah rancangan Kerajaan untuk menampung kos pinjaman tambahan tersebut.

JAWAPAN

Tuan Yang di-Pertua,

1. Pada tahun 2020, bayaran khidmat hutang Kerajaan adalah berjumlah 34.5 billion ringgit atau 15.3% daripada jumlah hasil. Ini bermakna sebanyak lebih 15 sen daripada setiap ringgit hasil yang diterima oleh Kerajaan terpaksa dibelanjakan untuk membuat bayaran khidmat hutang.
2. Memandangkan ruang fiskal sedia ada yang kecil, Kerajaan terpaksa meneruskan amalan pembiayaan defisit fiskal. Oleh yang demikian, peningkatan peruntukan Kumpulan Wang COVID-19 akan menambah jumlah pinjaman Kerajaan, yang sudah tentunya akan menambah beban bayaran khidmat hutang.
3. Kos bayaran khidmat hutang dibiayai melalui hasil Kerajaan Persekutuan seperti yang diperuntukkan di dalam Perlembagaan Persekutuan Perkara 98(1)(b) iaitu segala caj hutang adalah di bawah perbelanjaan tanggungan Kerajaan Persekutuan yang mendahului peruntukan operasi yang lain. Ini menunjukkan Kerajaan kekal komited untuk membiayai bayaran khidmat hutang mengikut jadual yang ditetapkan setiap tahun dan sentiasa memastikan bayaran khidmat hutang kekal terus.
4. Keutamaan Kerajaan buat masa ini adalah untuk memastikan negara dapat menangani krisis pandemik dan seterusnya kembali pulih ke arah trajektori pertumbuhan seperti sebelum krisis melalui bajet mengembang. Langkah-langkah untuk mengekang kenaikan nisbah keberhutangan kepada hasil hanya akan dilaksanakan selepas krisis berakhir dan ekonomi kembali pulih dan stabil. Kerajaan telahpun merangka strategi konsolidasi fiskal dan meluaskan asas hasil yang dijangka dapat menyediakan ruang fiskal yang lebih besar, mengurangkan paras hutang dan beban bayaran khidmat hutang secara beransur-ansur dalam jangka sederhana.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 29 SEPTEMBER 2021 (RABU)

SOALAN

TUAN NGA KOR MING [TELUK INTAN] minta **MENTERI KEWANGAN** menyatakan langkah Kerajaan untuk mengatasi kredit rating negara yang telah diturunkan taraf oleh *International Fitch Rating* pada tahun 2020 dan rancangan kerajaan untuk membayar hutang negara yang kini telah melepasi paras merbahaya RM1.2 trilion.

JAWAPAN

Tuan Yang di-Pertua,

1. Krisis akibat pandemik COVID-19 ini telah menyebabkan kebanyakan kerajaan di seluruh dunia melaksanakan langkah rangsangan bagi menyelamatkan ekonomi yang terjejas teruk. Langkah ini secara umumnya meningkatkan paras defisit fiskal dan hutang negara-negara berkenaan. Sejak awal tahun lepas, ketiga-tiga agensi penarafan antarabangsa utama, iaitu Fitch Ratings, Moody's Investors Service dan S&P Global Ratings, secara keseluruhannya telah mengambil sekitar 100 tindakan penurunan penarafan dan lebih 120 semakan semula tinjauan penarafan, atau *outlook* dengan izin, kepada negatif.

2. Malaysia turut tidak terkecuali daripada tindakan ini. Tindakan Fitch sebahagian besar didorong oleh kesan krisis pandemik COVID-19 ke atas ekonomi dan seterusnya kedudukan kewangan negara. Perlu dimaklumkan pada masa tersebut, terdapat ketidakpastian yang tinggi

mengenai tinjauan ekonomi semua negara memandangkan bekalan dan keberkesanan vaksin dunia masih belum diketahui sepenuhnya.

Tuan Yang di-Pertua,

3. Sejak krisis bermula, keutamaan Kerajaan adalah memastikan negara dapat menangani kesan krisis dan seterusnya kembali ke atas landasan pertumbuhan seperti sebelum krisis melalui bajet mengembang. Salah satu matlamat utama Pelan Pemulihan Negara yang dilancarkan bulan Jun yang lepas adalah menentukan Program Imunisasi COVID-19 Kebangsaan mencapai imuniti kelompok secepat yang mungkin bagi membolehkan sektor-sektor ekonomi dan sosial dibuka semula dengan lebih selamat. Ini merupakan kunci utama kejayaan negara keluar dari kancan pandemik COVID-19. Oleh itu, masih terdapat keperluan untuk Kerajaan menyediakan penampan fiskal, atau dengan izin fiskal buffers, melalui langkah pinjaman tambahan dalam menyokong strategi menyelamatkan nyawa dan memulihkan ekonomi. Walaupun Kerajaan terpaksa meningkatkan hutangnya untuk membiayai pakej bantuan dan rangsangan ekonomi serta program vaksinasi, ia masih mampu dan tidak pernah ketinggalan daripada memenuhi obligasi bayaran khidmat hutangnya setakat ini.

4. Walau bagaimanapun, Kerajaan komited untuk memperbaiki kedudukan fiskal negara setelah krisis berakhir dan ekonomi pulih dan kembali stabil bagi memastikan daya tahan fiskal di masa hadapan. Kerajaan telahpun merangka strategi konsolidasi fiskal dan peningkatan asas hasil yang dijangka dapat menyediakan ruang fiskal yang lebih besar dan mengurangkan paras hutang dalam jangka sederhana. Ini termasuklah strategi untuk meluaskan asas hasil, mengukuhkan pentadbiran dan pematuhan cukai, meningkatkan kecekapan perbelanjaan serta menggubal Akta Tanggungjawab Fiskal yang dijangka dapat mengukuhkan tadbir urus dan disiplin fiskal. Selain itu, usaha menambah baik tadbir urus dan pembaharuan institusi sedang dilaksanakan. Saya yakin kesemua langkah-langkah berkenaan dijangka akan membantu bukan sahaja memperbaiki kedudukan fiskal negara, malah menambah baik penarafan kredit negara pada masa hadapan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 29 SEPTEMBER 2021 (RABU)

SOALAN

TUAN PANG HOK LIONG [LABIS] minta **MENTERI KEWANGAN** menyatakan Kerajaan telah menggunakan simpanan negara dan pinjaman untuk membiayai pakej rangsangan ekonomi susulan pandemik COVID-19, nyatakan :-

- (a) jumlah pinjaman bagi setiap bulan dari Januari 2021 sehingga Ogos 2021 dan nama pemberi pinjaman ; dan
- (b) jumlah rizab antarabangsa Bank Negara setakat bulan Ogos 2021 dan jumlah hutang luar negeri dan jumlah rizab negara setakat Ogos 2021.

JAWAPAN

Tuan Yang di-Pertua,

1. Pinjaman kasar Kerajaan Persekutuan sehingga Ogos 2021 adalah berjumlah 150.8 bilion ringgit yang diperoleh melalui terbitan instrumen berikut, iaitu:

- Sekuriti Kerajaan Malaysia (atau MGS) sebanyak 56.5 bilion ringgit;
- Pelaburan Kerajaan Malaysia (atau MGII) sebanyak 52.5 bilion ringgit;
- Bil perbendaharaan sebanyak 36.5 bilion ringgit; dan
- Pinjaman luar pesisir melalui terbitan Sukuk Global 2021 sebanyak 5.3 bilion ringgit.

2. Daripada jumlah tersebut, sebanyak 65.5 bilion ringgit adalah untuk membiayai semula (atau *refinance*, dengan izin) hutang terdahulu yang matang dan 85.3 bilion ringgit untuk membiayai defisit fiskal termasuk, dengan izin *prefund* hutang yang akan matang dalam tahun semasa.

3. Dalam membiayai defisit fiskal pula, terimaan pinjaman ini digunakan untuk perbelanjaan pembangunan sebanyak 40 bilion ringgit dan Kumpulan Wang COVID-19 (atau KWC) sebanyak 20.8 bilion ringgit. Antara perbelanjaan utama KWC ialah Bantuan Prihatin Rakyat, Bantuan Prihatin Nasional, Program Subsidi Upah, Geran Khas Prihatin, perbelanjaan berkaitan COVID-19, sokongan bantuan sosial untuk golongan mudah terjejas dan projek berskala kecil.

4. Sehingga akhir Jun 2021, pemegang kertas hutang Kerajaan Persekutuan terdiri daripada pegangan pemastautin (atau *resident holders*, dengan izin) sebanyak 72.6 peratus manakala bakinya bukan pemastautin (atau *non-resident holders*, dengan izin). Institusi kukuh dan berjangka panjang tempatan seperti Kumpulan Wang Simpanan Pekerja, syarikat insurans dan Kumpulan Wang Persaraan (Diperbadankan)

merupakan pemegang pemastautin (atau *resident holders*, dengan izin) utama merangkumi 31.6 peratus daripada jumlah hutang Kerajaan Persekutuan. Manakala pemegang bukan pemastautin (atau *non-resident holders*, dengan izin) utama pula terdiri daripada pengurus dana serta bank pusat, supranasional dan kerajaan, dana persaraan dan institusi perbankan.

Tuan Yang diPertua,

5. Sehingga akhir Ogos 2021, jumlah hutang luar pesisir adalah sebanyak 30.5 bilion ringgit. Di samping itu, paras rizab antarabangsa Bank Negara Malaysia atau rizab negara berjumlah 116.3 bilion US dolar atau bersamaan dengan 483.6 bilion ringgit. Paras rizab ini memadai untuk membiayai 8.3 bulan import tertangguh dan 1.3 kali jumlah hutang luar negeri jangka pendek. Paras rizab ini melebihi tanda aras amalan antarabangsa sebanyak 3 bulan import tertangguh. Untuk makluman Yang Berhormat juga, Kerajaan tidak pernah menggunakan rizab antarabangsa untuk membiayai sebarang pakej rangsangan dan pelan pemulihan ekonomi susulan pandemik COVID-19 setakat ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN WONG KAH WHO [IPOH TIMUR]

TARIKH : 29 SEPTEMBER 2021 (RABU)

SOALAN

TUAN WONG KAH WOH [IPOH TIMUR] minta **MENTERI KEWANGAN** menyatakan sama ada Kerajaan berhasrat untuk mengarahkan moratorium pinjaman bank dilaksanakan tanpa faedah tambahan terhadap peminjam-peminjam dalam masa pandemik COVID-19.

JAWAPAN

Tuan Yang di-Pertua,

1. Kerajaan berpandangan bahawa bantuan moratorium pinjaman perlu dilaksanakan secara berhemah bagi memastikan negara kita berada di kedudukan yang baik dan mempunyai sumber yang mencukupi dalam menyokong pemulihan jangka panjang, terutamanya apabila ekonomi dibuka semula. Adalah penting untuk Kerajaan berlaku adil dan mengambil kira implikasi langkah ini kepada bukan sahaja rakyat lain terutamanya dalam kalangan pendeposit, malah juga dalam konteks daya tahan dan kemampuan ekonomi negara kita untuk kembali pulih seperti sedia kala.

2. Setelah mempertimbangkan perkara ini, pihak bank telah bersetuju untuk tidak mengkompaun faedah (iaitu mengenakan faedah atas faedah) atau mengenakan faedah penalti dalam tempoh moratorium selama 6 bulan bagi semua produk pinjaman yang mendapat bantuan moratorium.

Tuan Yang di-Pertua,

3. Kerajaan juga ingin menekankan bahawa bantuan bayaran balik pinjaman terus disediakan kepada mereka yang terjejas, dengan hampir kesemua permohonan bantuan bayaran balik pinjaman diluluskan oleh bank. Permohonan masih dibuka kepada peminjam yang memerlukan dan mereka hanya perlu menghubungi bank masing-masing.

4. Walau bagaimanapun, sebagai usaha mengurangkan beban rakyat, Kementerian Kewangan telah meminta institusi perbankan untuk mengusahakan pengecualian bayaran faedah bagi penerima moratorium pinjaman bank melibatkan penerima moratorium dari kumpulan lima puluh peratus (50%) terbawah daripada keseluruhan rakyat Malaysia untuk sepanjang tempoh tiga (3) bulan pada suku keempat 2021.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN HANNAH YEOH TSEOW SUAN
[SEGAMBUT]**

TARIKH : 29 SEPTEMBER 2021 (RABU)

SOALAN

PUAN HANNAH YEOH TSEOW SUAN [SEGAMBUT] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik terkini Semakan Pesalah Jenayah Seksual Terhadap Kanak-kanak mengikut pecahan negeri, jumlah permohonan, status semakan, kekerapan mengemas kini data dan pecahan keputusan yang mempunyai rekod dan tidak mempunyai rekod.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat melalui Jabatan Kebajikan Masyarakat **menyimpan dan menyenggara maklumat berkenaan kanak-kanak di dalam suatu daftar yang dikenali sebagai Daftar Kanak-kanak. Maklumat pesalah kes kanak-kanak didaftarkan di bawah Daftar Kanak-Kanak ini adalah diperolehi daripada Pendaftar Mahkamah seluruh negara.** Sistem semakan pesalah jenayah seksual terhadap kanak-kanak telah dikuatkuasakan pada 1 April 2019.

Berdasarkan statistik terkini, Jabatan Kebajikan Masyarakat telah menerima **279 permohonan** bagi menyemak pesalah jenayah seksual kanak-kanak dari pelbagai agensi dan individu. Daripada jumlah permohonan tersebut, seramai **4,771 individu** telah disemak bagi tempoh 2019 hingga Julai 2021.

Berdasarkan statistik JKM, Negeri Selangor mencatatkan jumlah individu paling tinggi yang dimohon untuk membuat semakan pesalah jenayah seksual iaitu sebanyak **1,299 orang. Seterusnya** diikuti dengan Negeri Sarawak sebanyak **680** orang dan Negeri Kedah sebanyak **657** orang. Pecahan permohonan mengikut negeri bagi semakan pesalah jenayah seksual terhadap kanak-kanak adalah seperti berikut:

Pecahan Permohonan Semakan Mengikut Negeri

BIL.	NEGERI	SEHINGGA JULAI 2021 (KUMULATIF)	
		JUMLAH PERMOHONAN	JUMLAH INDIVIDU YANG DISEMAK
1.	Selangor	31	1,299
2.	Sarawak	7	680
3.	Kedah	83	657
4.	Sabah	14	537
5.	WPKL	69	535

BIL.	NEGERI	SEHINGGA JULAI 2021 (KUMULATIF)	
		JUMLAH PERMOHONAN	JUMLAH INDIVIDU YANG DISEMAK
6.	N.Sembilan	1	352
7.	Kelantan	39	204
8.	Terengganu	3	181
9.	Perak	5	131
10.	Pahang	10	77
11.	Johor	6	40
12.	Perlis	4	21
13.	P.Pinang	5	33
14.	Melaka	2	24
15.	Labuan	0	0
JUMLAH		279	4,771

Tuan Yang di-Pertua,

Sistem semakan pesalah jenayah seksual kanak-kanak bukanlah satu-satunya kaedah menghalang jenayah, namun ia **merupakan pendekatan bagi melindungi kanak-kanak dan mengekang jenayah kanak-kanak daripada berlaku serta berulang.** Seseorang yang ingin mengambil pekerja dalam bidang berkaitan pengurusan kanak-kanak boleh membuat semakan untuk memastikan individu yang diambil bekerja bebas daripada rekod jenayah seksual terhadap kanak-kanak.

Berdasarkan rekod JKM, **semua individu yang disemak tidak mempunyai rekod jenayah seksual terhadap kanak-kanak.** Maklumat pelaku yang telah disabitkan atas apa-apa kesalahan terhadap kanak-kanak yang **diperolehi dari Pendaftar Mahkamah akan dikemaskini di dalam sistem semakan pesalah jenayah seksual kanak-kanak setiap tiga (3) bulan sekali.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN TEH KOK LIM [TAIPING]

TARIKH : 29 SEPTEMBER 2021 (RABU)

SOALAN

TUAN TEH KOK LIM [TAIPING] minta **MENTERI KEWANGAN** menyatakan rancangan beliau dalam menangani kejatuhan kutipan hasil untuk tahun 2020 dan 2021 ketika negara berdepan melawan pandemik COVID-19.

JAWAPAN

Tuan Yang di-Pertua,

1. Pada tahun 2020, hasil Kerajaan Persekutuan yang dikutip berjumlah 225.1 bilion ringgit, iaitu kurang berbanding anggaran asal Belanjawan 2020 yang berjumlah 244.5 bilion ringgit. Perbezaan sebanyak 19.4 bilion ringgit ini adalah disebabkan oleh kesan pandemik COVID-19 yang telah menjejaskan perolehan perniagaan dan juga pendapatan isi rumah. Daripada jumlah hasil tersebut, hasil cukai berjumlah 154.4 bilion ringgit (atau 69%), manakala selebihnya 70.7 bilion ringgit (atau 31%) adalah hasil bukan cukai. Bagi tahun 2021 pula, anggaran asal kutipan hasil Kerajaan Persekutuan adalah berjumlah 236.9 bilion ringgit. Namun, ia perlu disemak semula memandangkan kutipan hasil masih terkesan berikutan pelaksanaan pelbagai peringkat penutupan ekonomi untuk mengawal penularan pandemik COVID-19.

2. Sejak krisis bermula, keutamaan Kerajaan ialah memastikan negara dapat menangani kesan krisis dan seterusnya kembali ke atas landasan pertumbuhan seperti sebelum krisis melalui bajet mengembang. Di bawah Pelan Pemulihan Negara (atau PPN) yang dilancarkan bulan Jun yang lepas adalah langkah penutupan ekonomi secara bersasar dan

berperingkat yang masih diperlukan bagi mengawal penularan pandemik COVID-19. Bagi membantu rakyat yang terkesan daripada langkah berkenaan, beberapa pakej bantuan dan rangsangan telah disalurkan yang antara lain merangkumi pemberian bantuan tunai, pembiayaan mikro kredit, geran khas dan insentif bagi pengambilan pekerja.

3. Matlamat utama PPN juga ialah menentukan Program Imunisasi COVID-19 Kebangsaan mencapai imuniti kelompok secepat yang mungkin bagi membolehkan sektor-sektor ekonomi dan sosial dibuka semula dengan lebih selamat. Ini merupakan kunci utama kejayaan negara untuk keluar dari kancah pandemik COVID-19, memulihkan ekonomi dan secara tidak langsung meningkatkan kutipan hasil Kerajaan Persekutuan.

4. Sebagai langkah langsung, Kerajaan akan terus memperkukuh dan memaksimum kutipan hasil Kerajaan Persekutuan serta meningkatkan keapungan cukai melalui inisiatif pembaharuan cukai. Antaranya ialah pengenaan cukai ke atas rokok elektronik dan vape. Sebuah pasukan petugas pelbagai agensi juga telah ditubuhkan dengan penglibatan Suruhanjaya Pencegahan Rasuah Malaysia dan Pusat Pencegahan Jenayah Kewangan Nasional bagi menambah baik kutipan hasil melalui pembasmian aktiviti penyeludupan, terutama barangan berduti tinggi. Kawalan ke atas pelesenan dan pengimportan rokok dan produk tembakau diperketatkan dengan membekukan pengeluaran lesen import rokok baharu, memperketatkan pembaharuan lesen import rokok melalui pengenaan kuota import, menghadkan aktiviti *transshipment* rokok di pelabuhan tertentu sahaja dan menjadikan rokok dan produk tembakau sebagai barangan berduti di semua Pulau Bebas Cukai.

5. Di samping itu, Kerajaan juga akan menggubal Strategi Hasil Jangka Sederhana, atau dengan izin *Medium-Term Revenue Strategy*, dengan mengkaji dan menambah baik sistem percukaian sedia ada, memperluas asas hasil, memanfaatkan potensi sektor tidak formal, mengurangkan amalan terkurang lapor dan isytihar, mengurangkan ketirisan cukai serta menambah baik pentadbiran cukai melalui pengurusan data yang berkesan dan mengintegrasikan data dengan agensi berkaitan. Langkah percukaian lain yang sedang dalam proses pelaksanaan ialah memperkenalkan nombor cukai pendapatan, atau dengan izin *tax identification number*, bagi setiap individu dan entiti

pembayar cukai. Ia bertujuan supaya semua individu dan entiti yang layak memenuhi obligasi mereka untuk membayar cukai.

6. Kerajaan juga sedang meneliti cadangan pelaksanaan Program Khas Pengakuan Sukarela, atau dengan izin, *Special Voluntary Disclosure Program*, bagi cukai tidak langsung yang ditadbir oleh Jabatan Kastam Diraja Malaysia (atau JKDM). Melalui program ini, pembayar cukai digalakkan untuk tampil secara sukarela bagi mengisytiharkan apa-apa cukai yang tidak, terkurang atau tersilap dilaporkan kepada JKDM tanpa dikenakan denda. Selain itu, Sijil Pematuhan Cukai akan diperkenalkan sebagai satu pra-syarat baharu yang perlu dipatuhi oleh penender semasa mengambil bahagian dalam perolehan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK IGNATIUS DARELL LEIKING
(PENAMPANG)**

TARIKH : 29 SEPTEMBER 2021 (RABU)

SOALAN

DATUK IGNATIUS DORELL LEIKING [PENAMPANG] minta **MENTERI PENGANGKUTAN** menyatakan adakah terdapat rancangan atau pelan untuk mengubah suai kapal terbang penumpang kepunyaan MAS menjadikan kapal terbang kargo untuk menampung peningkatan pesat permintaan perkhidmatan kargo udara sebagai sebahagian daripada perancangan pemulihannya.

JAWAPAN

Tuan Yang di-Pertua,

Bagi mengurangkan kesan penurunan permintaan perkhidmatan penerbangan penumpang yang mendadak disebabkan oleh penularan wabak COVID-19 dan sekatan perjalanan serta penutupan sempadan negara di seluruh dunia, Malaysia Airlines Berhad (MAB) telah mengambil inisiatif dengan menggunakan pesawat penumpang untuk menyediakan perkhidmatan kargo tanpa membawa penumpang.

Penyediaan perkhidmatan kargo seperti ini yang dikenali sebagai *Passenger-to-Cargo* (P2C) adalah menggunakan ruang *belly cargo* dalam pesawat. Di samping itu, MAB juga mengendalikan penerbangan *Cargo-in-Cabin* (CIC) di mana kargo diletakkan di tempat duduk penumpang, ruang penyimpanan *overhead*, almari dan di bawah tempat duduk penumpang. Kedua-dua penerbangan P2C dan CIC ini tidak memerlukan sebarang pengubahsuaian pesawat.

Pada tahun 2020, MAB telah mengendalikan sebanyak 1,612 penerbangan P2C dan CIC. Bagi tahun 2021 pula, sehingga 31 Julai 2021, MAB telah mengendalikan sebanyak 2,033 penerbangan P2C dan CIC. Antara destinasi utama MAB dalam menyediakan kedua-dua perkhidmatan kargo di atas adalah New Delhi, Madras, Mumbai, Sydney, Melbourne, Auckland, Beijing, Seoul, Narita, Kansai, Hong Kong, Yangon, Bangkok dan Manila.

Untuk makluman, penerbangan P2C dan CIC ini adalah langkah sementara MAB dalam usaha menjana pendapatan syarikat di bawah rancangan pemulihannya sementara menunggu permintaan terhadap perkhidmatan penerbangan penumpang kembali pulih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 29 SEPTEMBER 2021 (RABU)

SOALAN

TUAN NIK NAZMI BIN NIK AHMAD minta **MENTERI KANAN PENDIDIKAN** menyatakan apakah keputusan yang diambil Kementerian bagi SPM, STPM dan STAM 2021?

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited melakukan yang terbaik demi generasi masa depan negara. Walaupun berhadapan dengan situasi pandemik COVID-19 yang sangat mencabar, peperiksaan Sijil Pelajaran Malaysia (SPM) dan Sijil Tinggi Agama Malaysia (STAM) kendalian Lembaga Peperiksaan (LP) serta peperiksaan Sijil Tinggi Persekolahan Malaysia (STPM) kendalian Majlis Peperiksaan Malaysia (MPM) tahun 2021 akan tetap dilaksanakan.

Peperiksaan bertulis SPM dan STAM 2021 akan dilaksanakan pada bulan Mac 2022. Manakala, peperiksaan Semester 2 STPM 2021 akan dilaksanakan pada 25 hingga 28 Oktober 2021.

Pengurusan pengendalian peperiksaan SPM, STAM dan STPM 2021 adalah berpandukan kepada Garis Panduan Pengurusan Pentaksiran Pusat dan Peperiksaan Awam yang terkandung dalam Garis Panduan Pengurusan dan Pengoperasian Sekolah 3.0 dikeluarkan oleh KPM. Garis panduan ini merupakan rujukan kepada

pegawai bahagian di KPM, jabatan pendidikan negeri (JPN), pejabat pendidikan daerah (PPD), pentadbir serta guru di sekolah, ibu bapa dan pihak yang terlibat tentang pengoperasian sekolah termasuk pengurusan pengendalian peperiksaan awam.

KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi persekolahan ini membolehkan guru dan pihak sekolah merancang serta melaksanakan intervensi, pengukuhan dan pengayaan secara intensif, termasuklah kepada calon SPM dan STAM 2021. Pelanjutan ini juga, akan memberi peluang kepada calon SPM dan STAM 2021 untuk membuat persediaan rapi bagi menghadapi peperiksaan.

KPM juga telah mengumumkan bahawa sekolah akan dibuka untuk sesi pengajaran dan pembelajaran (PdP) secara bersemuka mulai 3 Oktober 2021 bagi negeri kumpulan A dan 4 Oktober 2021 bagi negeri kumpulan B. Pembukaan sekolah akan dibuat secara berperingkat mengikut fasa dalam Pelan Pemulihan Negara (PPN) dengan memberi keutamaan kepada murid kelas peperiksaan.

Sebagai contoh, murid Semester 2 STPM 2021 yang bakal menduduki peperiksaan pada 25 hingga 28 Oktober 2021 akan mengikuti sesi PdP secara bersemuka mulai 3 Oktober 2021. Ini memberi peluang kepada guru untuk memberi bimbingan secara intensif kepada calon sebelum mereka menduduki peperiksaan.

KPM yakin bahawa usaha-usaha ini akan dapat memastikan calon SPM, STAM dan STPM 2021 mempunyai ruang dan peluang untuk membuat persiapan rapi sebelum menduduki peperiksaan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : TUAN SYED SADDIQ
BIN SYED ABDUL RAHMAN [MUAR]**

TARIKH : 29 SEPTEMBER 2021 (RABU)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KEWANGAN** menyatakan komitmen Kerajaan untuk megkaji dan melaksanakan cukai keuntungan besar (*windfall tax*) untuk membantu membiayai pelan pemulihan dan strategi keluar (*exit strategy*) negara. Antara desakan untuk mengenakan cukai *windfall* adalah kepada syarikat pengeluar sarung tangan.

JAWAPAN

Tuan Yang di-Pertua,

1. Untuk makluman Ahli Yang Berhormat, *windfall profit levy* atau levi keuntungan luar biasa pada masa ini hanya dikenakan ke atas komoditi buah kelapa sawit berdasarkan nilai ambang harga pasaran minyak sawit mentah (atau CPO) yang dikeluarkan oleh Lembaga Minyak Sawit Malaysia secara bulanan.
2. Penggubalan Akta Levi Keuntungan Luar Biasa 1998 tidak berbentuk spesifik bagi mengenakan levi ke atas komoditi buah kelapa sawit sahaja. Akta ini boleh digunapakai bagi mengenakan levi ke atas apa-apa barangan yang ditentukan oleh Menteri Kewangan. Namun sejak Akta ini berkuatkuasa, levi belum pernah dikenakan ke atas barangan siap pengguna atau barangan pengilangan tempatan. Ini kerana levi dikenakan ke atas keuntungan yang melebihi paras ambang tertentu, yang mana adalah sukar untuk menentukan harga pasaran yang seragam

bagi barangan siap pengguna atau produk pengilangan tempatan yang mempunyai pelbagai jenis, standard, spesifikasi serta gred yang berbeza-beza mengikut permintaan pasaran.

3. Sehubungan itu, Kerajaan buat masa ini tidak bercadang untuk mengenakan levi keuntungan luar biasa ke atas produk sarung tangan getah yang menikmati keuntungan tambahan berikutan lonjakan permintaan sarung tangan getah di seluruh dunia susulan pandemik COVID-19, mahupun kepada lain-lain perniagaan yang menjana keuntungan berganda semasa krisis kesihatan melanda dunia.

4. Sungguhpun tidak dikenakan levi keuntungan luar biasa, industri pengeluaran sarung tangan getah turut menyumbang *spill over effects* kepada ekonomi negara dari segi cukai langsung dan cukai tidak langsung khususnya cukai pendapatan syarikat yang meningkat, di samping dapat terus menyediakan peluang pekerjaan semasa krisis COVID-19. Hasil keuntungan tambahan yang diperoleh industri sarung tangan getah semasa pandemik COVID-19 juga boleh digunakan oleh industri untuk terus membuat pelaburan semula dan mendorong pihak pelabur mengembangkan lagi perniagaannya di negara ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN MUHAMMAD BAKHTIAR BIN WAN
CHIK [BALIK PULAU]**

TARIKH : 29 SEPTEMBER 2021 (RABU)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta
MENTERI PELANCONGAN, SENI DAN BUDAYA menyatakan:

- a) apakah pelan pemulihan sedia ada memadai memandangkan UNWTO telah menjangkakan industri pelancongan hanya akan pulih menjelang 2023; dan
- b) Sejauh manakah usahasama Kementerian bersama agensi lain dalam mementingkan gerak kerja berteraskan data dalam mencapai sasaran pemulihan pelancongan Negara

JAWAPAN

Tuan Yang di-Pertua,

1. Fokus utama Pelan Pemulihan Pelancongan Negara adalah untuk merencanakan pelancongan domestik seluruh negara bagi merangsang aktiviti dan perniagaan berasaskan pelancongan. Faktor ini didorong lagi dengan langkah berhati-hati oleh Kerajaan dalam merancang dan membuat keputusan berhubung pembukaan sempadan bagi pelancongan antarabangsa.
2. Menurut Pertubuhan Pelancongan Sedunia (UNWTO), industri pelancongan dunia hanya dijangka akan kembali rancak bermula tahun 2022 dan dijangkakan kembali ke prestasi pra-pandemik pada tahun 2024. Perlu diambil perhatian bahawa ini juga tertakluk kepada faktor-faktor utama seperti pembukaan sempadan antarabangsa negara-negara di seluruh dunia.
3. Dalam hal ini, sebagai permulaan, Pulau Langkawi telah dipilih sebagai destinasi rintis yang mula dibuka pada 16 September 2021. Inisiatif ini bakal memberi nafas baharu kepada pengusaha pelancongan di pulau tersebut dan menjadi titik permulaan dalam menyokong perniagaan berkaitan sektor pelancongan, penyesuaian dengan norma baharu dan kelangsungan penjana ekonomi. Program rintis ini juga dijadikan penanda aras untuk penyediaan dan memperkemas SOP bagi pembukaan lebih banyak gelembung, destinasi dan aktiviti pelancongan domestik di seluruh negara.
4. Data pada tahun 2019 menunjukkan bahawa perbelanjaan pelancong domestik yang bernilai RM103.2 billion adalah melebihi perbelanjaan pelancong asing. Ini membuktikan bahawa fokus kepada pelancongan domestik pada masa ini adalah asas yang kukuh untuk dijadikan pemangkin bagi industri pelancongan kembali bangkit, sementara menunggu Malaysia kembali bersedia menerima semula kehadiran pelancong asing. Dalam tempoh penutupan sempadan ini juga merupakan peluang yang baik untuk Kerajaan memanfaatkan potensi pasaran keluar

NO. SOALAN : 68

atau *outbound* negara. Untuk makluman, anggaran perbelanjaan *outbound* pada tahun 2019 adalah sebanyak RM44.7 bilion.

5. Bagi mencapai sasaran pemulihan pelancongan negara yang berdasarkan data, MOTAC bekerjasama dengan Kementerian Sains, Teknologi dan Inovasi (MOSTI) dan Kementerian Kesihatan Malaysia (KKM) dalam mempercepat proses pemberian vaksin kepada orang awam termasuk industri pelancongan dalam usaha membantu negara mencapai kadar vaksinasi sebanyak yang mungkin. Antaranya ialah bekerjasama dengan pihak Industri seperti Persatuan Hotel Malaysia (MAH), Persatuan Pemilik Hotel Malaysia (MAHO) serta Persatuan Konvensyen dan Pameran Malaysia (MACEOS) bagi penggunaan fasiliti hotel dan pusat konvensyen untuk dijadikan Pusat Pemberian (PPV).

6. Ini mengambil kira bahawa kadar vaksinasi adalah salah satu faktor utama yang diambil kira dalam mempertimbangkan kebenaran pengaktifan semula aktiviti secara berfasa di bawah Pelan Pemulihan Negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 29 SEPTEMBER 2021 (RABU)

SOALAN

PUAN NOORITA BINTI SUAL minta **MENTERI KANAN PENDIDIKAN** menyatakan apakah perancangan Kementerian dalam menghadapi pembukaan sekolah yang setakat ini dirancang pada bulan Oktober.

JAWAPAN

Tuan Yang di-Pertua,

Kementerian Pendidikan Malaysia (KPM) telah merangka satu pelan komprehensif pembukaan semula sekolah bagi memastikan murid dapat kembali belajar secara bersemuka di sekolah dalam keadaan selamat.

Dalam merangka pelan ini, KPM telah mengadakan sesi libat urus yang menyeluruh bagi mendapatkan input, pandangan serta cadangan berhubung pembukaan semula sesi persekolahan. Sesi libat urus ini melibatkan kumpulan pentadbir sekolah, guru dan juga wakil Persatuan Ibu Bapa dan Guru (PIBG) di negeri Perlis, Negeri Sembilan, Sarawak serta Wilayah Persekutuan Labuan. KPM juga telah mengadakan sesi libat urus melibatkan kumpulan pakar dari sektor kesihatan awam, pendidikan, psikologi kanak-kanak dan pediatrik. Sesi tersebut juga melibatkan wakil Kesatuan Perkhidmatan Perguruan Kebangsaan Malaysia (NUTP), Gabungan Majlis Guru Besar Malaysia dan Majlis Pengetua Sekolah Malaysia. Selain itu, KPM turut mendapatkan pandangan daripada calon Sijil Pelajaran Malaysia (SPM) tahun 2021, termasuk calon dalam kalangan Murid Berkeperluan Khas (MBK).

KPM juga telah membuat analisis amalan terbaik pembukaan semula sekolah di negara-negara lain bagi meneliti pendekatan yang berkesan dalam memastikan pengoperasian sekolah secara bersemuka dapat dilaksanakan dalam keadaan yang selamat.

Berdasarkan input daripada sesi libat urus dan dapatan analisis, KPM telah membuat penambahbaikan kepada kerangka asal pelan komprehensif pembukaan semula sekolah. Kerangka ini kemudiannya diperincikan bersama Kementerian Kesihatan Malaysia (KKM) dan Majlis Keselamatan Negara (MKN).

Mengambil kira situasi semasa, termasuk kadar vaksinasi dalam kalangan guru, anggota kumpulan pelaksana (AKP) dan pekerja perkhidmatan sokongan (PPS) serta pandangan KKM dan MKN, KPM telah mengumumkan bahawa sekolah akan dibuka untuk pengajaran dan

pembelajaran (PdP) bersemuka mulai 3 Oktober 2021 bagi negeri kumpulan A dan 4 Oktober 2021 bagi negeri kumpulan B. Pembukaan sekolah dibuat secara berperingkat mengikut fasa dalam Pelan Pemulihan Negara (PPN).

Bagi negeri di Fasa 1 PPN, murid kelas Tingkatan 6 Semester 2 dan kelas peperiksaan antarabangsa (IGCSE O-Level) akan hadir ke sekolah. Murid lain akan melaksanakan PdPR. Bagi negeri di Fasa 2 PPN pula, kehadiran ke sekolah adalah kumpulan murid di Fasa 1. Selain itu, bagi murid sekolah rendah, MBK di Sekolah Kebangsaan Pendidikan Khas (SKPK) dan Program Pendidikan Khas Integrasi (PPKI) akan mula hadir ke sekolah. Untuk sekolah menengah di fasa ini, MBK di Sekolah Menengah Kebangsaan Pendidikan Khas (SMKPK), Sekolah Menengah Pendidikan Khas Vokasional (SMPKV) dan PPKI akan mula hadir secara bersemuka. Selain itu, murid *International Baccalaureate Diploma* (IBD) Tahun 2, kelas peperiksaan antarabangsa (A-Level, Australia Higher School Certificate dan IBD) dan Program Prauniversiti Semester 3 di Sekolah Sukan Malaysia (SSM) turut mula hadir bersemuka. Murid lain akan melaksanakan PdPR.

Bagi negeri di Fasa 3 PPN, kehadiran ke sekolah adalah semua kumpulan murid di Fasa 2. Selain itu, prasekolah juga akan mula beroperasi. Bagi peringkat sekolah menengah, semua murid kelas peperiksaan awam, kelas peperiksaan antarabangsa dan Program Prauniversiti di SSM juga akan mula hadir ke sekolah. Murid lain akan melaksanakan PdPR.

Bagi negeri di Fasa 4 PPN, kehadiran ke sekolah adalah semua kumpulan murid di Fasa 3. Untuk sekolah rendah, selepas 2 minggu, murid Tahun 1, 2 dan 3 akan hadir ke sekolah. Selepas 2 minggu berikutnya, murid Tahun 4, 5 dan 6 pula akan mula hadir ke sekolah. Bagi sekolah menengah, selepas 2 minggu, murid Tingkatan 3 dan 4 akan hadir ke sekolah. Selepas 2 minggu berikutnya, murid peralihan, Tingkatan 1 dan 2 pula akan mula hadir ke sekolah.

Untuk makluman Ahli Yang Berhormat, KPM juga mengambil ketetapan untuk mengehadkan kapasiti murid di sekolah pada kadar 50 peratus enrolmen keseluruhan. Bagi tujuan tersebut, kaedah yang

digunakan adalah dengan mengehadkan kapasiti murid di dalam kelas kepada 50 peratus daripada jumlah murid dalam kelas tersebut. Justeru, sistem penggiliran murid hadir ke sekolah mengikut minggu akan dilaksanakan. Kaedah ini diguna pakai untuk semua kelas kecuali:

- i. MBK di SKPK/SMKPK/SMPKV dan PPKI;
- ii. murid di Tingkatan 6 Semester 2 dan IBD Tahun 2;
- iii. murid di sekolah asrama sepenuhnya;
- iv. murid kelas peperiksaan antarabangsa;
- v. murid prasekolah/tadika swasta/pusat perkembangan minda (4-6 tahun); dan
- vi. murid di Sekolah Kurang Murid (kurang 150 murid).

Selain daripada pendekatan di atas, KPM juga telah mengambil beberapa ketetapan lain bagi mewujudkan persekitaran sekolah yang selamat. KPM menetapkan bahawa hanya guru dan AKP yang lengkap divaksin sahaja dibenarkan untuk melaksanakan PdP di dalam kelas dan berinteraksi dengan murid. Selain itu, hanya PPS yang lengkap divaksin sahaja dibenarkan memasuki dan bekerja di dalam kawasan sekolah.

KPM juga memantau rapi kadar vaksinasi warga sekolah yang layak divaksin. Sehingga 24 September 2021, seramai 378,842 orang guru (91.5 peratus) telah lengkap divaksin. Manakala, seramai 58,612 orang AKP (87.4 peratus) telah lengkap divaksin. Selain daripada itu, seramai 92,448 orang PPS (78.6 peratus) melibatkan pekerja kawalan keselamatan, kebersihan, dewan makan, kantin sekolah dan pemandu van sekolah telah lengkap divaksin. KPM sentiasa bekerjasama rapat dengan Pasukan Petugas Khas Imunisasi COVID-19 (CITF) bagi memastikan kadar vaksinasi dalam kalangan guru, AKP dan PPS dapat terus ditingkatkan. Selain itu, KPM turut membantu CITF bagi memastikan vaksinasi kepada murid sekolah berumur 12 hingga 17 tahun di bawah Program Imunisasi COVID-19 Kebangsaan Remaja (PICK Remaja) dilaksanakan dengan teratur dan lancar.

KPM turut mewajibkan pemakaian pelitup muka kepada semua warga sekolah termasuk murid. Murid yang bergejala tidak dibenarkan hadir ke sekolah bagi mengelakkan risiko jangkitan dalam kawasan sekolah. Semua sekolah perlu memastikan pengudaraan yang baik di

dalam kelas. Murid akan makan di dalam kelas semasa waktu rehat dengan seliaan guru. Bagi kelas yang menggunakan penyaman udara pula, murid perlu makan di ruang terbuka dengan seliaan guru.

Pada masa yang sama, prosedur operasi standard (SOP) yang telah ditetapkan oleh KKM seperti kerap mencuci tangan, saringan suhu badan serta penjarakan fizikal akan terus dilaksanakan di dalam sekolah.

Bagi murid yang akan pulang ke sekolah asrama sepenuhnya, KPM akan melaksanakan ujian saringan COVID-19 menggunakan kit ujian sendiri COVID-19 ke atas murid sebanyak 3 kali, iaitu semasa pendaftaran masuk, hari ke-6 dan hari ke-14. Bagi murid asrama harian, ujian saringan COVID-19 menggunakan kit ujian sendiri COVID-19 akan dilaksanakan semasa pendaftaran masuk. Selain itu, kit ujian sendiri COVID-19 akan disediakan bagi kegunaan sekolah harian untuk membuat saringan awal sekiranya terdapat murid yang menunjukkan gejala ketika di sekolah.

Bagi memastikan kelancaran pengoperasian sekolah, KPM telah mengeluarkan Garis Panduan Pengurusan dan Pengoperasian Sekolah 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru di sekolah.

Kerangka pelan pembukaan sekolah ini adalah satu perancangan komprehensif KPM bagi memastikan pengoperasian sekolah secara bersemuka berjalan dengan teratur dan selamat.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 29 SEPTEMBER 2021 (RABU)

SOALAN

DR. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan mekanisme yang digunakan untuk memastikan anak-anak di pedalaman yang tiada capaian internet agar tidak ketinggalan pelajaran dan proses PdPR.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid. PdPR boleh dilaksanakan melalui tiga pendekatan iaitu secara dalam talian (online), luar talian (off-line) dan *off-site* mengikut kesesuaian guru dan murid.

Bagi membantu murid yang tidak mempunyai akses internet atau peranti yang sesuai, guru mengambil inisiatif untuk melaksanakan PdP secara luar talian melalui penggunaan buku teks. Buku aktiviti pula boleh digunakan untuk membuat latihan ulangkaji. Guru menyediakan modul pembelajaran dan membuat serahan bahan tersebut kepada murid. Guru juga mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

KPM juga telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM akan terus memastikan pembelajaran murid yang berada di kawasan luar bandar dan pendalaman diberi perhatian serta memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TENGKU ZULPURI BIN RAJA PUJI
[RAUB]**

TARIKH : 29 SEPTEMBER 2021 (RABU)

SOALAN

TENGKU ZULPURI BIN RAJA PUJI [RAUB] minta **MENTERI PERTANIAN DAN INDUSTRI MAKANAN** menyatakan apakah dasar baru Kementerian (Pusat) melalui Jabatan Pertanian dengan Kerajaan Negeri untuk merealisasikan Pertanian secara Lestari, kerana banyak lagi pencemaran air sungai serta masalah air bersih untuk rakyat.

JAWAPAN

Tuan Yang di Pertua,

Untuk makluman Ahli Yang Berhormat, dalam merealisasikan pertanian mampan (*sustainable agriculture*), Kementerian Pertanian dan Industri Makanan (MAFI) melalui Dasar Agromakanan Negara yang lalu bagi tempoh 2011 hingga 2020 telah melaksanakan pelbagai inisiatif bagi meningkatkan produktiviti pertanian melalui amalan pengurusan ladang baik yang lebih meluas. Ini termasuk inisiatif bagi penggunaan bekalan air yang mencukupi meliputi peningkatan pengurusan air secara cekap.

Seterusnya, dalam meneruskan usaha pertanian mampan, MAFI melalui Dasar Agromakanan Negara 2021-2030 (DAN 2.0) telah menggariskan beberapa strategi ke arah pertanian mampan antaranya:

SOALAN NO : 72

- i. meningkatkan penerimgunaan pensijilan Skim Amalan Pertanian Baik Malaysia (MyGAP) dan Skim Pensijilan Organik Malaysia (myOrganic) bagi sektor tanaman, perikanan dan ternakan;
- ii. menggalakkan pemuliharaan biodiversiti dan sumber asli termasuk sumber air melalui pemerkasaan perancangan bagi pembangunan projek agromakanan di kawasan sensitif alam sekitar dan pengurusan perosak secara bersepadu; dan
- iii. meningkatkan penggunaan teknologi seperti fertigasi, dengan izin *aquaponics*, *vertical farming* dan *plant factory* bagi melaksanakan pembajaan secara tepat mengikut keperluan tanaman dalam persekitaran terkawal.

Pelaksanaan dasar ini meliputi antara lain, penguatkuasaan Akta Racun MakhluK Perosak 1976 bagi memastikan penggunaan racun untuk kawalan penyakit dan perosak adalah racun berdaftar, terkawal dan mengikut pengesyoran yang ditetapkan.

Di samping itu, MAFI juga telah membangunkan garis panduan dan inisiatif bagi mengelakkan pencemaran sumber air antaranya seperti berikut:

- i. Garis Panduan Pembangunan Pertanian di Tanah Bercerun;
- ii. Garis Panduan Kualiti Air Pertanian;
- iii. Kaedah-Kaedah Perikanan (Akuakultur Perikanan Darat) 2017;
- iv. Penternakan Babi Secara Moden / Modern Pig Farming (MPF); dan
- v. Galakan penggunaan bagi sistem reban ayam tertutup.

Tambahan pula, strategi-strategi ini turut disokong dengan inisiatif di bawah Pelan Tindakan Dasar Sekuriti Makanan Negara 2021-2025 (Pelan DSMN) yang memfokuskan kepada pengukuhan akta dan peraturan bagi menjamin kemampunan sumber dan bekalan makanan serta memastikan jaminan ketersediaan sumber semulajadi seperti tanah dan air yang memainkan peranan penting dalam produktiviti makanan negara.

SOALAN NO : 72

Sebagai kesinambungan dan memperkukuhkan lagi dasar amalan pertanian secara lestari, MAFI akan terus mempergiatkan pelaksanaan Skim Pensijilan Amalan Pertanian Baik (myGAP) dan Skim Pensijilan Organik (myOrganic) yang bukan sahaja untuk memenuhi keperluan makanan yang selamat dan sihat kepada rakyat tetapi juga memulih dan memelihara alam sekitar. Sehingga kini, sebanyak 7,726 ladang telah dipersijilkan dengan myGAP meliputi keluasan 34,072 hektar manakala 269 ladang telah dipersijilkan dengan myOrganic meliputi keluasan 2,067 hektar sejak diperkenalkan pada tahun 2002.

Di bawah RMK-12, MAFI mensasarkan seluas 4,000 hektar kawasan pertanian untuk dipersijilkan dengan pensijilan amalan pertanian baik selain memperuntukkan sebanyak RM20 juta di bawah projek Pemantapan Biosekuriti Tanaman Makanan bagi membantu petani-petani dalam melaksanakan pengurusan perosak secara bersepadu.

MAFI melalui pelbagai platform di peringkat Persekutuan dan Negeri sentiasa melaksanakan kerjasama strategik bersama Kerajaan Negeri bagi memastikan dasar ini dapat dilaksanakan dengan berkesan. Di samping itu, Kementerian melalui Jabatan dan Agensi di peringkat lapangan sentiasa melaksanakan program latihan, kesedaran dan khidmat nasihat kepada usahawan sektor pertanian bagi menggalakkan amalan pertanian mampan. Ini termasuk kerjasama melalui pelbagai pihak termasuk institusi pengajian, persatuan dan swasta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 29 SEPTEMBER 2021 (RABU)

SOALAN

TUAN WONG LING BIU [SARIKEI] minta **MENTERI KEWANGAN** menyatakan berapakah cukai luar jangka (*Windfall Tax*) telah dikutip oleh Kerajaan dari sektor kelapa sawit pada 2 tahun ini.

JAWAPAN

Tuan Yang Di-Pertua,

1. Untuk makluman Ahli Yang Berhormat, *windfall profit levy* dengan izin atau kutipan levi keuntungan luar biasa pada masa ini hanya dikenakan ke atas pengeluaran buah tandan segar kelapa sawit berdasarkan paras ambang harga pasaran minyak sawit mentah (atau CPO) secara bulanan yang dikeluarkan oleh Lembaga Minyak Sawit Malaysia. Levi hanya dikenakan ke atas keuntungan yang melebihi paras ambang harga CPO.
2. Bagi Semenanjung, levi dikenakan pada kadar 3 peratus sekiranya harga CPO melebihi paras ambang 2,500 ringgit se tan, manakala bagi Sabah dan Sarawak, levi pada kadar 1.5 peratus dikenakan apabila harga CPO melebihi paras ambang 3,000 ringgit se tan.
3. Kerajaan telah mengutip hasil levi keuntungan luar biasa sebanyak 209 juta ringgit pada tahun 2020. Manakala bagi tempoh Januari sehingga Jun 2021, jumlah levi keuntungan luar biasa yang telah dikutip adalah sebanyak 588 juta ringgit. Peningkatan hasil kutipan levi yang ketara pada tahun ini adalah berikutan lonjakan harga purata bulanan CPO di pasaran yang dipengaruhi oleh pelbagai faktor termasuk stok minyak sawit yang rendah, pengurangan pengeluaran CPO dan peningkatan eksport produk sawit tempatan. Kutipan levi dijangka terus meningkat bagi tempoh setengah tahun kedua 2021 memandangkan peningkatan harga purata bulanan CPO masih berterusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 29 SEPTEMBER 2021 (RABU)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan sumbangan KDNK dan jumlah pendapatan yang diperoleh daripada setiap negeri pada tahun 2019, 2020 dan anggaran 2021 dengan mengikut pecahan negeri. Apakah balasan balik untuk kedua-dua tahun ini kepada negeri-negeri tersebut.

JAWAPAN

Tuan Yang di-Pertua,

1. Yang Berhormat, semua kutipan hasil yang dibuat oleh Kerajaan Persekutuan di negeri-negeri akan dimasukkan ke dalam Kumpulan Wang Disatukan. Ianya adalah selaras dengan Perkara 97, Perlembagaan Persekutuan di mana semua hasil yang diterima oleh Kerajaan Persekutuan hendaklah dimasukkan ke dalam satu kumpulan wang yang dikenali sebagai Kumpulan Wang Disatukan.
2. Dana daripada Kumpulan Wang Disatukan sebahagian besarnya akan digunakan untuk membiayai keseluruhan Perbelanjaan Mengurus di mana sebahagian besar adalah bagi sektor pendidikan, kesihatan, ekonomi, keselamatan, sosial dan perkara-perkara melibatkan kesejahteraan rakyat. Komponen Perbelanjaan Mengurus termasuk emolumen, hutang, subsidi, pembelian ubat-ubatan dan penyelenggaraan aset Kerajaan. Manakala lebihan baki sekiranya ada akan digunakan untuk menampung sebahagian daripada Perbelanjaan Pembangunan seperti pembinaan hospital, sekolah, jalan raya dan penyediaan bekalan air bersih. Semua perbelanjaan tersebut dapat memberi manfaat dan faedah kepada rakyat.
3. Untuk makluman Yang Berhormat, jawapan yang akan saya perincikan di sini terbahagi kepada tiga (3) bahagian. Yang pertama adalah berkenaan sumbangan KDNK negeri. Yang kedua adalah mengenai jumlah kutipan hasil Kerajaan Persekutuan di negeri dan yang ketiga adalah berkaitan balasan balik oleh Kerajaan Persekutuan kepada kesemua negeri bagi tahun 2019 dan 2020.
4. Merujuk kepada soalan pertama, Negeri Selangor, Wilayah Persekutuan (WP) Kuala Lumpur, Johor dan Sarawak merupakan penyumbang utama kepada ekonomi negara pada tahun 2019 hingga 2021. Negeri-negeri ini menyumbang sebanyak 59.7% kepada keluaran dalam negeri kasar (KDNK) nasional pada tahun 2019 dan 59.4% pada tahun 2020, serta dijangka menyumbang sebanyak 59.2% pada tahun 2021.

5. Pada tahun 2019, Negeri Selangor menyumbang 24.2% kepada KDNK nasional, WP Kuala Lumpur 16.4%, Sarawak 9.6% dan Johor 9.4%. Pada tahun 2020 pula, Selangor menyumbang 24.3%, WP Kuala Lumpur 16.1%, Johor 9.5% dan Sarawak 9.5%. Manakala bagi tahun 2021, sumbangan Selangor kepada KDNK nasional dianggarkan sebanyak 24.2%, WP Kuala Lumpur 16.0%, Johor 9.5% dan Sarawak 9.5%.

6. Merujuk kepada soalan kedua pula, untuk makluman Yang Berhormat, jumlah hasil cukai kasar Kerajaan Persekutuan yang dikutip mengikut negeri bagi tahun 2019 adalah sebanyak RM187.5 bilion, manakala kutipan tahun 2020 pula berjumlah RM161.8 bilion. Jumlah yang dilaporkan ini adalah kutipan cukai kasar kerana jumlah tersebut tidak mengambilkira tuntutan jumlah pulangbalik cukai. Kutipan ini juga tidak menggambarkan jumlah kutipan sebenar yang dihasilkan daripada negeri yang berkenaan. Perbezaan ini boleh berlaku kerana kutipan cukai dibuat berdasarkan alamat pembayar cukai yang terdapat di dalam rekod Lembaga Hasil Dalam Negeri Malaysia (LHDNM) dan Jabatan Kastam Diraja Malaysia (JKDM). Misalnya, terdapat syarikat yang beroperasi di mana-mana negeri lain tetapi membayar cukai di Kuala Lumpur atau di tempat lain kerana ibu pejabat berada di sana.

7. Secara amnya, kutipan cukai tertinggi bagi tahun 2019 dan 2020 adalah daripada Wilayah Persekutuan dan diikuti dengan Selangor dan Johor. Kutipan hasil bagi tahun 2019 sebagai contoh ialah sebanyak RM113 bilion daripada Wilayah Persekutuan dan diikuti oleh Negeri Selangor dan Johor iaitu masing-masing sebanyak RM29.2 bilion dan RM10.8 bilion.

8. Berhubung dengan soalan yang ketiga pula, balasan balik yang dibuat oleh Kerajaan Persekutuan kepada negeri-negeri adalah melalui Pemberian Kerajaan Persekutuan dan juga peruntukan Perbelanjaan Pembangunan. Pemberian Kerajaan Persekutuan sebagaimana termaktub di dalam peruntukan Perlembagaan Persekutuan, undang-undang dan Akta adalah bagi membantu Kerajaan Negeri menguruskan hal ehwal kewangan dan operasi negeri manakala peruntukan

Perbelanjaan Pembangunan adalah bagi melaksanakan projek atau program kementerian di negeri-negeri. Jumlah balasan balik yang dibuat oleh Kerajaan Persekutuan kepada negeri-negeri pada tahun 2019 adalah berjumlah RM32.3 bilion manakala bagi tahun 2020 berjumlah RM28.6 bilion. Negeri Johor, Sabah dan Selangor antara yang menerima peruntukan yang tertinggi pada tahun 2019 iaitu sebanyak RM5 bilion, RM4.9 bilion dan RM4.6 bilion. Untuk makluman Yang Berhormat, Negeri Pulau Pinang menerima peruntukan sebanyak RM1.2 bilion pada tahun 2019 dan RM1.0 bilion pada tahun 2020. Suka juga saya ingin menarik perhatian di sini, bahawa peruntukan yang dimaksudkan di sini tidak termasuk peruntukan di bawah Perbelanjaan Mengurus yang disediakan untuk membiayai belanja operasi jabatan/ agensi Kerajaan Persekutuan di negeri seperti sekolah, hospital, markas tentera dan seumpamanya.

9. Secara kesimpulannya, Kerajaan Persekutuan bertanggungjawab untuk memastikan hasil yang diperolehi daripada semua negeri diagihkan semula kepada negeri-negeri berdasarkan keperluan dengan mengambil kira kedudukan kewangan negeri, tahap pembangunan, keadaan sosio ekonomi penduduk setempat.

Sekian, terima kasih.